

San Mateo

Jesube bēts taitanga

(Lc 3.23-38)

¹ Quemēnga imnamna Jesucristbe bēts taitanga: Jesucristna Rey David y Abrahám bentsana entšá inamna.

²⁻⁶ Abraham yojamna Isaacbe taitá; Isaacna Jacobēbe taitá y Jacob, Judá y chabe catšátangbe taitá. Judá, Fares y Zarabe taitá; y chatbe mamá Tamar yojamna;

Fares Esrombe taitá y mua Arambe taitá.

Aram Aminadabēbe taitá; Aminadab Naasonbe taitá y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna; y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chē Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá y Abíasna Asabe taitá;

Asa Josafatbe taitá;

Josafat Jorambe taitá y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.
 Ezequías Manasesbe taitá;
 Manasés Amonbe taitá
 y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entsanga chë israelitënga tmojánishëche y choca imojanëtámena ora, Josías chë básenga yojánabamna.

12-16 Ya Babilonioca ndutámenënga ora;

Jeconías Salatielbe taitá;
 Salatiel Zorobabelbe taitá.
 Zorobabel Abiudbe taitá;
 Abiud Eliaquimbe taitá
 y Eliaquimna Azorbe taitá.
 Azor Sadoche taitá;
 Sadoe Aquimbe taitá
 y Aquimna Eliudbe taitá.
 Eliud Eleazarbe taitá;
 Eleazar Matanbe taitá
 y Matán Jacobëbe taitá.

Jacob Josebe taitá yojamna y Josena Mariybe boyá.
 María Jesusbe mamá, Jesús chë Bëngbe Bëtsabe
 Uámana Uabuayaná, chë Cristo ca uabainá.

17 Chcasna, Abrahámbentsana Davidbentscoñe bnëtsana canta bëts pamíllanga imojëftsemna. Davídbentsana y chë israelitënga Babilonioca imojanëtamenëntscuana inye bnëtsana canta bëts pamíllanga; y inye bnëtsana canta bëts pamíllanga chë Israeloca entsanga imojanëtamenentsana, chë Cristo tojanonýnántscóne.

*Jesucristo tojanonýná
 (Lc 2.1-7)*

18 Jesucristo jónŷnanamna mēntšá tojanopasá: María tbojanšbuachená Joséftaca jobouamayama, pero cabá ndoñe cánŷiñe ibontsiyena ora, tojanopasá Mariyna ngomamaná yojoquéda chē Uámana Espíritbe obenánaca. 19 José, Mariybe boyá, canŷe nŷetsca soyēnguiñe tšabá jamama bošá inamna. Cha ndoñe yontseboše entšangbe delante cha mal jaquédana; chíyecna tojanjuabó nŷe iytēcana Mariybentšana jtsojuánañana. 20 Y chca yojtsejuabnantscuana, mo otjenayoquécá canŷe Bēngbe Bētsabe ángel tbojáninŷe y chana Josébioye tbojaniyana: “José, Davídbentšana entšá, ndoñe matenócochinŷenana Maríaftaca jobouamayama, er chē bochántsebomna šešona chē Uámana Espíritbe obenánaca cha bochántsebomna. 21 María canŷe šešona bochántsebomna y cha Jesús ca cochjuabaye. Chca echantsabaina er cha chabe entšanga chēngbe bacna soyēnguentsana echanjátsebacaye ca” —chē ángel tbojaniyana.

22 Lempe chca tojanochnēngo, cachcá chaotsemnana ntšamo Bēngbe Bētsá chabe juabna oyebuambnayēngbiajana tojanayancá. Chē oye-buambnaya mēntšá tojánayana:

23 Chē cabá boyabása nduabuatmá ngomamaná echanjoquéda

y canŷe šešona boyabásetema bochántsebomna,
y cha mochanjuabaye Emanuel ca.

(Emanuel endayana “Bēngbe Bētsá bēngaftaca ca”.)

24 José chē otjénayentsana tojanofšená ora, tojanma ntšamo chē Bēngbe Bētsabe ángel

tbojanmandacá y Mariáftaca tojanobouamá.
 25 Pero ndoñe cányiñe ibontsaniyena, sinó
 nñe chë šešonatema tojanonýná orscana. Chë
 šešonatema tojanonýná orna, José chábioye Jesús
 ca tbojanabaye.

2

Reyes Magos Jesúsbioye tmojána

¹ Herodes judiëngbe rey yojamna ora, canñe
 pueblo Judeoca, Belén ca uabáinentše Jesús
 tojanonýná. Chentšana, báseftanga, estrellënga
 uatsjëndayënga, magos ca uabáinënga, canñe bëts
 puebioye Jerusalén ca uabáinoye tmojánashjajna.
 Chënga tmojánabo shinñe bocanoye luarëngocana.

² Jerusalenocna chënga, Heródesbioye tmojána
 y tmojanënoticiá: “¿Ndayentše yojtsemna chë
 judiëngbe rey jtsemnama tojonýná cha ca? Bëngbe
 luarëngoca shinñe bocanoye chabe onýnana
 estrella fsënjinye y as muentše cha jaboadorama
 tifjabo ca.”

³ Rey Herodes chca tojanuena ora,
 corente yojtsenócochinñena, y nñetsca chë
 Jerusalenentše oyenëngnaca. ⁴Chentšana chë rey
 tojánachembo nñetsca chë judiëngbe bachnangbe
 amëndayënga y chë judiëngbe ley abuátambayënga
 jenoyeunayëngama. Mëntśá tojanatjá: —¿Ndayentše
 chë Bëngbe Bëtsabe Uámana Uabuayaná, chë Cristo
 ca uabainá, jónýnama ibomna ca?

⁵Chënga tmojanjuá: —Judeoca, Belén pueblentše
 ca. Bayté entsemna chë Bëngbe Bëtsabe juabna
 oyebuambnayá Miqueas mëntśá tojanábema:

⁶Y tsëngaftanga, Judeoca Belenentše oyenënga,

canÿe mandayá tšëngaftangbentšana echanjabo.
 Cha nÿetsca chë Judeoca mándayëngbiana más uamaná echántsemna,
 y atšbe entšanga Israeloca echántsanÿena.
 Chíyeca tšëngaftangbe pueblo ndoñe nÿe batšá uámana pueblo quenátsmëna ca.

⁷ Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninÿama. ⁸ Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanëyana: “Choye motsajna y tšabá chë šešona šmochjúanguango. Chašmojinÿena ora, šmochjabëuenaye, as átšnaca chayobená jama chë šešona jadórama ca.”

⁹ Rey Herodes chë soyënga tojánëyanentšana, chë maguënga tmojtsatanoñe. Chora cachiñe tmojtandinÿe chë chëngbe luarëngoca tmojáninÿe estrella y yojtsanebnatsana chë šešona yojtsemnëntscóñe. Chentša juatsbuacá chë estrella yojójaiye. ¹⁰ Chë maguënga chë estrella tmojáninÿe orna, corente oyejuayënga imojtsemna. ¹¹ Chë yebnoye tmojánamashjna ora, chë šešona tmojáninÿe chabe mamá Maríaftaca. Chorna, tmojanoshamentsé y chë šešonatema tmojanadorá. Chora chëngbe cajontëmënga tmojanëtsécaca y tmojanatštá castellano, incienso y canÿe botamana uanguëtše soye, mirra ca uabáiniye. ¹² Chentšana, mo canÿe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentšana inÿe benachëjana cachëngbe luarëngoye tmojésanshëcuana.

Egipto luaroye tmojtsanachá

¹³ Chë maguënga tmojtsatanoñe ora, otjénayoca José canÿe Bëngbe Bëtsabe ángelbioye tbojáninÿe y cha mëntsá tbojaniyana: “Motsbaná, chë šešonatema y chabe mamá mesëbiatše y Egiptoeye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuayenantscuana ca.”

¹⁴ As José tojantsbaná, chë šešonatema y chabe mamá tojesanëbiatše y ibeta Egiptó benache tojëftsanbocna. ¹⁵ Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayabiajana tojanayancá. Chë oyebuambnayá mëntsá tojánayana: “Egiptocana atšbe uaquiná sënjanchembo ca.”

Herodes tojanmandá basetémënga jtsëbáyama

¹⁶ Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninÿama. ¹⁷ Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

¹⁸ Ramá ca uabaina pueblentše canÿe oyebuambnayana tmojanuena,
ngménaca ošachiyana y becá tsetšanánaca oye-
buambnayana.

Raquel yojamna chabe básengbiana ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

¹⁹ José cabá Egiptoca yojtsomñe ora, Herodes tojanóbana. Chentšana, otjénayoca José canye Bëngbe Bëtsabe ángelbioye tbojáninye y cha mëntsá tbojaniana: ²⁰ “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

²¹ As José tojantsbaná y chë šešonatema y chabe mamá Israel luaroye tojtésanëbiatše. ²² Arquelao Judeoca yojanmánda chabe taitá Heródesbe cuentiñe, y José chca tojántatsëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chiyeca Josena Galilea ca uabaina luaroye tojána. ²³ Choye tojánashjango ora, José tojána canye pueblo Nazaret ca uabainoye chentše joyéname. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

3

*Juan chë Ubayaná entsanga yojanabuayiyná
(Mc 1.1-8; Lc 3.1-9, 15-17; Jn 1.19-28)*

¹ Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. ² Mëntsá cha yojanëtsëtsnaye: “Bëngbe Bëtsabe amëndayana

ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canya ndabiama chë Bëngbe Bëtsabe juabna oyebuambnayá Isaías mëntšá tojánayana:

Entšanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entšá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” –cha tojánayana.

⁴ Juanbe entšayá inauapormana camellbe stjënasheca y bobache yojanasnana. Cha inasaye chapulinatëmënga y tjoca tjouangbe méloye.

⁵ Jerusalenoca entšanga, nyetsca Judea luarentša entšanga y chë Jordán ca uabaina bėjaye béconana oyenënga imojánbocana Juan joyeunayama.

⁶ Bëngbe Bëtsábioye chëngbe bacna soyëngama jaimpáda chentšana, Juan chë Jordán bėjayiñe chënga yojanëbáyana.

⁷ Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtšcuaye entšanga! ¿Nda tcmënjáuyana chë echanjóshjango uabouana castigüentšana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinyna chë bacna soyënga amana tšëngaftanga ndegombre šmojtsajbanama. ⁹ Y

ndoñe šmattsejuabnaye cach tšëngaftangbiamia jayanama: ‘Abrahámbentsana entsanga fsëndmëna ca’. Er atše šcuayana, Bëngbe Bëtsá quem ndëtsbéngacnaca Abrahámbentsana entsanga nanjábiama. ¹⁰ Chë tatsnía ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangfaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

¹¹ “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamia más obenana bomná comna, y atše merecido taitatobuajoñe ni mo chabe shecochëtjonëshe jtsámbañama. Chë chabe benache aíñe chamojtishachëngbiamia Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnana, mo iñeshequëcá.

¹² Canyë entšá chabe mëtštá cucuatšíñe jiyëbana, chabe trigo jtsóbobemana y chë ndoserverna shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoserverna shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canyë iñeshiñe echantsacastígaye, y chë iñe ndocna te queochátsfsana ca” –cha tojanëyana.

Juan, Jesúsbioye tbojanabaye
(Mc 1.9-11; Lc 3.21-22)

¹³ As Jesús, Galileocana tojána Jordán béjayoye, Juan yojtsemnoye, cha chabuabayama. ¹⁴ Pero Juan ndoñe yontseboše Jesús juabáyama, y mēntšá tbojaniana: –Atše šontsemna aca chašcuabaye, y ¿más atše aca cbochjuabaye ca?

¹⁵ Chora Jesús tbojanjuá: –Morna chca chaotsemna. Entsemna lempe ntšamo Bēngbe Bētsá tojamandacá jobedésana ca.

As Juan yojouena Jesús juabáyama. ¹⁶ Jesús ya uabainá yojtsemna ora, chē buyeshoicana tojtanshēbēbocna. Chorna Jesús tsbanánoye yojtješiye y tojáninye chē celoca atēfjniñe y chē Uámana Espíritu mo canye palomatemcá chábioye yojtsastjajuana. ¹⁷ Chora celocana Bēngbe Bētsá mēntšá tojánayana: “Mua atšbe bonshana uaquiñá endmēna. Chabiana corente sēntsoyejuá ca.”

4

Jesús tojanobená Satanás jayēnjanama
(Mc 1.12-13; Lc 4.1-13)

¹ Chentšana chē Uámana Espíritu entsanga ndoyena luaroye Jesús tbojanánatse, as Satanás chauábama cha jisháchichiyama.

² Chentše canta bnētsana te y canta bnētsana ibeta ntjascá tbojanjētana; chíyeca chora tbojaneshēntsena. ³ As Satanás tbojanobobeconá y tbojaniana: –Aca ndegombre Bēngbe Bētsabe Uaquiñá tcomnēse, momandá quem ndētsbenga tandēse chaobiana ca.

⁴ Pero Jesús tbojanjuá: –Bēngbe Bētsabe uabemana palabrenguiñe mēntšá endayana: “Entšá nye

tanděseca ndoñe vida ntsebomnana, sinó entšá endobena jtsiyenana lempe ntšamo Běngbe Bětsá tojayancá tbojtseyeunaněse ca.”

⁵ Chentšana Satanás, Jerusalén, chě uámana běts pueblo ca uabáinoje Jesús tbojanánatse, y chě Běngbe Bětsabe běts yebnentše chě más tsbanánoca tbojanatsá. ⁶ Chentše Satanás měntšá tbojanianyana: —Aca ndegombre Běngbe Bětsabe Uaquiñá tcomněse, muentšana fshantsoye montsěnja, er Běngbe Bětsabe uabemana palabrenguine endayana:

Běngbe Bětsá chabe angelěnga echanjichamuá, chacmotsiněnama.

Chěnga buacuatšěngaca cmochanjishache, shecutatše ndětšbeñe ndocá chacondomama ca — cha tbojanianyana.

⁷ Chora Jesús tbojanjuá: —Cach Běngbe Bětsabe uabemana palabrenguine měntšá endayana: “Ndoñe matsbošana acbe Bětsá chě Utabná bacna soyěngama jacochenguama ca.”

⁸ Cabana, Satanás tbojanánatse caně běts tjoye y betesco nětsca quem luarentša aměndayěngbenache y chentša nětsca uámana soyěnga Jesúsbioye tbojaniněině. ⁹ As Satanás tbojanianyana: —Aca cha-cojoshěntsamentšé y chašcojadorase, lempe chě soyěnga cbochjatštaye ca.

¹⁰ Y Jesús tbojanjuá: —¡Satanás, átšbentšana mo-juaná! Běngbe Bětsabe uabemana palabrenguine měntšá endayana: “Běngbe Bětsá cochtsadorana y něe cha cochtseservena ca.”

¹¹ As Satanás cachcá tbojanoněyá. Cachora Běngbe Bětsábicana angelotéměnga tmojánabo Jesús jtseeservěnama.

Jesús tojanontsé Galileoca chabe trabajo jama

(Mc 1.14-15; Lc 4.14-15)

¹² Juan chë Ubayaná cárceloye tmojanëtámiamia Jesús tojanuena ora, Galilea luaroye cha tojtaná.

¹³ Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyénanama, chë uámana bëts taitata Zabulón y Neftalibe luariñe. ¹⁴ Chca tojanochnëngo, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

¹⁵ Zabulón y Neftalibe luare, Jordán béjaye chenguánoica, uafjajónaye tsachañe;

Galilea luariñe, ndoñe judío entšanga oyenentše.

¹⁶ Chë mo ibetiñe cuaftsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábioye nduabuatmëngbiama,

y chë causa chabiamia imomna mo obanëngcá, ndoñe binÿniñe jtsiyenëse ca —cha tojanábema.

¹⁷ Cach orscana Jesús tojanontsé entšanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuastama

(Mc 1.16-20; Lc 5.1-11)

¹⁸ Canÿe te, Jesús chë Galilea uafjajónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiešhangá ibnetsashbuétsetšañe, er beonga ashebuánayata ibnamna. ¹⁹ Jesús tojanéyana: “Atšeftaca mabata; atše chochanjábiama Bëngbe Bëtsabiama entšanga anguayata, y morscana nÿe beonga ashebuánayata ya ndoñe quešochátsmëna ca.” ²⁰ Cachora chatbe atarraiešhangá cachcá tbojésanaboshjuana y Jesús tmojanasto.

²¹ Y más chcoye, Jesús inÿe uta catšátata tojánanÿe: Santiago y Juan, chë Zebedeobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiešhangá atapórmayñe. Jesús tojánachembo, ²² y cachora chë barquëshata tbojésanaboshjona, chë taitá cachentše imojéseboshjona y Jesús tmojanasto.

Jesús ba entšanga yojanabuatambá y yojánashnaye

(Lc 6.17-19)

²³ Jesús nÿets Galilea luarëjana yojánana, chentše judiëngbe enefjuana yebnënguenache abuatambaye. Chë tšabe noticiënga Bëngbe Bëtsabe amëndayama entšanga yojanabuayayná y nÿetsca šocanëngama y tsetšanëngama yojánashnaye. ²⁴ Nÿets Siria luarëjana entšanga cha imojtsebáyana. As entšanga nÿetsca šocana bomnënga Jesúsbioye imojtsënachaye: šoquënga y tsetšanana bomnënga,

bacna bayějbe juabna uambayënga, ataque osháchichanënga y jama ndobenënga. Jesús nyetscanga yojánashnaye.

²⁵ Mallajta entšanga Galileocana, Decápolis lu-arocana, Jerusalenocana, Judeocana y chë Jordán béjaye chengvanoicana Jesús imojústona.

5

Ndayá Jesús tjoca tojanabuatambá

¹ Jesús chë mallajta entšanga tojánanyë ora, bat-sjoye tojántsjua y tojanótbema. Chabe ústonënga tmojanobobeconá y ² Jesús tojanontsé mëntsá jabuátambana:

Ndëmuanyënga imomna chë ndegombre oyejuayana bomnënga
(Lc 6.20-23)

³ “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entšanga mochántsemna chë Bëngbe Bëtsabe amëndayoca mochtsiyenënga.

⁴ “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

⁵ “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjóyëngacñe.

⁶ “Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe

tšabá jamama bošënga mochanjobenaye jëftsinyana lempe ntšamo tmojtsebošcá.

7 “Puerte oyejuayënga mochántsemna chë ínÿengbiamama ongmiaiyënga, er Bëngbe Bëtsá chëngbiamama bochanjóngmia.

8 “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

9 “Puerte oyejuayënga mochántsemna chë nÿetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

10 “Puerte oyejuayënga mochántsemna chë ínÿenga tmojama chamotsesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entšanga chacmojoyánguango y chacmojtsécamena ora y nÿetscna soyëngaca chacmojtsëbuayatsenaye ora, atšbe ústonënga bétsemnama. 12 Móyejuanga, puerte móyejuanga, tšëngaftanga celoca becá šmochanjóyëngacñe. Er ntšamo entšanga tšëngaftanga cmëcamena, cachcá chë Bëngbe Bëtsabe juabna oyebuamb-nayëngbioye, chë tšëngaftangbe natsana monjaniyenëngbioye entšanga monjanëcamena ca” —Jesús tojánayana.

*Ošbuáchiyënga jtsemnana mo tamocá y binÿnayënga quem luarentša entšangbiamama
(Mc 9.50; Lc 14.34-35)*

13 “Tšëngaftanga, quem luarentša entsanga jtsëjabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiamama šmochántsemna mo chë mëntšena ndoñe chaondóndbemama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtsmënana. Chca, ya tondayama ntoservénana; chíyeca chë tamó tsáshenoye jtsëtšenana y entsanga jtsebotájayana.

14 “Tšëngaftanga, ntšamo tšabá yomncá šmojtsiyenëse, as quem luarentša entsangbiamama šmochántsemna mo chë ibetiñe tojtsebínÿna soyca. Canÿe bëts pueblo batsjo juatsbuañe tomnëse, ndoñe ntsopodénana iytémencá jtsemnama. 15 Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuama, sinó tsbanánoca juajájuama, chca, nÿetsca entsanga chë yebnentše tmojtsemnëngbiamama chaotsebínÿnama. 16 Cachcá tšëngaftanga, entsangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bëtsemnama ca” –Jesús tojánayana.

Chë Moisesbe leyama Jesús tojanabuatambá

17 “Ndoñe šmattsejuabnaye, ntšamo Moisesbe leyinë iuayancá y chë Bëngbe Bëtsabe juabna oyebuambnayënga tmojanayancá jabétsepochocama atše tijabo ca. Atše ndoñe chiyátabo chë soyënga jabétsepochocama, sinó jabábuayenama ndayá chë soyënga ndegombre bétsayanama. 18 Ndegombre šcuayana: Celoca

y quem luare chaojëftsemnëntscuana, ndocná queochatobenaye ni canye punto, ni canye letra chë leyënguentsana jtsejuánana, lempe ntšamo jochnënguama yomncá chaojtsemnëntscuana. ¹⁹ Chíyeca, nda nye mo canye mando chë leyënguiñe ndoñe tonjoyeuná cha, masque nye base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. ²⁰ Chë soyëngamna mëntšá šcuayana: Tšëngaftanga chë ley abuátambayënga y fariseúngbioye ndoñe šmontsayëñanase, jtsamama ntšamo Bëngbe Bëtsá tmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínÿengaftaca tbojetnama Jesús tojanabuatambá

²¹ “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca.’ ²² Pero atše šcuayana, nda cachabe catsátaftaca tbojetna, chánaca bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catsátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana

ndáyeca chca ca; y nda cachabe catšatbiamama opjema ca tojayana, ntšamo cha bétsamama, cha bontsemna chë infiernoca íñeshoye jama.

²³ “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, ²⁴ as chë tcojiyëbo soye chë altar-entša natsanoica cochjéseboshjona, cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

²⁵ “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšinë cmochanjáboshjona y chënga cárceloye cmochanjutame.

²⁶ Ndegombre cbëyana: Chentšana ndoñe quecochtétsbocna lempe candesopagantscuana ca” —Jesús tojánayana.

Chë boyá o shémbioye ínÿaftaca íngñayama Jesús tojanabuatambá

²⁷ “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’ ²⁸ Pero atše cbëyana: Nderado canÿe boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shémbioye tbojtseingñé.

²⁹ “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse,

más tšabá nántsemna chë bominyë cochtsenobuchjatsëca y cochtsëtšena. Nyets cuerpo jtsebomnana y lémpeca infiernoye jama chacmotsëtšenamna, acbiama más tšabá nántsemna nÿe canÿe soye acbe cuerpentšana chacoperdé. ³⁰ Nderado acbe catšbioica cucuátšeca bacna soye tcojamëse, más tšabá nántsemna chë cucuatše cochtsenástjango y cochtsëtšena. Nyets cuerpo jtsebomnana y lémpeca infiernoye chacmotsëtšenamna, acbiama más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

Chë bouamnata enëtšanama Jesús tojanabu-atambá

(Mt 19.9; Mc 10.11-12; Lc 16.18)

³¹ “Mëntšánaca leyiñe enduábemana: ‘Ndëmuanÿe boyá chabe shémaftaca tbojtsenëtšena, chë boyá bontsemna chabe shema canÿe tsbuanácha juiyiyana, ndayëchañe chaotsayana cha ya ndoñe chabe shema yontsemna ca.’ ³² Pero atše cbëyana: Nda chabe shémaftaca tbojtsenëtšena y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útšena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

Chë entsanga júrayama Jesús tojanabuatambá

³³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’ ³⁴ Pero atše cbëyana: Tondayama šmattsejúraye; ni celocama,

er choca Bëngbe Bëtsabe tbemaniñe endmëna.
³⁵ Ni quem luarama, er Bëngbe Bëtsabiana mo tšenëtemcá endmëna, chiñe chabe shecuatsënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo.
³⁶ Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canye stjénashe ftsenguëshe o fjantsëshe jabemana.
³⁷ Tšëngaftanga aiñe ca jayanama šmojtsebošëse, nye aiñe ca šmochjayana, y ndoñe casna nye ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

Chë entsanga mondbátenachnënguama Jesús tojanabuatambá

(Lc 6.29-30)

³⁸ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebmna canyëbé cha jëtsbuchjátsëcama ca; y nderado nda canye juatsaše tcmojtsásiye, ácnaca derecho contsebmna cányëšë cha jtašiyama ca.’ ³⁹ Pero atše cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catšbioica tcmojajuebiantsetase, cochjomiye chë ínjoica cachcá chacmomama. ⁴⁰ Nderado nda tcmojademanda y tojtseboše acbe shabuanguanëjua jtsabocñama, cha molesenciá acbe quëfsaiyanaca chauetsácñama. ⁴¹ Nderado nda tcmojuasmá y tcmojamanda bnëtsana cuadroca juyambama, inye bnëtsana cuadro cochjuyamba. ⁴² Nda ndaye soye tcmojotjañëse, cochjatštaye; y

nda ndaye soye tcmojuátjase, cha ndoñe stëtsoye catjaquéda ca” —Jesús tojánayana.

Chë uayayëngbiana bonshánana jtsebomnana
(Lc 6.27-28, 32-36)

⁴³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’ ⁴⁴ Pero atše cbëyana: Tšëngaftangbe uayayënga šmochtsababuánÿeshana, y chë cmëcamenëngbiana Bëngbe Bëtsá šmochtseimpadana. ⁴⁵ Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbétsama tšabe y bacna entšángbeñe chabe shinÿe chaotsebinÿnayama, y endbétsama chë nÿetsca soyënguñe tšabá jamama bošënga y ndoñe chca entšángbeñe chauaftema. ⁴⁶ Tšëngaftanga nÿe chë tšëngaftanga tcmojsababuánÿeshanënga šmojsababuánÿeshanëse, ¿Bëngbe Bëtsábiocana ndayá šmochjuacaná? Romocama crocénana entšángbioye atjanayëngnaca chca monduamana. ⁴⁷ Y nÿe chë amiguëngbioye šmojsacheuanase, ¿ndaye bëts soye šmojsama? Chë ndoñe judiëngnaca chca mondbétsama. ⁴⁸ Tšëngaftangbe Taitá, Bëngbe Bëtsá celoca endmëná, nÿetsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

6

Jesús tojanabuatambá ntšamo tšabe soyënga ínÿengbiana jamana

¹ “Cuedado šmochtsebomna ndoñe ntsamama entšángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endméná ndocna uacanana soye quecmochtëtatsataye.

² “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nÿetscanga chamotsetatsëmbuama, mo canÿe trompetëfjua cuaftsajatëtancá, chë caridá šmojábemama chaotsótatsëmbuama; chca monduamana chë bacna entšanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entšanga tšabá chëngbiana tmojtsoyebuambná ora. ³ Chcasna, nda caridá tcojábema ora, ndocná más chaondëtsetatsëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, ⁴ chca, acbe caridá iytëcana chaotsemnana. As, tšëngaftangbe Taitá, nda bominÿe endbëtsequëcjnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

Jesús tojanabuatambá ntšamo Bëngbe Bëtsáftaca jencuéntana

(Lc 11.2-4)

⁵ “Bëngbe Bëtsáftaca šmojtsencuénta ora, ndoñe šmattsama chë bacna entšanga ntšamo ndegombre tmojuabnacá ndinÿinÿayëngcá. Chënga corente jtsogusetánana chë judiëngbe

enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nÿe entšanga chë soye chamuinÿama. Ndegombre šcuayana: chënga nÿe morscama ya montsábouacanána, chënga tšabá imojtsama ca entšanga tmojayana ora. ⁶ Pero aca Bëngbe Bëtsáftaca jencuéntama orna, acbe tsoye cochtamáshëngo, bësáša cochtatame y cháftaca cochjencuénta. Chánaca chë iytëmenentše ácaftaca echántsemna. Bëngbe Taitá lempe bominÿe endetsequëcjiná, masque cánÿenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

⁷ “Bëngbe Bëtsáftaca šmojtsencuénta ora, ndoñe nÿe cachcá ndoservena palabrënga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca. ⁸ Ndoñe chëngcá šmattsemna. Cabá nduyana ora, Bëngbe Bëtsá ya jtsetatsëmbuana ntšamo tšëngaftanga cmojtsëjabotcá. ⁹ Chamna tšëngaftanga mëntšá cmontsétocana Bëngbe Bëtsáftaca jencuéntana: Bëngbe Taitá, celoca icotsomñe. Acbe uabaina chë más uámana uabainana chauesomñe.

¹⁰ Acbe amëndayana chaóshjango. Celoca yojtsemna ntšamo icobošcá; quem luaríñnaca cachcá chaotsemna.

¹¹ Mënté šmiyatšatá cada te šnetsëjaboto tandëse.

¹² Bacna soyënga bënga fsënjama: šmotsaperdónaye;

cachcá ntšamo chë bëngbiana bacna soyënga amënga fsëndbetsaperdonaycá.

¹³ Bacna soyënga jamama šojochëngo ora, šcochjujabuache chca ndenobuíyama.

Njÿetsca bacna soyënguentsana šmatsebacaye.

¹⁴ “Chë tšëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye.

¹⁵ Pero chë tšëngaftangbiana bacna soyënga amënga ndoñe šmontsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

Chë Bëngbe Bëtsáftaca jencuéntama tondaye ntjascá

¹⁶ “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entšanga chë ndegombre tmojuabnacá ndinÿinÿnayënga mondbetsamcá, as chca, chënga imojtsayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiana tmojtsoyebuambná ora.

¹⁷ Aca nderado tcojtsayúna ora, cochtsojuebjabebiyey aceitíyeca botamana cochtenochquëca, ¹⁸ as chca, entšanga ndoñe chamondëtsetatšëmbo aca tondaye ntjascá cojtsemnama. Nÿe acbe Taitá, lempe chë mo iytëmencá yomna soyëngama tatsšëmbuá, chama echántsetatšëmbo. Y cha, chë iytëmencá tcojama soye bominÿe endbetsequëcjnyá, acbe uacanana soye cmochántatštaye ca” —Jesús tojánayana.

Chë celoca bomnana
(Lc 12.33-34)

19 “Bomnana quem luarentše ndoñe šmattsëjuabaye. Muentšna chë mejojón y inye pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. 20 Más tšabá tšëngaftangbiamana entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inye pochócaye soyënga acbe soyënga quemochatspochóca, ni atbëbanënga quemochátamashjna jatbëbama. 21 Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

Chë cuerpama uajuinÿanësha
(Lc 11.34-36)

22-23 “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bominÿeca jtsonÿayana. Chë bominÿe ndoñe tšabá tontsemnësna, chë bominÿe tondaye ntsoebenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

Chë Bëngbe Bëtsabiamana bonshánana o chë nÿe quem luarentša soyënga jtsebošana

(Lc 16.13)

²⁴ “Ndocná ntsobenana uta mandayata jtsaservénana: cánÿabioye bochantśáboyënja y chë ínÿabioyna bochantsebobonshana, o cánÿabiamana tśabá echántsetrabajaye y chë ínÿabiamna ndoñe tśabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnama yapa tcojtsebošëse ca” —Jesús tojánayana.

Bëngbe Bëtsá chabe básenga jtsanÿenana

(Lc 12.22-31)

²⁵ “Chcasna atše šcuayana: Ndoñe šmattsenócochinÿena ndayá šmochjase o šmochjofšiye vida jtsebomnama, ni ndaye entśayá šmochjuíchëtjuama cach ndoñe. Ndegombre, vida chë sanama más enduámana y cuerpo chë entśayama más. ²⁶ Smochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatśatnayana. ¡Y tšëngaftanga chë shloftsetémëngbiamana puerta más šmonduámana! ²⁷ Masque chca endmëna, canÿa masque tša tojtsenócochinÿena, ¿ntśamo nanjobenaye jamana chë ntsachetśá vida yochtsebomnentšana, canÿe hora vida más jabotiyana?

²⁸ “Y ndayá šmochjuíchëtjuama, ¿ndáyeca šmojtsenócochinÿena? Smochjinÿe chë jajañe lirio uantšefjushangá jtsajuajnana: ndoñe

ntsetrabájayana, ni ntshabiamnayana. ²⁹ Pero atše cběyana, ndegombre ni mo Rey Salomón nyetsca chabe bomnánaca nyetsá botamana mo chě lirio uantšefjushangacá quenjatspormana. ³⁰ Běngbe Bětsá tša botamana shácuana tojuama, y chě shácuana měnté jajoca jtsamnana, yěfsana iñoca. Chca chě shácuanaca cha tojaměse, ndegombre tšěngaftangbiámna Běngbe Bětsá echanjama entšayá chašmotsábomnama, jentšanga nje batšá Běngbe Bětsábeñe ošbuáchiyęnga! ³¹ Ndoñe šmattsenócochinýena, měntšá jtsicháměse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichětjo ca?’ ³² Chě soyęngama, chě Běngbe Bětsábioye nduabuátmęnga mondbětsenocochinýena, pero tšěngaftanga ndoñe. Tšěngaftangbe Taitá, Běngbe Bětsá, ndayá cmojtsějabotama endětatsęmbo. ³³ Chíyeca, tšěngaftangna natsana šmochjshétseboše Běngbe Bětsá tšěngaftangbe ainaniñe chaotsemándama y lempe ntšamo cha tojamandacá šmochtsama. Chca šmojaměse, Běngbe Bětsá lempe ntšamo cmojtsějabotcá cmochanjátšataye. ³⁴ Ndoñe matenócochinýenana ndayá yěfse yochjochnęngama. Yěfse luare cochántsebomna chě soyęnga jinýama y jamama. Cada tescama endbětsemna yapa totcá soyęnga jájandmanama ca” —Jesús tojánayana.

7

*Ndoñe ntsichámuana chě inýenga tšabá o ndoñe tšabá tmonjamama
(Lc 6.37-38, 41-42)*

1 “Ndocá ínÿengbiana šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. ² Chë ntšamo tšëngaftanga ínÿengbiana šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiana chë ntšamo šmojamama echántichamo. Y ntšamo ínÿengbioye chašmojábiama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiama.

³⁻⁵ “Nderado canÿa chabe bominyiñe canÿe niñëfja tojtsebomñese, cha ndoñe ntsobenana chabe catšata jauyanama: ‘Acbe bominyëntšana canÿe polvështema jtsebuchjátsécama šmolesenciá ca’. Natsana cha bontsemna cachabe bominyëntšana chë niñëfja jtšenobuchjátsécana tšabá jinÿama jobenayama, chabe catšatbe bominyëntša polvështema jtsebuchjátsécama. Cachcá entsemna acbiama, ¡bacna entšá chë ntšamo ndegombre tcojuabnacá ndinÿinÿnayá!, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

⁶ “Chë Bëngbe Bëtsabe soyëngama josértama ndëboše entšanga ndoñe šmattsabuayiynaye. Aíñese nántsemna mo chë Bëngbe Bëtsabe

bëts yebnoca uátsëmbona mëntsena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtëmënga cotšëngbioye cuaftsëtsancá, chënga nÿe jtsebotájayana ca” —Jesús tojánayana.

Smochjotjañe, smochjáanguango y smochjachembo

(Lc 11.9-13; 6.31)

⁷ “Smochjotjañe y Bëngbe Bëtsá cmochanjátstaye; smochjáanguango y smochanjínÿena; smochjachembo y bëšáša cmochanjébëtafjo. ⁸ Er ndánaca tojtsotjanañá, jójëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

⁹ “¿Ndëmuanÿe boyabása tšëngaftanguentsá, canÿe tandëše chabe uaquiñá tbojtsotjanañe ora, canÿe ndëtsbé chábioye buanjatstaye?

¹⁰ ¿O canÿe mëtscuaye buanjatstaye, beona tbojtsotjanañe ora? ¹¹ Y chca, tšëngaftanga, bacna soye amënga, tšëngaftangbe basetëmënga tšabe soyënga jatšatayama šmojtsamanëse, jmás tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátstaye!

¹² “Inÿengaftaca šmochtsama ntšamo chë ínÿënga tšëngaftangaftaca chamotsamama šmojtsebošcá. Chca endmëna ntšamo Moisesbe leyinë y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

Chë base utëntsá bëšáša
(Lc 13.24)

13 “Chë base utëntśá bëshásajana šmochjámashjna. Chë utëntśá bëshásajana y chë paselo jóyename benache, infiernoje cmochanjuánatse y banga chëjana mondámashjuana. 14 Chë tśabe vida binÿnoye jamna base utëntśá bëshásajana endmëna y ndoñe paselo jóyename benache, y chiñe báseftanga mondbínÿena.

Chë Bëngbe Bëtsabe ndoñe ndegombre juabna oye-buambnayënga
(Lc 6.43-44)

15 “Cuedado šmochtsebomna chë Bëngbe Bëtsabe ndoñe ndegombre juabna oye-buambnayëngbiana. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tśátjaye tjañe quešëngcá. 16 Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátatabiana, ni higuëbé cardo betiyentsana. 17 Chca, nÿetsca tśabe betiyiñe tśabe soye jashájonana; y chë ndoñe tśabeshiñna podesca soye. 18 Canÿe tśabe betiyiñe quenátopodena podesca soyënga jashájonana, ni canÿe ndoñe tśabe betiyiñe tśabe soyënga jashájonana. 19 Ndaye betiye podesca shajuanëshe jtseshatëtšana y iñoje jtsatmetšana. 20 As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

Bëngbe Bëtsabe amëndayoye ndoñe nÿetscanga jamashjnana
(Lc 13.25-27)

21 “Ndoñe nyetscanga chë ‘¡Utabná! ¡Utabná ca!’ atše šmojsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna aíñe. 22 Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, áceñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentsana fsëndëtabocana, y ácbeyeca bëts soyënga fsëndama ca.’ 23 Chora atše chanjójuaye: ‘Ndocna te checbaisëbuátmana. Atšbentsana mojuánanga, bacna soye ama entšanga ca’ ” —Jesús tojánayana.

Chë uta ucuatjoniñe

(Mc 1.22; Lc 6.47-49)

24 “Chcasna, nda atše šojoyeuná y chë ntšamo sëntsichamcá tojtsama, endmëna mo canye tšabá juabnaye boyabasacá. Chë boyabásana ndëtšbeñe chabe yebna yojajebó. 25 Uaftena yojúashjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtšbeñe inajéboyeca. 26 Pero nda atšbe palabra tojouena y ntšamo sëntsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebó. 27 Uaftena yojúashjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

28 Jesús chë soyënga jóyebuambayama tojanpochocá ora, chë entšanga ojnánänënga imojtsemna ntšamo cha tojánabuatambama.

29 Jesús tojanabuatambá nyets obenánaca, mo canya mando bomnacá y ndoñe nye mo chë ley abuatambayëngcá.

8

Jesús, canya bacna nguayanánaca šocábioye tbojanshná

(Mc 1.40-45; Lc 5.12-16)

¹ Jesús tjoicana tojtantsmá ora, ba entšanga tmojanasto. ² Chora canye boyabása bacna nguayanánaca šocá Jesúsbioye tojanobeconá, chabe delante yojoshamentšiyeye y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

³ As Jesús tojanacuenyanëjaná, chë boyabásabioye tbojánbojajo y tbojaniyana: —Aíñe, sëntseboše. Socana chotsebojuaná ca.

Y cachora chabe šocana tbojtsanóbojuanañe. ⁴ Jesús chë shnanábioye tbojaniyana: —Mouena, ndocnábeñe cattsecuéntaye; nye chë Jerusalenoca báchnëbioye motsa, y cha cochjinjinyiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatsšëmbona mora aca ya ndoñe šocá contsemnama ca —Jesús tbojaniyana.

Jesús canye Romano soldadëngbe amëndayabe bochichnayábioye tbojanshná

(Lc 7.1-10)

⁵ Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama.

⁶ Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsoběsná ca.

⁷ Chora Jesús tbojanjuá: —Cha jáshnama chanjá ca.

⁸ As chě soldaděngbe aměndayá tbojaniyana: —Señor, atše merecido taitatobuajoñe atšbe yebnentše chacuamashěnguama; nýe mayana y atšbe bochichnayá tšabá echántsatsmēna.

⁹ Atšbioye mándayěnga atše sěndábamna y átšnaca soldaděngbe aměndayá sěndmēna. Atše canýe soldado stjauyana “motsa ca”, cha cachora jana; y inýa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chě soye jamana ca —cha tojánayana.

¹⁰ Jesús chca tojanuena ora, tojanenjaná y chě ústoněnga tojanéyana: —Ndegombre cběyana, ni mo nýets Israelentše ni canýa quem boyabasacá Běngbe Bětsábeñe nýetšá ošbuachiyá chiyátinýena. ¹¹ Y šcuayana, shinýe bocanoicana y shinýe uenatjěmbambanoicana bětscá entšanga mochanjabo, y Abraham, Isaac y Jacob, chě judiěngbe tempsca uámana běts taitángaftaca mochanjotbiama Běngbe Bětsabe aměndayoca, cánýiñe juasama. ¹² Ba Israeloca entšanga, chě nděmuanýengbiama Běngbe Bětsabe aměndayana natsana yochtsanmēna, chocana mochantěbuacana chě nděbinýna luaroye, infernoye. Chentše puerte mochanjenóbošachna y chě tsetšanama

juatsašënga mochantsenoftëšjojnaye ca –Jesús tojánayana.

¹³ Chora Jesús chë soldadëngbe amëndayábioye tbojanianyana: –Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnyá tšabá yojtatsmëna.

*Jesús, Pédrëbe uambén mamábioye tbojanshná
(Mc 1.29-31; Lc 4.38-39)*

¹⁴ Chentšana Jesús, Pédrëbe yebnoye tojána. Chentše Pédrëbe uambén mamá šocá calentóracá yojtsejutsnajona. ¹⁵ Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontsé chënga jobuácuedana.

*Jesús ba šoquënga tojanashná
(Mc 1.32-34; Lc 4.40-41)*

¹⁶ Chë te jaibétatama ora, Jesús yojtsemnoye banga bacna bayëjëngbe juabna uambaye entšanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná.

¹⁷ Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

*Chë Jesús juastama bošënga
(Lc 9.57-62)*

¹⁸ Jesús tojánanÿe mallajta entšanga chabe shëconana; as tojanmandá uafjajónaye chenguana jama. ¹⁹ Chorna, canÿe ley

abuatambayá Jesúsbioye tbojanobobeconá y tbojanianyana: —Buatëmbayá, atše sëntseboše aca juastama, ndëmoye chacojtsá choye ca.

²⁰ As Jesús tbojanianyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

²¹ Chora inya, cach uatsjendayënguentšá, Jesúsbioye tbojanianyana: —Bëngbe Utabná, šmoleenciá atšbe taitá chjshesabotbontsañe ca.

²² Chora Jesús tbojanjuá: —Nye šmasto. Chë Bëngbe Bëtsabiamama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

Jesús chë binÿia y chë béjaye bonguana yojëtsbema

(Mc 4.35-41; Lc 8.22-25)

²³ Chentšana Jesús canÿe barquëshoye tojánamashëngo y chabe uatsjëndayënga imojtsetjëmbambnaye. ²⁴ Ndeolpe tša jabuache binÿia chë uafjajónaye béjayiñe yojóshjango; nÿetšá jabuachana yojtsemna, chë olëshënga barquëshama imojtsëtsbotsana. Y Jesús chora inëtsomañe. ²⁵ As chabe uatsjëndayënga tmojána Jesús jetsefšenama y tmojanianyana: —¡Bëngbe Utabná, šmatsebacá. Montsenatjëmbambana ca!

²⁶ Chora Jesús tojanëyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojaněyana y tojantsbaná. Chora tojanmandá chë binjia y chë búyeshe bonguana chaotsatsmënema, y lempe natjémbana yojsatsmëna. ²⁷ Chabe uatsjédayënga ojnánánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binjia y chë búyeshe tmonjoyeuná ca.”

Chë Gadara luaroca entsata, bacna bayëjbe juabna uambayata

(Mc 5.1-20; Lc 8.26-39)

²⁸ Jesús uafjajónaye chenguana tojánashjango, canye luare Gadara ca uabáinentše. Chorna chë utabuantsánëngbentšana útata, bayëjbe juabna uambayata, tbojánbocna y Jesúsbioye tbojanobobéconata. Puerte tsatjayata ibnamna, chíyeca entsanga ndoñe ntsobenana chëjana jtsachnějuanana; ²⁹ y chora tbojanontsé chë bacna bayëjëngbeyeca mëntšá uayebuáchana: —¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

³⁰ Chentša béconana ba cotsënga imnajena y chënga imnétsosañe. ³¹ Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotsëngbeñe fchayamashjna ca.

³² Y Jesús tojaněyana: —Motsajna ca.

Chora chë bayëjënga chë boyabásatbentšana tmojésanbocana y chë cotsëngbeñe tmojánamashjna; cachora chë cotsënga batsjocana penëšëjana uafjajónayoye imojtsoshbuetše y yojsatajajo.

³³ Chora chë cotšënga anÿenënga tmojtsanacheta, y chë puebloye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca. ³⁴ Chora nÿetsca entsanga chë pueblentšana tmojánbocana y Jesús yojtsemnoye tmojána. Chë entsanga Jesús tmojáninÿe ora, tmojanimpadá chë luarentšana chaueseboचना.

9

Jesús, canÿe jama ndobenábioye tbojanshná (Mc 2.1-12; Lc 5.17-26)

¹ Chca tojanopasá chentšana, Jesús canÿe barquëshoye tojánamashëngo, uafjajónaye chenguana tojána y cachabe puebloye Capernaumoye tojtanashjango. ² Chora, canÿe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninÿe chënga tša imojtsošbuáchema chë šocábioye jáshnama cha bétsobenama; as chë šocábioye tbojaniyana: “Sobreno, añemo matsca; acbe bacna soyënga tcbontseboperdoná ca.”

³ Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafjoyenguangcá entsemna ca.” ⁴ Pero Jesús yojtsetátšëmbo ntšamo chënga imojtsejuabnaycá; chíyeca tojanëyana: “¿Ndáyeca nÿetšá bacna juabnënga ainaniñe šmojtsebomna ca? ⁵ ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o

‘Matëtsbaná y motsa ca’? ⁶ Atse cbochanjínjányiye ntšamo chë Bëngbe Bëtsá Entšá tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanéyana.

As chë jama ndobenábioye tbojaniyana: “Matëtsbaná, acbe tjuashe mesocñe y acbe yebnoye motsatoñe ca.”

⁷ Chorna chë jama ndobená tojtantsbaná y cachabe yebnoye yojtsatoñe. ⁸ Chca tmojáninýama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

*Jesús, Matéobioye tbojanchembo chabuastama
(Mc 2.13-17; Lc 5.27-32)*

⁹ Jesús chentšana tojtsanoñe y canýe entšábioye tbojáninýe, Mateo ca uabainá, chë Romocama impuesto entšángbioye atjanayentše inétsobemañe. Chora Jesús tbojaniyana: “Smasto ca.” As Mateo chentšana tojëftsantsbaná y tbojanasto.

¹⁰ Jesús cach Mateobe yebnentše yojtseye ora, banga Romocama impuesto entšángbioye atjanayënga y ínýenga bacna soye amënga tmojánashjajna y mesëshentše Jesús y chabe uatsjëndayëngaftaca imojotbiama. ¹¹ Chë fariseunga chca tmojáninýe ora, Jesusbe uatsjëndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

¹² Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë šoquënga aíñe. ¹³ Smochjá

y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrenguiñe:

Atše sëntseboše tšëngaftanga lastemadënga chašmotsemna,

y ndoñe nÿe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

Jesús tmojantjá chë Bëngbe Bëtsáftaca jencuëntama tondaye saytescama

(Mc 2.18-22; Lc 5.33-39)

¹⁴ Chentsana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

¹⁵ As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentsana mochantsánatseñe; chora cocayé chë ófjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

¹⁶ “Ndocná canÿe uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanëcanana, y chca chë uátanëcniñe

más bētsiñe jtsabemana. ¹⁷ Y cach ndoñe chē tojtseshayana vínoye tanguá jasabenguiñe ntjataftsuámayana. Tcojuaftsuamasna, chē jasabenga jtseshébēfjuana y chē vínoye jtsabuáshanana, y chē vínoye y chē jasabenga tondayama ntjatoservénana. Chíyeca comna, chē tojtseshayana vínoyna tsēm jasabenguiñe juaftsuámana; y chca, chē jasabenga y chē vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma
Jairēbe bembetema cháuatayenama
(Mc 5.21-43; Lc 8.40-56)*

¹⁸ Jesús entšanga yojtsētsētsnantscuana, chē judiēngbe enefjuana yebnentša canye mandayá tojánashjango y Jesusbe shecuatšentše yojshamentšiye. Chē mandayá tbojanianyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

¹⁹ Chentšana Jesús y chabe uatsjéndayēnga chē mandayá tmojanasto. ²⁰⁻²¹ Imojtsaye ora, canye shembása stētšoicana Jesúsbioye yojobeconá. Bnētsana uta uatama oboftjajuanánaca cha inapadecena. Chē šocá Jesúsbioye yojobeconá ora, yojtsejuabnaye: “Masque nye mo chabe entšayá sibiájua chaijuábojajo, salud chantinýena ca.” Chentšana chē šocá Jesusbe entšayá tojanábojajo.

²² Tojanábojajo ora, Jesús tojanobuértana, chē shembásabioye tbojáninýe y tbojanianyana: “Añemo matsca, shembása. Bēngbe Bētsábeñe icošbuachéyeca, mora tšabá contsatsmēna ca.” Y cach orscana cha tšabá yojtsatsmēna.

²³ Chënga tmojtëtanontsé ayana y chora chë mandayábioca chënga tmojánashajjna. Chentše Jesús tojánanÿe, ínÿengna chë veloriana imojtsanflautaye y ínÿengna tša imojtsošachiye. ²⁴ Chora Jesús tojanëyana: “Muentšana mobocnënga. Chë shembásetema cabá ndoñe obaná quenátsmëna; nÿe endëtsomañe ca.”

Pero chë entšanga Jesúsbioye nÿe imojtsáfchaye. ²⁵ Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacushache y cachora chë shembásetema tojtantsbaná. ²⁶ Y nÿets chë luarëjana ndayá Jesús yojamama nÿetsca entšanga imojátatšëmbona.

Jesús uta jtanata tojanashná

²⁷ Jesús chentšana tojëftsanbocna ora, uta jtanata tbojanasto y mëntšá ibojtsaiuáyebuache: —¡Davídbentšana Entšá, bëndata šmotsalastemá ca!

²⁸ Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

²⁹ Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

³⁰ Y cachora jinÿama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

³¹ Pero chata chentšana tojëftsanbocna y cachora tbojanontsé ndayá Jesús chátaftaca tojanmama nÿets chë luarëjana jacúntana.

Jesús, canye ndëbiábioye tbojanshná

³² Chë jtanata ibojtsebocanëntscuana, básefta entšanga canye ndëbiá, bacna bayëjbe juabna uambayá, Jesúsbioye tmojanamba. ³³ Jesús chë bacna bayëja chábentšana tbojtanábocna y cachora chë ndëbiá tojtanontsé oyebuambnayana. Entšanga ojanánënga imojtsichamo: “¡Ndocna te Israelentše chca bëts soye chemuáisinye ca!”

³⁴ Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojatštá chë bayëjënga entšángbentšana jtëbuacanama ca.”

Jesús entsangbiana tbojanongmé

³⁵ Jesús nýetsca pueblënguëjana y luarënguëjana yojtsachnëjuana y chë judiëngbe enefjuana yebnënguenache entšanga yojtsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nýetsca šocanëngama y tsetšanama yojánashnaye. ³⁶ Y chë entšanga tojánanyë ora, puerte tbojanongmé. Er chënga imojtsemna mo abuajënýa ndbomna oveshëngcá, puerte uamëntšnayënga ba soyëngama padecena causa, y chaújabuachama ndocná ntsebomncá. ³⁷ Chora chabe uatsjëndayënga tojanëyana: “Canye bëts jajañe bëtscá játbanama entsemna, pero peonga nýe báseftanga. Cachcá quem luarentše, bëtscá entšanga Bëngbe Bëtsábioye nduabuátmënga montsemna, y chëngbioye chabiana abuayiynayënga nýe báseftanga. ³⁸ Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe

Bëtsábioye moimpadanga ba abuayiynayënga chauichamoma, quem entšanga chábioye chamúbuajama ca” —Jesús tojanéyana.

10

Jesús chë bnëtsana uta uatsjëndayënga tojanabacacá

(Mc 3.13-19; Lc 6.12-16)

¹ Chentšana Jesús tojánachembo chabe bnëtsana uta uatsjëndayënga, y obenana tojanatsatá bacna bayëjëngbe juabna entšángbentšana jtabocnama y nÿetsca šocanëngama y tsetšanama jashnayama.

² Chë bnëtsana uta uatsjëndayënga mëntsá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; ³ Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo; ⁴ Simón, chë celote ca uabobainá y Judas Iscariote, chë uayayëngbe cucuatšiñe Jesúsbioye boshjuaná.

Jesús, chabe bnëtsana uta uatsjëndayënga tojanichamó, Bëngbe Bëtsabe amëndayama jábuayenama

(Mc 6.7-13; Lc 9.1-6)

⁵ Jesús chë bnëtsana uta boyabásenga tojanichamó chë tšabe noticiënga entšanga jabuátambama, y mëntsá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. ⁶ Nÿe Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente

nduabuatma causa. ⁷ Smochjá y entsanga smochjábuayenaye Bëngbe Bëtsabe amëndayana echanjóshjanguama. ⁸ Chë šoquënga smochjáshnaye, smochjama chë obanënga chámuatayenama, bacna nguayanánaca šoquënga smochjáshnaye y bacna bayëjëngbe juabna entsángbentšana šmochtábocna. Chë obenana šmonjójyëngacñe tondaye ntjëtsjajuacá; cachcá, chë soyënga šmojtsamama tondaye entsanga šmattsayëngacaye.

⁹ “Ndoñe šmattsambaye crocénana uasnanëchiñe. ¹⁰ Ni shecnaja sanaca benachiñama, ni inye entsáyá jtse nomódama, ni shecochëtjonëshënga, ni jatjonëfja, er chë tšabe trabajayá jtse merecénana ntšamo tbojtsajabotcá jójyëngacñama.

¹¹ “Nderado canye bëts pueblentše o base pueblentše chašmojášhajna ora, smochjánguango canye tšabe entsá, ínÿengbioye ndaingñayá, y chabe yebnentše šmochtsoquedañe, inye puebloye játantscuana. ¹² Canye yebnoye chašmojámashjna ora, nyetsca chentša oyenënga mëntšá smochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ ¹³ Chë yebnentša entsanga ainaniñe tšabe ebionana jtse bomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nye cach tšëngaftangaftaca chaotsonñe. ¹⁴ Y nderado canye pueblentše o bëts pueblentše chë entsanga ndoñe tcmonjúbuaja y ndoñe tcmonjóyaunase, chentšana smochjésebecana y chë shecuatšentša polvëshe smochjésenstoto.

Chca, chë entsanga mochántsetatsëmbo chënga tšëngaftangaftaca ndoñe tšabá tmonjamama. ¹⁵ Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsanga Bëngbe Bëtsá puerte jabuache echantsacastígaye, y chë bacna entsanga Sodoma y Gomorra luaroquëngna ndoñe nÿa nÿetsá jabuache queochatacastígaye ca” —Jesús tojánayana.

Ntsamo chë uatsjéndayënga mochjansúfria

¹⁶ “Smochjouena. Atse cbontsachamná mo oveshënga cuenta tjañe quešëngbeñe. Chíyeca studio bomnënga mo mëtšcuayëngcá šmochtsemna y uamanënga mo palomatemëngcá. ¹⁷ Entšangbiana cuedado šmochtsebomna, chëngbe pueblentša amëndayëngbe cucuatšiñe tšëngaftanga cmochanjábashejuana y chëngbe enefjuana yebnënguenache cmochanjátsetšenaye. ¹⁸ Atšbe ústonënga bétsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntsamo atšbiana šmotatsëmbcá jóyebuambayama. ¹⁹ Pero chë mandadëngbe cucuatšiñe chacmojábashejuana ora, ntsamo o ndayá šmochjayanama ndoñe šmattsenócochinÿena. Chca orna, Bëngbe Bëtsá tšëngaftanga cmochanjabuayená ntsamo o ndayá jóyebuambayama. ²⁰ Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyebuambnaye.

21 “Y canye entsá cachabe catsátbioye uayayëngbe cucuatšine bochanjáboshjona chamotsóbama; y canye taitá cachabe uaquiñábioynaca. Y chë básenga chëngbe bëtsëtsangbe contra mochántsemna y uayayëngbe cucuatšine mochanjábashesjuana chamotsëbáyama. 22 Tsëngaftanga atšbe ústonënga bëtsemnama, nyetsca entsanga cmochantsëbuayënja; pero nda nyets tempo átšbeñe ošbuachiyá chaotsomñá, atsbocaná echántsemna. 23 Canye pueblentse chacmojsëcamena ora, inye puebloye šmochtsacheta. Ndegombre cbëyana, Israelentša nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

24 “Ni canye uatsjendayá chabe bu-atëmbayabiama más uamaná ntsemnana, ni chë oservená chabe nduiñbiama más uamaná. 25 Chë uatsjendayá ya cachabe buatëmbayacá jtsemnama tojashjáchëse, ndayá más nanjátsboše. Cachcá endmëna chë oservenáftaca, cachabe nduiñcá tojtsemnëse. Atšë sëndmëna mo canye yebnentša taitacá y tsëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntsamo chënga tsëngaftanga cmochtsëbobuatma ca?” —Jesús tojanëyana.

Nda ndegombre cuantsebiauatja

(Lc 12.2-7)

26 “Chíyeca entsangbiama ndoñe matau-atjëngana. Chë yoiytëmena soyentsana tondaye ntjinycá queochaisoquéda, y chë ndótatsëmbo

soye, ntsotatsšëmbcá queochaisoquéda. ²⁷ Chë mora cbontsëtsësná soyënga, chë entsangbiana mo ibetiñe cuaftsemncá soyënga, tsëngaftanga šmochjama entsanga botamana chama chamotsetatsšëmbuama. Y chë iytëcana cbontsëtsësná soyënga nyëtsca entsanga šmochtsabuayiynaye, mo nda canye yebnentša tsbanánocana noticiënga tojtsayebuachcá. ²⁸ Ndoñe matauatjëngana nye chë tsëngaftangbe cuerpo japochócama imobenëngbiana y ainana jtsepochócama ndoñe ntsobenana. Más šmochtsebiauatja chë nda endobena tsëngaftangbe cuerpo y tsëngaftangbe ainana jtsepochócama, nyëtsca tescama infernoca.

²⁹ “Uta jaja shloftšetémata nye canye denario crocenánama mondbétsena. Masque chca, ni cányetema obanatema fshantsoye jotsatsana, tsëngaftangbe Taitá, Bëngbe Bëtsá ndoñe tontsebošëse. ³⁰ Y tsëngaftangbiana, Bëngbe Bëtsá botamana jtsantješnana, y chca, cha lempe tsëngaftangbiana jtsetatsšëmbuana, bueta stjënashënga tsëngaftangbe bestšašinë yomnámna. ³¹ Chiyeca ndoñe matauatjëngana, tsëngaftanga ba jaja shloftšetëmëngbiana corente más šmonduámana ca” —Jesús tojánayana.

Ndabiana Jesucristo yochjanya chabe entsá yomna ca

(Lc 12.8-9)

³² “Nda atsbe entsá yomna ca entsangbe delante tojayanabiana, átsnaca, atsbe Taitá, chë celoca endmënabe delante chanjanya cha atsbe entsá yomna ca. ³³ Pero nda entsangbe delante

atšbe entšá ndoñe yondmëna ca tojayanabiama, átsnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” —Jesús tojanëyana.

*Jesusbe causa, entsángbeñe más jtsentsjanayana
(Lc 12.51-53; 14.26-27)*

³⁴ “Ndoñe šmattsejuabnaye atše quem luaroye tijabo nyetsca entsanga natjëmbana chamotsiyenama. Atše chama ndoñe chiyátabo; atše sënjabo causa, entsanga más mochántsejtsjanaye. ³⁵ Atše sënjabo chë uaquiñá cachabe taitabe contra chaotsemnama, chë bembe cachabe mamabe contra y chë bebinuá chabe uambén mamabe contra chaotsemnama. ³⁶ Y chca, ba entsangbe uayayënga cachëngbe pamíllanga mochántsemna.

³⁷ “Nda cachabe taitá o mamábioye atšbiamá más tbojtsebobonshánëse, cha ndoñe ntsomerecénana atšbe entšá jtsemnama. Nda cachabe uaquiñá o bémbëbioye atšbiamá más tbojtsebobonshánëse, cha cach ndoñe. ³⁸ Y nda nyetsca chabe quem luare soyënga ndoñe tonjëseboshjona atše juastama, y atšbiamá jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnama. ³⁹ Nda tojtsentšena quem luarentše bëtscá soyënga jtsebojnana y atšbiamá jasúfriama ndoñe tontseprontana, chë nyetsca tescama yomna tsabe vida echanjobuetše. Pero nda quem luarentša soyënga cachcá tojesonýa atše juastama, masque chaóbana, chë nyetsca tescama yomna tsabe vida echántsebojnana ca” —Jesús tojánayana.

Chë uacanana soyënga
(Mc 9.41)

40 “Nda tšëngaftanga chacmojúbuaja, átsnaca cha šochanjofja; y nda atše chašojofja, chë nda šojichmóbioynaca cha bochanjofja. 41 Nda canyë Bëngbe Bëtsabe juabna oyebuambnayábioye tbojoyeuná, cha chca bétsemnama, chábioye Bëngbe Bëtsá canyë uacanana soye bochántatšetaye, mo cach Bëngbe Bëtsabe juabna oyebuambnayabe uacanana soycá. Y nda canyë nýetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canyë uacanana soye bochántatšetaye, mo cach nýetsca soyënguiñe tšabá amabe uacanana soycá. 42 Y ndánaca, tšëngaftanguentšá canyë nduamanábioye masque nýe mo base búyeshtema tbojuabuatšetá, atšbe ustoná bétsemnayeca, ndegombre Bëngbe Bëtsá canyë uacanana soye chábioye bochántatšetaye ca” —Jesús tojánayana.

11

Juan chë Ubayanabe ichmónënga
(Lc 7.18-35)

1 Jesús tojanpochocá chabe bnëtsana uta uatsjëndayënga jábuayenama, y chentšana tojtsanoñe chë luariñe pueblënguenache oyena entšanga Bëngbe Bëtsabe palabra jabuátambama y jábuayenama.

2 Chë tempo Juan chë Ubyaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, 3 mëntšá jatjayama: —¿Aca

ndegombre cojtsemna chë jabama ibojanmëná, chë Uámana Uabuayaná, o šojtsamna ínÿabiama jatobátmama ca?

4 Chca tmojantjá orna, Jesús tojanéjua: —Smochjá y Juan šmochjauyana ntšamo šmojouena y šmojinÿcá. 5 Cha šmochjacuénta: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbomnějémëngbioye chë tšabe noticiënga montsabuayiyná ca. 6 ¡Puerte oyejuayá chaotsemna chë nda atše bacna soye ndoñe stsama ca jtsejuabnaye, átšbeñe ošbuáchiyana ndoñe tontsajbaná cha ca! —Jesús tojanéyana.

7 Chënga tmojtsatanoñe ora, Jesús tojanontšé Juanbiamá chë entsanga jáuyanana, mëntšá: “Juan jinÿama šmojánbocana ora, ¿ndayá jinÿama chë entsanga ndoyena luaroye šmojánbocana? ¿Canÿe entšá ainaniñe tondaye añemo ndbomná, mo canÿe šëše bínÿiaca shatiyeynëšcá? 8 Y ndóñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondétatsëmbo chë boyabásenga uámana entšayaca bopormánëngna chë mándayëngbe yebnënguiñe mondbétsiyenama. 9 Y asna, ¿ndayama choye šmojánbocana? ¿Canÿe Bëngbe Bëtsabe juabna oyebuambnayá jinÿama? Ndegombre, aíñe; y cbëyana, ndegombre cha canÿe Bëngbe Bëtsabe juabna oyebuambnayabiama más bëtsá endmëna. 10 Cha, Juan, endmëna ndabiamá Bëngbe Bëtsá chabe

uabemana palabrënguifne tojánayana mo chabe ichmonacá, mëntsá tojánayana ora:

Cristo, atsbe entsá natsana sënjichmó acbiama chaóyebuambama,

entsanga jábuayenama aca jabama ainaniñe tsabe juabnëngaca chamotseprontánama ca.

¹¹ Ndegombre chëyana: Nyets tempo entsángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batśá uamaná, más bëtsá echántsemna ntšamo mora Juan yomnama.

¹² “Juan chë Ubayaná tojánabo orscana mëntscoñama, bëtsca entsanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nyets añémoca montseboše chë mándayana jtsepochócama. ¹³ Juan candabëntscuana, nyetsca Bëngbe Bëtsabe juabna oyebuambnayënga y Moisesbe Ley nÿe Bëngbe Bëtsabe amëndayama tmonjanobuambá. ¹⁴ Y tsëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. ¹⁵ Chë jouenama tmojtsobenënga, chamouena ca” —Jesús tojánayana.

¹⁶ Mëntsánaca Jesús tojánayana: “¿Ndayacá morsca entsanga imomna? Chënga mondmëna mo chë plazëngoca mondbetsetbiámana basetemëngcá; chënga chëngbe enutëngbioye jtsayebuáchana ¹⁷ y mëntsá jtsichámuana: ‘Tsëngaftangbiamama fsënjaflautá y ndoñe chešmatslantsá; ngmënaca fsënjaversiá y ndoñe chešmatošachna ca.’ ¹⁸ Juan tonjánabo,

y bĕtsá entšángbeñe ndoñe quenjatamana ni jasana, ni jofšiyana, y entšanga montsanichamo chana bacna bayĕjbe juabna uambayá yojamna ca. ¹⁹ Morna, chĕ Bĕngbe Bĕtsá Entšá tbojanbemá tonjabo, y chana aiñe entsamana bĕtsá entšángbeñe jtseyayana y jtsofsĕšnayana, y entšanga montsichamo chana yapa uasayá y vínoye tmoyá entsemna ca y Romocama impuesto entšángbioye atjanayĕnga y bacna soye amĕngbe amigo ca. Pero Bĕngbe Bĕtsá endbĕtsinĕyanĕyaye cha nĕyets osertánana bomná yomnama, chĕ ndayá cha tojama ora ndayá chentšana tojóbcna soyĕngaca ca” —Jesús tojánayana.

Chĕ nduauenana entšanga

(Lc 10.13-15)

²⁰ Chentšana Jesús tojanontšĕ jucácanana chĕ entšanga, ndĕmuanĕynga imojoyena chĕ publĕnguiñe ndayenache ba chabe bĕts soyĕnga tojanma, chĕnga bacna soyĕnga amana ndoñe tmontsanajbanama y Bĕngbe Bĕtsabe benache ndoñe tmontanishachama. Mĕntšá yojtsichamo: ²¹ “¡Tša lastema, Corazín puebloca entšangbiama! ¡Tša lastema, Betsaida puebloca entšangbiámnaca! Chĕ chentše sĕnjama bĕts soyĕnga, Tiro y Sidón bĕts publĕnguentše matĕnjochnĕnguse, chentša bacna entšanga ya tempo ngmĕnaca matmĕtenojuabó chĕngbe bacna soyĕngama y Bĕngbe Bĕtsabe benache matmĕntishache; y chca tmojamama chaotsótatsĕmbuama uajojĕsha entšayangaca matmĕntopormanga y chĕngbe bestšašaiñe jatinyá matmĕnjenotbótoto. ²² Pero ndegombre cbĕyana, ntšamo entšanga tmojamama, tšabá o ndoñe

tšabá bétsemnama jayanama chaojobuache ora, tšëngaftanga más bëtš castigo šmochántsebomna, chë Tiro y Sidonoca bacna entšangbe castiguama. ²³ Y tšëngaftanga, Capernaumoca entšanga, ĵšmojtsejuabná celóntscoca atsebánanënga šmochtsemna ca? ĵChë uabouana infernoye cmochantsësetjango! Chë muentše sënjama bëtš soyënga Sodomoca matënjochnënguse, choca entšanga ya tempo ngménaca chëngbe bacna soyëngama matmëntenojuabó y Bëngbe Bëtšabe benache matmëntishache, y chë bëtš pueblo cabá cachcá mëntscuana mantsomñe. ²⁴ Pero ndegombre cbëyana, quem luare jopochócama te, Bëngbe Bëtšá puerta jabuache cmochantsacastígaye, y chë Sodoma luaroca entšángbiye ndoñe nyëtšá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”
(Lc 10.21-22)*

²⁵ Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nyë batšá tatšëmbënga tcojanÿanyé, chë tša tatšëmbënga y osertánëngbiamá tcojaiytëme soyënga. ²⁶ Aíñe, chama cbontsadorana, Taita, chca chaotsemnama tcojábošenayeca.

²⁷ “Atšbe Taitá lempe chca šonjatštá. Chë Uaquiñábíoye ndocná corente quebnatábuatma; nyë chë Taitá aíñe. Y chë Taitábíoye ndocná corente quebnatábuatma; nyë chë Uaquiñá aíñe, y ndábíoye chë Uaquiñá tojtseboše nda chë Taitá yomnama jinÿanyiyama, chánaca chë Taitábíoye bochantsábuatma.

28 “Atšbioye mabënga nÿetsca tšëngaftanga uamëntšnayënga y bëtscá trabajo uangménënga, y atše chanjama tšëngaftanga chašmochnama. 29 Ntšamo canÿe entšá, uacná yuguëšiñe juabatsëcana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentšana šmochjuatsjinÿe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna. 30 Mo canÿe uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nÿetsca soyënga jamama echántsemna ca” —Jesús tojánayana.

12

Jesusbe uatsjëndayënga ochnayté trigo tmojanátabebe

(Mc 2.23-28; Lc 6.1-5)

1 Chë tempo, Jesús canÿe ochnayté canÿe jajajana yojtsachnëjuana. Chabe uatsjëndayëngna shëntseca imojtsemna, chíyeca tmojanontšé trigo juatabebiana y chë meshënga jasana. 2 Chë fariseunga chca tmojáninÿe ora, Jesús tmojanियana: —Minÿe, acbe uatsjëndayënga canÿe soye montsama y chë soye ochnayté jamama ndoñe quenátslesenciana ca.

³ As Jesús tojanéyana: —¿Ndoñe šmëndualía y šmondétatsëmbo ndayá David y chabe enutënga tmojanmama, shëntseca imojtsemna ora? ⁴ Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inÿinÿnaye tandëšënga yojase. Chë tandëše nÿe ndánaca jasama ndoñe yonjalesenciana, ni Davidbiama, ni chabe enutëngbiama. Nÿe bachnangbiama belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca. ⁵ ¿O ndoñe šmëndualía y šmondétatsëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? ⁶ Y atše šcuayana: Muentše canÿa entsemna, cha chë Bëngbe Bëtsabe bëts yebnentša bachnangbiama más uamaná endmëna y chabe amëndayoca soyënga más entsámána chë bachnangbe mándayentša soyëngama. ⁷ Bëngbe Bëtsabe uabemana palabrenguiñe mëntšá endayana:
 Atše séntseboše tšëngaftanga lastemadënga chašmotsemna,
 y ndoñe nÿe bayënga chašmotsëbánaye Bëngbe Bëtsá jëtschuayama ca.
 Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiama. ⁸ Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá
(Mc 3.1-6; Lc 6.6-11)*

⁹ Chentšana Jesús tojtsanoñe y chentša judiëngbe enefjuana yebnoye tojánamashëngo. ¹⁰ Chentše yojtsemna canye boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canye ochnayté šocá jáshnama ca?

¹¹ Y Jesús tojanējua: —¿Nda tšëngaftanguentšá, canye oveshá tbojtsebomna y nja chë ochnayté canye fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? ¹² ¡Entšá oveshabiana puerta más uamaná endmëna! Chcasna, entselesenciana chë ochnayté tšabe soye jamama ca —Jesús tojanējyana.

¹³ Chora Jesús chë buashana buacuatše bomnábioye tbojaniyana: “Macuenyanëjaná ca.” Y chë boyabásana tojanacuenyanëjaná y chora chëtša tšabá yojtsatamna mo cach inyetsacá. ¹⁴ Pero chë fariseunga tmojésanbocana ora, tmojanontšé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá
Jesusbiana tojanayana*

¹⁵ Jesús chë soye tojántatšëmbona ora, chentšana tojtsanoñe y ba entšanga tmojanasto. Njyetsca šoquënga tojanashná, ¹⁶ y tojanamëndá chabiana entšángbeñe ndoñe chamondëtsóyebuambnama. ¹⁷ Chca tojanamëndá, cachcá chaotsemnama

ntšamo chë Bëngbe Bëtsabe juabna oyebuambnayá
Isaías tojanayancá. Cha mëntšá tojánayana:

18 Muentše atšbe oservená entsemna. Atše cha
sënjabocacá,
atšbe bonshaná, y atše corente chabiana
sëntsoyejuá.

Atše chanjama atšbe Espíritu chabe ainaniñe
chaotsemnama
y entšanga echanjabuayená, Bëngbe Bëtsá
nyetsca luarënguentsana entšangbiana
yochjayanama chënga tšabá o ndoñe tšabá
tmonjamama.

19 Cha ndoñe queochátayajuatsana, ni
queochátshembumbuana.

Chabe oyebuambnayana tsáshenañe ndocná
queochatuena.

20 Mo nda chë atcana šëse ndoñe más jatsndbem-
ana,

chë ndobenënga cha ndoñe queochátapochocaye.

Mo nda chë quinñenëfjua nje uabojátšena ua-
juinñenëfjua ndoñe ntsafsanana,

chë Bëngbe Bëtsabeñe jtsošbuáchiyama
imojtsebojátšangbe obatmanana chábeñe,
cha ndoñe queochátabuajuanaye.

Cha nyets añémoca echanjëftsetrabája,

entšanga chëngbe ainaniñe Bëngbe Bëtsabe nde-
gombre soyënga chamóyëngacñëntscuana.

21 Y nyetsca luarënguentsana entšanga chábeñe
mochantsobátmana ca —cha tojánayana.

*Fariseunga tmojánayana Jesús Satanásbentsana
obenana tojanóyëngacñe ca*

(Mc 3.20-30; Lc 11.14-23; 12.10)

22 Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínÿnama y chabuatauénanama.

23 Y nÿetsca entsanga ojnánännga imojtsichamo: “¿Mua yojtsemna chë Davídbentsána Uámana Entśá, chë Cristo ca?”

24 Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjngbe amëndayá, quem boyabásabioye obenana tbojatśtá chë bayëjnga chauatëbuacnama ca.”

25 Y Jesús yojtsetátśëmbo ntśamo chënga imojtsejuabnayama; as tojanéyana: “Canÿe amëndayentśe entsanga tmojtsenojatá y tmojtseináyase, cachënga jenpochócana. Cachcá, canÿe bëts pueblentśa entsanga o canÿe yebnentśa pamíllanga tmojtsenojatá y ndoñe tmontsenëyeunanëse, chënga ndoñe tśabá nÿets tempo quemochátśmëna. 26 Cachcá, Satanás cachabe bayëjnga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntśamo nantsobena chabe mándayana quem luarentśe jëftsebomnana? 27 Tśëngaftanga śmontsichamo atśe Beelzebube obenánaca chë bayëjnga stsatëbuacana ca; pero chca ndegombre tojtsemnëse, ¿ndábeyeca tśëngaftangbe usetonënga obenana imojtsebomna chë bacna bayëjnga jtëbuacnama? Chíyecna, chënga montsinÿinÿná ntśamo ndegombre yomnana y tśëngaftanga ndoñe ndegombre soye śmontsichámuama. 28 Y atśna, chë Bëngbe Bëtsabe Espíritbeyeca chë bayëjnga entsángbentsána sëndëtëbuacana; y chë soye entsinÿinÿná Bëngbe Bëtsabe amëndayana

tšëngaftangbioye tojóshjanguama.

²⁹ “¿Ntšamo nda nanjobenaye canye corente añemo bomna entšabe yebnoye jamashënguana y chabe soyënga jtsebocana, ndoñe natsana chábioye tconjshétsebatsëquëse? Nye tcojshétsebatsëquësna aïñe cuanjobenaye cha jefcana. Atše ya chca Satanásoftaca sënjama.

³⁰ “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

³¹ “Chíyeca cbéyana, Bëngbe Bëtsá entšanga echanjáperdonaye nyetsca chëngbe bacna soyënga y chë Bëngbe Bëtsabiama puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiama puerte bacá ichámënga.
³² Bëngbe Bëtsá bochanjaperdóna chë Cha Entšá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

Tšabe betiye o ndoñe tšabe betiye tondmënama, jtsotatšëmbuana ntšamo tojashajoncá

(Lc 6.43-45)

³³ “Canye betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatšëmbuana ntšamo chëshe tojashajoncá. ³⁴ ¡Mëtscuaye entšanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna

entsanga šmojtsemnëse? Er ndayá ainanoca becá tomnama entšá jtsóyebuambnayana.
³⁵ Chë tšabe entšá, chë ainanoca tšabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana.
³⁶ Y ndegombre cbëyana, chë entsangbiana tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca.
³⁷ Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnama ca” —Jesús tojánayana.

Chë bacna entsanga Jesús tmojanimpadá canye bëts soye chaoma, chabe obenana jinýama
(Lc 11.29-32)

³⁸ Chentsana, básefta fariseunga y Moisesbe ley abuátambayënga Jesús tmojantjá: —Buatëmbayá, bënga fsëntseboše aca canye bëts soye chacoma, acbe obenana chašcuinýanýema ca.

³⁹ As Jesús tojanëjua: —Quem puerte bacna entsanga y ndošbuáchiyënga montseboše atše canye bëts soye chaima, atšbe obenana jinýanýiyama; pero chca soye ndoñe quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá. ⁴⁰ Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjëftsemna.

41 Morsca entšanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entšanga mochanjotsaye y morsca entšangbiana mochanjayana ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiana más uamaná endmëna. 42 Morsca entšanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entšangbiana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiana más uamaná endmëna ca —Jesús tojánayana.

*Ndayá inopása chë bacna entšángaftaca
(Lc 11.24-26)*

43 Jesús mëntšánaca tojánayana: “Canje bacna bayëja canje entšábentsana tojësebocna ora, chë bayëjna bojojo luarënguenache jtsanana ndayentše jóchnama onguayiñe, y canje luare ndoñe tonjínÿena ora cha jenójuaboyana: 44 ‘Atsbe oyenoye, chë ndayentsana sënjëftsebocnoye chanjeshëcona ca’. Y choye tojtashjango orna, jinÿenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá. 45 Chorna chë bayëjna jana y inÿe canÿsëfta bayëjenga chabiana más opëjenga jobiatšana y nyetscanga choye jamashjnana chë boyabásabeñe joyénanama.

Y chca, chë boyabása tempscama más bacna entśá jtsemnana, chora chë natsanama más bayëjenga abamna causa. Morsca puerte bacna entśángaftaca cachcá echanjochnëngo ca” —Jesús tojánayana.

*Chë Jesusbe ndegombre pamillanguentsënga
(Mc 3.31-35; Lc 8.19-21)*

⁴⁶ Jesús cabá entśanga yojsëtsëtsnaye ora, chabe mamá y catśátanga tmojánashjaina y imojtseboşe Jesúseftaca jóyebuambayama. Nÿe shjoca imojtsemna; ⁴⁷ asna, canÿe boyabása Jesúsbioye tbojanbuayená: —Acbe mamá y acbe catśátanga shjoca montsemna y montseboşe ácaftaca jóyebuambayama ca.

⁴⁸ Pero Jesús chë jauenayama tojánabioye tbojanियana: —¿Nda atśbe mamá yomna, y ndëmuanÿenga atśbe catśátanga ca?

⁴⁹ Y cachora chabe cucuatşe tojanatsbaná, chabe uatsjëndayënga tojanënÿanÿé y tojánayana: —Quemënga montsemna mo atśbe mamá y mo atśbe catśatangcá. ⁵⁰ Er ndánaca, ntśamo atśbe Taitá, celoca endmëná yoboścá tojtsama, jtsemnana atśbe catśata, atśbe uabena y atśbe mamá, atśbe ndegombre pamillanguentsá ca —Jesús tojánayana.

13

*Chë jenabe cuento
(Mc 4.1-9; Lc 8.4-8)*

¹ Cach te, Jesús yebnentšana tojëftsanbocna y uafjajónaye tsachoca tojanótbema. ² Mallajta entśanga choye tmojanobeconá; as Jesús, chë

uafjajónayentše yojanamna canye barquëshoye tojánasëngo, tojanótbema; y chë entsangna tsachoca imojtsemna. ³ Chorna ba soyëngama cuentëngaca chënga tojanabuatambá.

Mëntšá tojanëyana: “Canye jená chë jénaye jaujquëshama yojëftsebocna. ⁴ Yojtsëjquëshaye orna, básefta jénaye benache juachañe yojuatquëcjana, pero chë jaja shloftšënga imojástjajna y lempe imojtsósañe. ⁵ Inye meshëngna ndëtsbenguiñe yojuatquëcjana, ndoñe yapa fshantse binýnentše. Chiña betscó yojuábocna, fshantse ndoñe jashenocana yonjanmëna causa, ⁶ pero shinye yojábocna ora, puerte yojojënyána y yojtsancta; y yojtsábojo, bëtscá tbëtëjënga tondaye causa. ⁷ Inye meshëngna uchmëshangañe yojuatquëcjana, y chë uchmëshangá yojuájua orna, lempe yojtsatscué. ⁸ Y inye meshëngna, uanganëshiñe yojuatquëcjana y puerte botamana chiñe yojuashajo: inyenache nye canye jénayentšana mo patse meshënga yojuashájona, inyeñna mo chnënguana bnëtsana meshe y inyeñna mo unga bnëtsana meshe.”

⁹ Jesús chca jacuéntama tojanpochocá ora, mëntšá tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye
(Mc 4.10-12; Lc 8.9-10)*

¹⁰ Chora chë uatsjëndayënga tmojanobeconá y Jesús tmojantjá: —¿Ndáyeca entsanga cuentëngaca cojtsabuatambá ca?

¹¹ As Jesús tojanëjua: —Bëngbe Bëtsá tšëngaftanga cmontsinýanýná nyetsca chë mo iytëmencá

yomna soyënga chabe amëndayama, pero chë ínÿengbioyna ndoñe. ¹² Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca.

¹³ Chíyeca atše cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá chë soyënga chamouena, ndoñe tšabá quemochátuenana, ni queochátësertana.

¹⁴ Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe
queochátësertana.

Masque puerte chamotsantješna, ndoñe
quemochátinÿe

¹⁵ Quem entšanga ndoñe quemátsboše botamana
jajuaboyana;

chënga uamatsáchtönënga montsemna
y chëngbe bomínÿnaca cachcá.

Chca ndóñesna, chënga muantsobena jinÿama,
jouenama y ainaniñe josértama;

y chca, chënga bacna soyënga amana
muantsajbaná y atšbe benache
muantishache,

as atše chënga chayatsebacama ca –cha
tojéftsanbema.

¹⁶ “Tšëngaftangna oyejuayënga šmochanjoyena,
er šmondobomna bominÿe y matscuašënga
Bëngbe Bëtsabe soyënga jinÿama y jouenama.

¹⁷ Ndegombre cbëyana, banga Bëngbe

Bëtsabe juabna oyebuambnayënga y nyëtsca soyënguifne tšabá amënga tmonjánbošena chë tšëngaftanga šmontsonyá soyënga jinýama, y ndoñe chemátaninýe; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanëyana.

*Jesús chë jenabe cuentama tojanabuayená
(Mc 4.13-20; Lc 8.11-15)*

¹⁸ “Chcasna, oído šmochjajajo; chë jenabe cuento mëntšá endayana: ¹⁹ Chë Bëngbe Bëtsabe amëndayama tmojouena y ndoñe tontsésertana entšanga mondmëna mo chë benache juachañe yojuatquëcjana jenaycá; Satanás jabana Bëngbe Bëtsabe palabra chëngbe ainanentšana jabétsabuajuanama, chënga chiñe ndoñe chamondëtsošbuáchema. ²⁰ Y chë ndëtšbenguifne yojuatquëcjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá; ²¹ pero ndoñe nyëts tempo chana jochochájuana, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga chëngbioye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. ²² Chë uchmëshangañe yojuatquëcjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnama yapa mochántsenojuabnaye y mallajta crocénana y ba soyënga jtsebomnama mochántseboše. Chíyeca

chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. ²³ Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyengna ínýengbiana más bëtscá soyënga mochántsama, y chca, ínýenga jtsemnana mo chë patse meshënga tojanshajo jenaycá, ínýenga mo chë chnënguana bnëtsancá y ínýengna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

²⁴ Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje. ²⁵ Pero nyetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. ²⁶ Y chë trigo yojuájua y ya yojtseshajuana orna, chë bacna shácuanënaca yojuábocna. ²⁷ As chë peonga imojá chë nduiño jauanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ ²⁸ Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’ ²⁹ Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígna ca šmattsejashtse ca. ³⁰ Más tšabana, cachcá mochjonýaye cánýiñe chaójuama, chë jaja saná

játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinÿiyama, y chentšana chë shajuana chamuatbaná y atšbe grano uaquëcjnaye yebniñe chamotsatsuamá ca'' —Jesús tojánayana.

Chë mostaztiye jenayama cuento

(Mc 4.30-32; Lc 13.18-19)

³¹ Jesús mëntsánaca tojanacuntá: “Bëngbe Bëtsabe amëndayana endmëna mo canÿe mostaza betiye jenaycá, canÿe boyabása chabe jajañe yojáje. ³² Ndegombre, nÿetsca jenayëngama chë mostaza jénaye chë más básetema endmëna, pero tojójua orna, chë jajañentše chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

Chë levadurama cuento

(Lc 13.20-21)

³³ Quem inÿe cuétnaca tojanëyana: “Bëngbe Bëtsabe amëndayana endmëna mo levadurcá; canÿe shembása chana jenájuabana unga medida arninÿañe, nÿetsana chauabochama ca.”

Ndáyeca Jesús entšanga cuentëngaca yojanabuayiná

(Mc 4.33-34)

³⁴ Jesús nÿetsca chë soyëngama lempe cuentëngaca entšanga jtsëtsëtnayana, y cuentëngaca ndóñesna ndoñe yonjanoyebuambná. ³⁵ Chca yojamna ndayá cachcá

chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:
 Jabuátambamna cuenténgaca chanjóyebuambaye;
 chanjayana chë iytëmena soyëngama y
 chë entsanga ndoñe mondétatšëmbo
 soyëngámnaca;
 Bëngbe Bëtsá quem luare tojanma orscana chë
 soyënga yomna ca –cha tojánayana.

Chë tríguañe bacna shácuana cuentama Jesús tojanabuayená

³⁶ Chentšana Jesús chë entsanga tojtanichamó y yebnoye tojtanamáshëngo. Chentšna chabe uatsjédayënga tmojanimpadá ndayá chë bacna shacuanama cuento betsayancá chauabuayenama. ³⁷ As Jesús tojanéyana: “Chë tšabe jénaye jená endmëna chë Bëngbe Bëtsá Entšá tbojanbemá, ³⁸ y chë jajañna, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entsanga, y chë bacna shácuana entsemna chë bacna bayëjëngbe amëndayabe entsanga, ³⁹ y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotëmënga. ⁴⁰ Ntšamo chë bacna shácuana jtsejashtsëtsana y iñoye jtsatmetšana jtsejuinÿiyama, cachcá echántsemna quem luare jopochócama te. ⁴¹ Chorna, chë Bëngbe Bëtsá Entšá tbojanbemá chabe angelotëmënga echanjichamuá chë ínÿenga bacna soye chamomama amënga y chë bacna soyënga amënga chabe amëndayentšana

chamotsajuanayama. ⁴² Y chora chéngbioye chë uabouana íñeshoye mochantsësetjango y chentše puerte mochanjenóbošachna y chë tsetšanama juatsašënga mochantsenoftësjojnaye. ⁴³ Chora, chë ntšamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” — chora Jesús tojánayana.

Chë fshantsiñe uaiytëmena bomnanama cuento

⁴⁴ “Bëngbe Bëtsabe amëndayana endmëna mo chë fshantsiñe uaiytëmena bomnancá. Canýe boyabása chë bomnana yojuínýena y chentšana iytëcana cachentše yojesatbontsá. Corente oyejuayá yojtá, nýetsca chabe bomna soyënga yojetsatobuiye y chentšana chë fshantse yojtobuámiñe ca” — Jesús tojánayana.

Chë corente uámana fjantse ndëtsëtémama cuento

⁴⁵ “Mo canýe entšá uámana fjantse ndëtsëtémënga obuamnañacánaca endmëna chë Bëngbe Bëtsabe amëndayana. ⁴⁶ Chana, canýe corente uámana ndëtsëtëma yojínýena ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” — Jesús tojánayana.

Chë atarraiëshama cuento

⁴⁷ “Bëngbe Bëtsabe amëndayana endmëna mo canýe atarraiëshacá, buyeshoye jutšenana y nýetsca beonga jashebuáyana. ⁴⁸ Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana

chë beonga jabocacayama; chë tsábenga sbarëquënguiñe juatsuámana y chë ndoñe tsábengna jtsëtsanana. ⁴⁹ Cachcá echanjochnëngo quem luare jopochócama tempo chaojobuache ora. Chë angelotëmënga mochanjábocana chë tsabe entšángbentšana bacna entšanga jaluárama, ⁵⁰ y chë bacna entšangna chë uabouana ñeshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftšësjojnaye ca” —Jesús tojanacuntá.

Anteo y tsëm uámana bomnana

⁵¹ Chora chabe uatsjëndayënga Jesús tojanatjá: — ¿Lempe chama quecmojtsësertana ca?

Y chënga tmojanjuá: —Arseñor, aíñe ca.

⁵² As Jesús tojanéyana: —Canÿe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnana cha tojtsatsjendá orna, mo canÿe yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca — tojanéyana.

Jesús Nazaretoca
(Mc 6.1-6; Lc 4.16-30)

⁵³ Jesús chë soyënga jacuéntama tojanpochocá ora, chentšana tojtsanoñe. ⁵⁴Y cachabe luaroye tojtanashjango y chentša judiëngbe enefjuana yebnentše tojanontšé jabuátambama. Entšanga ojnánänënga imojtsichamo: —¿Chë lempe yojtsetatšëmbcá ndëmoca mua tojuatsjinÿe ca? ¿Ntšamo nantsobena chca bëts soyënga jamama ca? ⁵⁵¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, ⁵⁶ y chabe uabënanga ndoñe muentše bëngaftaca mondoyena? ¿Ndayentšana lempe chca mua yojtsebomna ca? —chënga imojtsichamo.

⁵⁷ Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanëyana: —Nÿetsquénache canÿe Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

⁵⁸ Chíyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

14

Ntšamo Juan chë Ubayaná tojanóbana (Mc 6.14-29; Lc 9.7-9)

¹ Chë tempo, Rey Herodes, chë Galileoca mandayá tojanuena ntšamo nÿetsca entšanga Jesucristbiana imojtsichamcá. ² As cha chabe oservënënga tojanëyana: “Mua Juan chë Ubayaná ctsemna, obanënguentshana tojtayena, chíyeca chca obenana bëts soyënga jamama yojtsebomna ca.”

³ Juan cabá ainá ora, Herodes tojanmandá cha chamishache, cadenějuangaca chamobátsëca y chca cárceloye jutámiamá. Herodes chca tojanma Herodíasbe causa, chabe catšata Felipbe shema. ⁴ Juan Heródesbioye mēntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entšangbiamá yojtsauatja, er chēnga imnajuabnaye Juan ndegombre Bēngbe Bētsabe obenánaca yojanoyebuambná ca. ⁶ Pero Heródesbe cumpleañe oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye. ⁷ Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. ⁸ Y Herodíasna lempe bémbēbioye ibojabuayená ntšamo Herodes jojuama. As chē bembe tbojaniyana: “Canye šcneniñe Juan chē Ubayanabe bestšaše šmatšetá ca.”

⁹ Herodes chē soyama tbojanongmé, pero chē ófjanēngbe delante jajúrase tbojanšbuachená causa, yojamánda chca chaotsemnama. ¹⁰ Y as tojanmandá chē Juan yojanētámenoca chabe bestšaše chamuetséstjanguama. ¹¹ Chentšana, canye šcneniñe chē bestšaše tmojanamba y chē tobiáše tmojanēntšabuaché y chana, chabe mamábioye.

¹² Chentšana, Juanbe ústonēnga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chēnga tmojána y chē soyēngama tmojancuentá.

Jesús shachna uaranga boyabásenga saná tojanacaredadó

(Mc 6.30-44; Lc 9.10-17; Jn 6.1-14)

¹³ Jesús chca tojanuena ora, canye barquëshañe tojtsanoñe canye bën luaroye, entsanga ndoyena luaroye. Pero entsanga chama imojátatsëmbona y chë pueblënguentsana tmojánbocana shecuátseca cha juastama. ¹⁴ Chentsana, chë barquëshoicana tojtanstjango ora, Jesús ba entsanga tojánanye, chë cha tmojáanguënga. Chëngbiamama tbojanongmé y chë entsanguentsana ba šoquënga tojanashná. ¹⁵ Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaniyana: –Ya jetiñe entsemna y quem luariñe ndocná quenatiyena. Entsanga cuantichamuá, pueblotëmëngoye chamotsoñama, saná chamobuámiñama ca.

¹⁶ As Jesús tojanējua: –Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

¹⁷ Y chënga tmojanjuá: –Muentše tondaye queftsátsbomna; nye shachna tandëse y uta beónata ca.

¹⁸ As Jesús tojaněyana: –Chë soyënga moye miyëbo ca.

¹⁹ Chentsana Jesús tojanmandá entsanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontješé y Bëngbe Bëtsábiyoye chama tbojtanchuá. Chora chë saná tojanjatá, chabe uatsjëndayënga tojanējátaye, y chëngna nyetsca entsanga tmojanacaredadó. ²⁰ Nyetsca entsanga tmojanse jtoshachaye nyetsá y cabá

chë ojamnëtemëngaca bnëtsana uta sbarëcua tmojanajutjë. ²¹ Chë tmojansënga imojamna mo shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye
(Mc 6.45-52; Jn 6.16-21)*

²² Chentsana, Jesús chabe uatsjëndayënga tojanamëndá chë barquëshoye jtamashjna y chë uafjajónaye chenguánoica chabe natsana jashjaj-nana. Chëntscuana Jesús entsanga yojtichamuá. ²³ Njëtscanga tojtanichamó orna, Jesús canÿe tjoye tojántsjua canÿa jtsemnama, Bëngbe Bëtsáftaca jencuéntama. Yojaibétata ora, cha canÿa chentše yojtsemna, ²⁴ y chë barquëshana tsachocana bënoca yojtsamna. Y chë olëshënga chë barquësha yojtsájantsetaye, chë binÿia chëngbe contra yojtsemna causa. ²⁵ Ya bínÿanoyna, Jesús chëngbioye yojobeconá; béjaye juatsbuacá yojtsaye. ²⁶ Chabe uatsjëndayënga chca cha tojáninÿe orna, tša imojocochauatjaná y puerte auatjanánënga tmojanoyó: —¡Canÿe añemëse entsemna ca!

²⁷ Pero chora Jesús tojanëyana: —¡Añemo šmochtsebomna, atše Jesús sëndmëna; ndoñe matauatjëngana ca!

²⁸ Chora Pedro, Jesúsbioye tbojanianyana: —Bëngbe Utabná, ndegombre aca tcojtsemnëse, momandá atše béjaye juatsbuacá ácbioye chayá ca.

²⁹ Y Jesús tbojanianyana: —Mabo ca.

Chora Pedro chë barquëshoicana tojánastjango y tojanontsé béjaye juatsbuacá Jesúsbioye jama. ³⁰ Pero chë binÿia tša jabuache yojtsemnama tojáninÿe ora, Pedro puerte yojtsauatja y

tbojanontšé jtsenatiĵembambana. Chíyeca cha jabuache tojanchembo: —¡Bëngbe Utabná, šmatsbocá ca!

³¹ Y cachora Jesús tbojtano buácuetëntsiye y tbojaniyana: —¡Tša batšatema ošbuachiyá! ¿Ndáyeca ndoñe bëtscá átšbeñe contsošbuaché ca?

³² Chentšana chë barquëshoye chata tbojtanamáshëngo y cachora chë binÿia bonguana yojtsatsmëna. ³³ Y chora, chë barquëshoye imojtsemnënga Jesusbe shecuatšentše tmojanoshamentšé y tmojaniyana: —¡Aca ndegombre Bëngbe Bëtsabe Uaquiná comna ca!

Genesaret ca uabáinoca, Jesús ba šoquënga tojanashná

(Mc 6.53-56)

³⁴ Chë uafjajónaye tmojánenashbuachengo y canÿe luare Genesaret ca uabáino ye tmojánashjajna. ³⁵ Chentša entšanga Jesús tmojantëmbá ora, chë luarentša nÿetsca entšanga chama tmojántatšëmbona. As chë entšanga chëngbe šoquënga Jesúsbioye tmojanënatse. ³⁶ Y imojtseimpadana nÿe mo chabe entšayá sibiájuanaca juabojajuama chë šoquënga chaualesenciama. Y nÿetscanga chabe entšayá sibiájua tmojanábojajënga, shnánënga imojtsatoquédaye.

15

Ndáyeca canÿe entšá Bëngbe Bëtsabe delante ndoñe tšabia nántsemna

(Mc 7.1-23)

¹ Chora básefta fariseunga y judiëngbe ley abuátambayënga, Jerusalenocana tmojánabënga,

Jesúsbioye tmojanobeconá y tmojaniyana: ² — ¿Ndáyeca acbe uatsjéndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábenga jtsatsmënama ca?

³ As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsëtsanga imnétsama soyënga jtsamama ca? ⁴ Bëngbe Bëtsá mëntšá tojanmandá: “Acbe bëtsëtsata stëtšoye ndoñe catjáquedaye”, y “nda cachabe bëtsëtsatbiana podessa tojóyebuambase, chana jóbanama jtsemnana ca.” ⁵ Pero tšëngaftanga šmondbëtsichamo canÿe entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jasérviana entsemna, chíyeca tondaye quetsátsbomna aca juajabuáchama ca”; ⁶ y šmondbëtsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtšoye ndoñe ntjaquédana, ni ntjuajabuáchana ca. Y chca, tšëngaftangbiana tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtsëtsanga imojanamancá. ⁷ ¡Bacna entšanga, ntšamo ndegombre šmojuabnacá ndinÿinÿnayënga! Nÿe tšabá chë Bëngbe Bëtsabe juabna oyebuambnayá Isaías tšëngaftangbiana tojanoyebuambá, mëntšá tojánayana ora:

⁸ Bëngbe Bëtsá tonjayana: “Quem entšanga mondbëtsichamo Bëngbe Bëtsá tša tšabia

yomna ca; chca nÿe uayásaca,
pero chëngbe ainanentše atšbiana ndocna tšabe
juabnëngaca.

⁹ Chënga nÿe bonamente mondbétsichamo: Bëngbe
Bëtsá tša tšabia yomna ca;
chënga nÿe entsangbe mandënga jtsabuátambayana
y Bëngbe Bëtsabe mandënga ndoñe ca” —cha
tojánayana.

¹⁰ Chentšana Jesús entsanga tojánachembo
y tojanëyana: —Smochjouena y chacmësertá.

¹¹ Ndayá entsá tojtsesacá, ndoñe quebochátsbema
Bëngbe Bëtsabe delante ndoñe tšabia.
Inÿetšá comna: ndayá entsá tojtsejuabná y
tojtsoyebuambnacá endobena cha jabemana
Bëngbe Bëtsabe delante ndoñe tšabia ca.

¹² Chora chë uatsjëndayënga Jesúsbioye tmo-
janobeconá y tmojanianyana: —¿Quéctsetatsëmbo,
ntšamo tconjayanama chë fariseunga ndoñe
tšabá chenatëuénana ca?

¹³ As Jesús tojanëjua: —Ndaye betiye atšbe
Taitá celocá ndoñe tonjájese, tbëtëjocana
mochántsejashtse. Cachcá echanjama chë nÿe
entsangbe buatëmbana soyëngaca.

¹⁴ Cachcá
mónÿaye; chënga montsemna mo jtanënga inÿe
jtanënga unachayëngcá. Y canÿe jtaná inÿe jtaná
tbojtsánachase, nÿets útata canÿe tbuabentše
bochanjetsótsatše ca —Jesús tojánayana.

¹⁵ Chora Pedro, Jesúsbioye tbojanianyana: —
Ntšamo chë cuento bétsayanama šmabuayená
ca.

¹⁶ As Jesús tojanëjua: —¿Tšëngaftángnaca
cabá ndoñe cmontsësertana ca? ¹⁷ ¿Cabá
ndoñe cmontsësertana lempe ntšamo šmojascá

uafsbioye jomashënguana y chentšana cuerpentšana jtabocnana? ¹⁸ Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana. ¹⁹ Ainanocana jtsóbocanana bacna juabnënga: jenóbama, shema o boyábioye ínÿaftaca jaingñama, shembása o boyabásaftaca bacna soye jamama, jatbëbama, jobostérama y ínÿabiama jtsayátsenayama. ²⁰ Chë soyënga cocayé jtsobenana entšábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

*Canÿe shembása inÿe luarocana ashjanganá
Jesúsbeñe yojtsošbuaché
(Mc 7.24-30)*

²¹ Jesús chentšana, Tiro y Sidón luarëngoye tojt-sanoñe. ²² Canÿe shembása Caná luarocá chentše inoyena; cha Jesúsbioye yojobeconá y mëntšá yo-jtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerta entsesuf-rina, bacna bayëjbe juabna entsebomna causa ca!

²³ Jesús ndocá tbonjanjuá. As chabe uat-sjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

²⁴ As Jesús tojánayana: —Bëngbe Bëtsá atše šonjichmó jtsanÿenama nÿe chë entšanga, chë mo ótšena oveshëngcá imomnënga Israeloquënga, y chë ndoñe judiëngna ndoñe ca.

25 Pero chë shembása tojána, Jesusbe shecuatšentše tojanoshamentšé y tbojanियana: —¡Utabná! Diosmanda pavor šmotsebema. ¡šmotsajabuache ca!

26 Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndóñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátsmëna ca.

27 As cha tbojanjuá: —Arseñor. Pero chë quešëgnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtsesá ora. Chcasna, Diosmanda šmotsajabuache ca.

28 Chora Jesús tbojanियana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

Jesús ba šoquënga tojanashná

29 Jesús chentšana tojëftsanbocna y chë Galilea uafjajónaye tsachoye tojána. Chentšana, canye batsjoye tojántsua y choca tojanótbema.

30 Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanéshejango y cha nyetscanga tojanashná. 31 Y chca orna, chë entšanga tmojáninýe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga

tšabá imojtsatana y chë jtanëngna yojsëbinÿna; y chama chënga corente ojnánánënga imojtsemna. Chora chënga tmojanontsé jëtschuayana chë Israelentša entšanga imojánadorana Bëngbe Bëtsá.

Jesús canta uaranga boyabásenga saná tojanacaredadó
(Mc 8.1-10)

³² Chentšana Jesús, chabe uatsjëndayënga tojánachembo y tojanëyana: —Quem entšangbiana šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

³³ As chabe uatsjëndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entšangbiana saná jinÿenama ca?

³⁴ Y Jesús tojanatjá: —¿Bueta tandëse šmojtsebomna ca?

Y chënga tmojanjuá: —Canÿsëfta tandëse y básefta beonatëmënga ca.

³⁵ Chora Jesús tojanamëndá nÿetsca entšanga fshantsiñe chamotbiamama. ³⁶ As chë canÿsëfta tandëse y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjëndayënga tojanëjatá. Chentšana nÿetsca entšángbioye tmojanacaredadó.

³⁷ Nÿetsca entšanga tmojanse jtoshachaye nÿetsá. Y chentšana cabá canÿsëfta bëts sbarëcua tmojanajutjé chë tojanójamëtemëngaca.

³⁸ Chë tmojansënga imojamna canta uaranga

boyabásenga, shembásenga y básenga ntjacuntacá.
³⁹ Chentšana Jesús, chë entsanga tojtanichamó,
 barquëshoye tojánamashëngo y Magadán luaroye
 tojtsanoñe.

16

*Chë fariseunga y saduceunga tmojánbošena
 Jesús chaoma canye bëts soye
 (Mc 8.11-13; Lc 12.54-56)*

¹ Fariseunga y saduceunga tmojána Jesús
 jinÿama, y jisháchichiyama imojtseimpadana
 canye bëts soye chaoma, as jtsetatsëmbuama
 Jesusbe obenana ndegombre Bëngbe Bëtsábiocana
 tainóbocanama.

² Pero Jesús tojanëjua: “Tšëngaftanga jetiño
 šmondbétsichamo: ‘Yëfse tšabe te echántsemna,
 er celoca buánganiñe entsemna ca.’ ³ Y cachëse
 šmondbétsichamo: ‘Mënté echanjuafté, er
 celoca buánganiñe y ibetiñe entsemna ca.’
 Tšëngaftanga celoye jontješiyëse, ntšamo chë
 tempo yochtsemnama tša tšabá jayanama
 šmojtsobenëse, ¿ndáyeca ndoñe šmontsobena
 jtsetatsëmbuama ndaye bëts soye Bëngbe Bëtsá
 quem tempo cmojtsinÿanÿnama? ⁴ Quem
 puerta bacna entsanga y ndošbuáchiyënga
 montseboše atše canye bëts soye chaima, obenana
 jinÿanÿiyama; pero ndoñe chca quemochátinÿe,
 sinó nÿe chë ndayá yomna mo chë Bëngbe Bëtsabe
 juabna oyebuambnayá Jonásoftaca tojanopasá
 soycá ca” —Jesús tojánayana.

Chora Jesús tojésanabashejuana y chentšana tojt-
 sanoñe.

*Jesús tojanabuayená chë fariseungbe
buatëmbana soyëngama
(Mc 8.14-21)*

⁵ Chë uafjónaye chenguanoicana chënga tmo-
jtanabo ora, chë uatsjëndayënga yojésebnëtjomba
tandëse jesocñana. ⁶ Chora Jesús tojanëyana: —
Smochtsantješna; cuedado šmochtsebomna chë
fariseunga y saduceungbe levadurama ca.

⁷ Pero chë uatsjëndayëngna imojtsenatsëtsnaye:
—Chca entsichamo, bënga tandëse ndoñe tmonje-
socñama ca.

⁸ Jesús chë soye yojtsetátšëmbo; chíyeca
mëntšá tojanëyana: —¿Ndáyeca tandëšama
šmojtzenatsëtsná ca? ¡Tša batšatema
ošbuáchiyana šmobomna! ⁹ ¿Cabá ndoñe
cmontsësertana y ndoñe šmontsabouínÿna
chë shachna tandësentšana shachna uaranga
entšanga sënjanëjuatšema y bnëtsana uta
sbarécua šmonjánajutjema? ¹⁰ ¿Y ndoñe
šmontsabouínÿna chë canÿsëfta tandësentšana
canta uaranga entšanga sënjanëjuatšema y
canÿsëfta sbarécua šmonjánajutjema? ¹¹ ¿Ndáyeca
ndoñe cmontsësertana atše tandëšama ndoñe
sëntsóyebuambnama? Cuedado šmochtsebomna
fariseunga y saduceungbe levadurama ca —Jesús
tojanëyana.

¹² As chora chë uatsjëndayënga tojanësertá, Jesús
ndoñe tonjánayana chë tandësentšana levadurama
cuedado jtsebomnana ca, sinó ndayá chë farise-
unga y saduceungbe buatëmbana soyëngama.

*Pedro tojánayana, Jesús chë Cristo bétsemnama
(Mc 8.27-30; Lc 9.18-21)*

¹³ Jesús, Cesarea de Filipino luaroye tojánashjango ora, chabe uatsjéndayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

¹⁴ Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyebuambnayá ca.

¹⁵ As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

¹⁶ Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

¹⁷ Y Jesús tbojaniana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinÿinÿé, sinó atšbe Taitá, celoca endmëná.

¹⁸ Y mëntšánaca cbëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsepochoćama.

¹⁹ Atše cbochanjátšetaye obenana, mo llavëfjá, entšanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondétsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojaniana.

²⁰ Chentšana chabe uatsjéndayënga tojanamëndá ndocnábeñe ntsecuéntayana cha,

Jesús, chë Bëngbe Bëtsabe Uámana Uabuayaná, chë Cristo bétsemnama.

Jesús tojánayana cha ibojamna jóbanana y jtayenana ca

(Mc 8.31-9.1; Lc 9.22-27)

²¹ Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtšëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayena ca. ²² Chora Pedro, Jesúsëftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenausopodena chca ácaftaca jopásana ca!

²³ As Jesús tojanobuértana y Pédrëbioye tbojaniyana: —¡Satanás, átšbentšana mojuaná! ¡Aca contseboše atše canye bacna soye chašócochënguama! Pedro, acbe juabnënga Bëngbe Bëtsábíocana ndoñe quenatóbocana, sinó nye entšángbentšana ca.

²⁴ Chentšana Jesús chabe uatsjéndayënga tojanëyana: —Nda atšbe uatsjendayá jtsemnama tojtseboše, cháuyana nye Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonyá atše juastama, y atšbiamá jasúfriama chaotseprontana y cruciñe jobanámnaca. ²⁵ Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nyetsca

tescama yomna tšabe vida echanjopérdia. Pero nda quem luarentša soyënga cachcá tojëftsonyá atše juastama, masque chaóbana, chë nyetsca tescama yomna tšabe vida echántsebomna. ²⁶ ¿Ndayama entšá buanjosérvia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? Ndegombre, canye entšá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnama. ²⁷ Chë Bëngbe Bëtsá Entšá tbojanbemá, chabe Taitabe obenánaca y puerte buashinÿinÿaniñe echanjabo chabe angelotémëngaftaca, y chora cada cányabioye bochántatsetaye cachcá ntšamo cada ona tojëftsemcá. ²⁸ Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinÿcá ca —Jesús tojánayana.

17

Jesús inÿetšá tojanobinÿná (Mc 9.2-13; Lc 9.28-36)

¹ Chentšana chnënguana tianoje, Jesús tojëftsanëbiatše Pedro, Santiago y chabe catšata Juan, y inÿoye tojanënatse nÿe chënga, canye bëts tjoye. ² Chentše, chëngbe delante inÿetšá cha tojanobinÿná. Chabe jubiá shinÿcá yojtsebuashinÿinÿana, y chabe uichëtjonëjuangana mo binÿniñcá uafjantsëjuangá yojtsamna. ³ Chca orna, chabe uatsjëndayënga

tmojáninÿe Moisés y Elías tbojanobinÿná, Jesúseftaca encuéntaye.

⁴ Chora Pedro, Jesúsbioye tbojanियana: “Bëngbe Utabná, ¡tša tšabá bëngbiama cuanmëna muentše jtsemnana ca! Tcojtsebošëse, unga tambotémënga atše chjapórma: cánÿetema acbiama, ínÿetema Moisesbiama y ínÿetemna Elíasbiama ca.”

⁵ Pedro chca yojtsóyebuambnantscuana, canÿe buashinÿinÿana jantšetëshe nÿetscanga yojáutsbotse. Y chë jantšetëshoicana canÿe oyebuambnayana tmojanuena mëntsá: “Mua atšbe bonshana Uaquiñá endmëna, atše chabiama sëntsoyejuá. Cha šmochtseyeunana ca.”

⁶ Y chë uatsjéndayënga chca tmojanuena ora, tmojanoshamentšé y jubiaca fshantsóntscoñe tmojanotsejbéna, puerte auatjanánënga. ⁷ Chora Jesús chabe uatsjéndayëngbioye tojanobeconá, tojánabojajo y tojanéyana: “Matëtsbananga; ndoñe matauatjëngana ca.”

⁸ Y tsbanánoye tmojanontješé ora, Jesús nÿe canÿa tmojáninÿe, ndocná inÿa más.

⁹ Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentšana candëtayenëntscuana, ndocnábeñe chë šmonjinÿe soyama šmattsecuéntaye ca.

¹⁰ As chë uatsjéndayënga Jesús tmojantjá: — ¿Ndáyeca chë ley abuátambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

¹¹ Chora Jesús tojanějua: —Ndegombre canÿa Eliascá natsana echanjabo y ntšamo jtsemnama

yomncá, lempe echánjabatsma ca. ¹² Pero atše cbëyana, canya mo Eliascá ya tonjabo, entsanga ndoñe chematanotëmbá y cháftaca entsanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entsangbe cucuatšinë echanjasúfria ca —Jesús tojánayana.

¹³ Chora chë uatsjédayënga tojanësertá, Juan chë Ubayanabiama Jesús chca yojsëtsëtsnama.

Jesús, canye bacna bayëja tbojanbojuaná
(Mc 9.14-29; Lc 9.37-43)

¹⁴ Entsanga imojtsemnoye chënga tmojtanashjajna ora, canye boyabása tojanobeconá, Jesusbe natsanoica vojoshamentsiye y tbojanianyana: ¹⁵ —Utabná, atšbe uaquiñá motselastemá. Cha ataque bontsësháchichana y puerta entsesufrina, er cha inye ora iñoye jtseshajayana y inye orna, buyeshoye jtsoshbuetšana. ¹⁶ Acbe uatsjédayëngbiyoye cha sënjuánatse y ndoñe chematobená jtseboshnama ca —cha tbojanianyana.

¹⁷ As Jesús tojánayana: —¡Nyetšá ndošbuáchiyënga y bacna entsanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

¹⁸ Chora Jesús, chë basetëmbeñe bacna bayëjbioye tbojanácacana y chábentšana cha tojésanbocna. Cach orscana chë básetema tšabá yojsatsmäna.

¹⁹ Chentšana, chë uatsjédayënga luaroca Jesúseftaca tmojanoyebuambá y tmojanianyana: — ¿Ndáyeca bënga ndoñe fsënjobená chë bacna bayëja jtabocnama ca?

20 Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomněse, masque nŷe mo canŷe mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. ²¹ Pero chca bayëjënga jtëbuacnamna jobenayana nŷe Bëngbe Bëtsáftaca jencuéntase y chama tondaye ntjascá jtsemněse ca —Jesús tojanéyana.

Jesús cachiñe tojánayana cha ibojamna jóbanana y jtayenana ca

(Mc 9.30-32; Lc 9.43-45)

²² Jesús y chabe uatsjëndayënga cánŷiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entšangbe cucuatšične mochanjáboshjona, ²³ mochanjóba, pero unga tiano ye echántayena ca.” Chë causa chë uatsjëndayënga puerte ngménaca imojtsemna.

Chë Bëngbe Bëtsabe bëts yebnama impuesto jtsat-squëcjnyama

²⁴ Jesús y chabe uatsjëndayënga Capernaumoye tmojánashajna ora, chë Bëngbe Bëtsabe bëts yebnama entšángbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonŷbetsatsquëcjnyaye ca?

²⁵ Y Pedro tojanéjua: —Aíñe, cha endbetsat-squëcjnyaye ca.

Chentšana, Pedro chë yebnoye tojánamashëngo ora, Jesús natsana mëntšá chábioye tbojanianyana:

—Simón, ¿ntšamo catjájuaboye? ¿Quem luarentša reyenga nděmuanÿengbioye impuesto inmėtsayėngacaye y crocėnana inmėtsatjanaye: cach luarentše oyenėngbioye o chė inÿe luarocana ashjajnėngbioye ca?

²⁶ As Pedro tbojanjuá: —Chė inÿe luarocana ashjajnėngbioye ca.

Y Jesús tbojanियana: —Chcasna, ndoñe quešnátsmėna chė atšbe Taitabe bėts yebnama impuesto jtsatsquėcjayana ca. ²⁷ Pero ndocná mal chabonduínÿnanamna uafjajónayoye motsa, anzuelėfjua cochjútšena y chė natsana chaojuásjana beona cochjuábocna. Cochjuayetėfjoná y choye crocėnana cochanjínÿena y chánaca echanjoshjache atšbiamna y acbiamna jėtsjájua. Cochjėftsejatsėca y cochjatsboshjona ca —Jesús tbojanियana.

18

¿Nda chė más uamaná yomna?

(Mc 9.33-37; Lc 9.46-48)

¹ Chentšana chė uatsjėndayėnga Jesúsbioye tmojanobeconá y tmojantjá: —¿Chė Bėngbe Bėtsábeyeca mandánėngbeñe nda chė más uamaná yomna ca?

² Chora Jesús canÿe basetėmbioye tbojanchembo y chėngbe tsėntsaca tbojanatsá. ³ Y tojánayana: —Ndegombre cbėyana, nda mo basetemcá ndoñe tontóbema y ndoñe chacá Bėngbe Bėtsabe soyėnga tonjójėngacñe, cha ndocna te queochatobenaye Bėngbe Bėtsabe amėndayoye jamashėnguama. ⁴ Chca, nda tojtsejuabná canÿe nduamaná yomna y quem basetemcá yomna

ca, cha chë Bëngbe Bëtsabe amëndayoca chë más uamaná echántsemna. ⁵ Y nda átsbeñe ošbuachiyá bétsemnayeca, tbojofja canya mo quem basetembioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama
(Mc 9.42-48; Lc 17.1-2)*

⁶ “Nda canye básetema átsbeñe ošbuachiyábioye tbojaingñë bacna soye jamama, chabiama más tšabá nántsemna canye bëts nantsnëbé chamotsetamosëntšbua y chë mar bėjaye shbuatsëntsoye chamotsashbuetše chabotsenatjëmbama. ⁷ ¡Tša lastema quem luarentša entšangbiama, chë ínÿenga bacna soye jamama chaócochënguama tmojtsamëngbiama! Nÿets tempo chca amënga mochanjëftsemna. Pero, ¡payajema chë inÿa bacna soye chaomama tojtsamá ca!

⁸ “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënöye cochtsëtšena. Acbiama más tšabá nántsemna celoye jamashënguana chë nÿetsca tescama yomna tšabe vida jtsebomnama, cucuatše ndbomná o cosheto, y ndoñe nÿets uta cucuátšeca o shecuátšeca chë nÿets tempo echanjesomñe íñeshoye chacmotsëstjango. ⁹ Nderado acbe bomínÿeca bacna soye tcojinÿe y cachca soye tcojama, chë bominÿe cochtsenobuchjatsëca y bënöye cochtsëtšena. Acbiama más tšabá nántsemna, celoye jamashënguana nÿe canye bomínÿeca, y ndoñe nÿets uta bomínÿeca infiernoye chacmotsëstjango, chë bëts íñeshoye ca” —Jesús tojánayana.

*Chë ótšena oveshabiamna cuento
(Lc 15.3-7)*

¹⁰ Měntsánaca Jesús tojánayana: “Ni mo cánÿabioye quem tsēm ošbuáchiyēnguentšana, chë mo basetemēngcá mondmēnēnga, mo nduamanacá šmattsonÿaye. Ndegombre cbēyana, chēngbe angelotēmēnga celoca, sempre atšbe Taitá celocáftaca mondetsemna ca. ¹¹ Er chë Bēngbe Bětsá Entšá tbojanbemá tonjabo chë pochocánēnga jtsemnana imojtsajnēnga jabátsebacama.

¹² “¿Ntšamo tšēngaftanga šmatjájua boye? Canÿe boyabása patse oveshēnga tojtsabamna y ndeolpe canÿe chentša oveshá tojtsotše. ¿Chë boyabása ndoñe chë inÿe esconēfta bnětsana y esconēfta oveshēnga tjoca cachcá nanjesēñyaye, jama chë ótšena oveshá jetsenguanguama? ¹³ Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótšena oveshabiamna, y ndoñe nÿa chca chë inÿe esconēfta bnětsana y esconēfta oveshēngbiama chë ndoñe tmonjanotšēngbiama. ¹⁴ Cachcá, tšēngaftangbe Taitá, Bēngbe Bětsá, chë celoca endmēná, ndoñe quenátšboše ni canÿa quem basenguentšana mo otšenacá chaotsemna, bacna soyēnga jtsamēse oyena causa ca” —Jesús tojánayana.

*Ntšamo cuanjama inÿa japerdónama
(Lc 17.3)*

¹⁵ “Nderado acbe catšata, bacna soye tcmojaborlase, cochjá, cánÿata šochjencuēnta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsmēna.

16 Pero ndoñe tcmonejóyeunasna, inye útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama.

17 Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canya Bëngbe Bëtsábioye nduabuatmacá, mo canye ndoñe judiyca ca o canye bacna entsá mo canya Romocama impuesto entsángbioye atjanayacá yomna ca.

18 “Ndegombre cbëyana: Tšëngaftanga Bëngbe Bëtsáftaca chašmojtsencuénta ora, chašmojayana canye soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canye soye aïñe chaotsemna ca, Bëngbe Bëtsá echanjayana aïñe chca chaotsemna ca.

19 “Mëntšánaca cbëyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endméná pronto chë soye cmochanjátšataye. 20 Ndayentše útata o únganga tmojénefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

21 As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canysëfta soye ca?

22 Y Jesús tbojanjuá: —Ndoñe nje canysëfta soyama quechatatsëtsná, sinó canysëfta bnëtsana soye canysëfta ca.

Ndayá inopása chë japerdónama ndëbošëngaftaca

²³ Mëntšánaca Jesús tojanéyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canÿe réyefraca tojanopasacá. Cha yojábošena chabe oservénënga crocénana jtsëtjañana. ²⁴ Jtsëtjañama yojóntša orna, canÿe boyabása imojuánatse, chë réybioye mallajta crocénana ibnandebena. ²⁵ Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nyets tempo nÿe ínÿabiamana chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama. ²⁶ Chora chë oservená chë reybe shecuatšentše yojoshamentšiye y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’ ²⁷ Chë reyna chë boyabásabiamana ibojóngmia; as chë ndebénana ibojtseperdóna y ibojëtsboshjona.

²⁸ “Chë oservenana chentšana yojésebocna y benachiñe inÿe oservenáftaca ibojenbetše, cach mandadbiama trabajayá. Chë inÿe oservenana nÿe batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y mëntšá ibojauyana: ‘¡Ndebénana šmatsëntšabuaché ca!’ ²⁹ Chora cha chë oservenabe shecuatšentše yojoshamentšiye y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’ ³⁰ Pero chë oservená ndoñe yonjábošena, sinó yojama chë inÿe oservenábioye cárceloye chamotsëtámiamana,

chë ndebénana candëtsjájëntscuana. ³¹ Chë inye oservénënga chca imojinýe ora, puerte yojóngmia y imojá lempe ntšamo yojopasacá chëngbe rey jacuéntama. ³² As chë rey yojamánda chë boyabása jobetsana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná. ³³ Acnaca cachcá cmondmëna chë cach aquëcá muentša trabájayabiama jóngmiana, ntšamo atše acbiama šonjongmecá ca.’ ³⁴ Y tša chë rey ibojtsetna; as yojamánda jabuache chamotsetsetšená nyets ndebénana candëtsjájuantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, ce-loca endmëná, cachcá tšëngaftangafata echan-jama, tšëngaftangbe catsata ndoñe ndegombre nyets ainánaca šmonjaperdonase ca.”

19

Ndayá Jesús tojanabuatambá chë bouamnënga tmojtsenëtsenama

(Mc 10.1-12; Lc 16.18)

¹ Chë soyënga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica. ² Ba entsanga tmojanasto y chentše šoquënga tojanashná.

³ Básefta fariseunga Jesúsbioye tmojanobeconá y jisháchichiyama mëntšá tmojantjá: — ¿Queojtselesenciana canýe boyá nye ndayámnaca chabe shëmbioye cachcá jesonýayama ca?

⁴ As Jesús tojanějua: —¿Tšëngaftanga ndoñe chë Bëngbe Bëtsabe uabemana palabrënguñe šmëndualía, Bëngbe Bëtsá, chë entsanga

tojanabiamá, quem luare jobojátšama ora “boyá y shema tojánabiamama”? ⁵ Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canyáca bochántsemna ca.” ⁶ Y chca, ya ndoñe útata quebochátsmëna, sinó mo nÿe canyáca. Chcasna, entšá ndoñe chaondëndbema ndayá Bëngbe Bëtsá mo canyíñcá tojëftsema soye ca —Jesús tojánayana.

⁷ Chora chë fariseunga tmojanianyana: —¿As, ndáyeca Moisés tojanmandá, chë shémbioye canyë uabemana tsbuanácha juiyiyana jtsenëtšenama y cachcá jesonýayana ca?

⁸ Y Jesús tojanéyana: —Tsëngaftanga Bëngbe Bëtsabe mandënga jóyëngacñama ndoñe quešmátsboše causa, Moisés tmojanalesenciá shémbioye jesëtšenana. Pero quem luare jobojátšama orna, ndoñe chca quenjatsmëna.

⁹ Atše cbéyana, nda chabe shémaftaca tbojtsenëtšena y chca tojopasá ndoñe chë shema chabe boyábioye ínÿaftaca tbontseingñé causa, y chë boyá ínÿaftaca tojtóbouamasna, cha chë natsana shémbioye ínÿaftaca jtseingñayana ca — Jesús tojánayana.

¹⁰ Chora chabe uatsjëndayënga tmojanianyana: — Chca chë boyá y shémaftaca tojtsemnësna, ndoñe tšabá yontsemna jobouamayana ca.

¹¹ Y Jesús tojanéyana: —Nÿetscanga ndoñe quemátobena chë palabrënga jóyëngacñana, nÿe chë Bëngbe Bëtsá tojama jóyëngacñama chamobenama, chëngna aíñe. ¹² Ba soyënga comna ndaye causa chë boyabásenga ndoñe ntsobenana

jobouamayana. Inyenga jónyana jobouamayama ndobenenga, ínnyengbioye cach entsanga jábiamana jobouamayama ndobenenga y ínnyengna, nyets tempo nye Bëngbe Bëtsabe amëndayama oservena causa ca –tojanéyana.

Jesús, basetémngbiama Bëngbe Bëtsábioye tbojanimpadá

(Mc 10.13-16; Lc 18.15-17)

¹³ Entsanga basetémnga Jesúsbioye tmojanénatse, cha chauabojajuama y Bëngbe Bëtsábioye chëngbiama chaboimpadama. Pero chë uatsjédayengna tmojanontsé chë basetémnga unachayenga jtsécácanana. ¹⁴ Chora Jesús tojanéyana: “Cachcá mónyaye chë basetémnga átšbioye chamuabo y ndoñe matéuyanana; er Bëngbe Bëtsabe amëndayana endmëna mo quem basetémngcá imomnëngbiama ca.” ¹⁵ As chë basetémnga tojánabojajo, Bëngbe Bëtsá jaimpádase; y chentsana cha tojtsanoñe.

Canye bomna bobontse Jesúsbioye tojana

(Mc 10.17-31; Lc 18.18-30)

¹⁶ Chentsana, canye boyabása tojana Jesús jinýama y mëntsá tbojantjá: –Buatëmbayá, ¿ndaye tšabe soye chjama chë nyetsca tescama yomna tšabe vida jtsebomnama ca?

¹⁷ Y Jesús tbojanjuá: –¿Ndáyeca chë tšabe soye ndayá bétsemnama šcojtsetjaná ca? Tšabia nye canya endmëna: Bëngbe Bëtsá. Aca chë nyetsca tescama yomna tšabe vida jtsebomnama tcojtsebošëse, mandënga cochtsobedecena ca.

¹⁸ Chora chë bobontse tbojantjá: –¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínÿena. ¹⁹ Acbe bëtsëtsata stëtsoye ndoñe catjáquedaye y ndëmua entsánaca cochtsebobonshana ntšamo cach aca cuenobobonshancá ca” —Jesús tbojanियana.

²⁰ Chora chë bobontse tbojanjuá: —Atše lempe chca nÿets tempo sëndocumplina. ¿Ndayá más šojtsebuáshbena ca?

²¹ As Jesús tbojanियana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnjëmënga cochtsatsataye; chca, bëts uacanana soye celoca cochántsebomna. Chentšana cochjabo y šcochjuasto ca.

²² Chë bobontse chca tojanuena ora, ngménaca yojtsatoñe, cha corente bomná bemna causa.

²³ Chora Jesús chabe uatsjëndayënga tojanëyana: —Ndegombre cbëyana, puerte totcá entsemna canÿe bomnabiamá Bëngbe Bëtsabe amëndayoye jamashënguama ca. ²⁴ Chë bomnabiamá cachiñe šcuatayana: Más paselo entsemna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

²⁵ Chabe uatsjëndayënga chca tmojanuena ora, puerte ojnánänënga imojtsemna y imojtsichamo: —As, ¿nda yochjobenaye atsbocaná jtsemnama ca?

²⁶ Jesús chënga tojanënÿanÿé y tojanëyana: —Entšanga ndoñe quemátobena jamama canÿa atsbocaná chaotsemnama, pero Bëngbe Bëtsá aíñe, er cha nÿetsca soyënga jamama endobena ca.

²⁷ Chora Pedro tbojaníyana: —Aca contsonjá, bēnga lempe chē fsēndbomna soyēnga fsēnjéseboshjona y ácaftaca fsēntsajna. As, ¿ndayá bēnga fchjójyēngacñe ca?

²⁸ As Jesús tojanéyana: —Ndegombre cbēyana, nyetsca quem luarentša soyēngama mo tsmécá jtsemnama tempo chaojobuache ora, chē Bēngbe Bētsá Entšá tbojanbemá chabe buashinŷinŷana bēts tšenēsiñe reycá echanjót bema jtsemándayama; y tšēngaftanga, chē atše šmēstonēngna, chora bnētsana uta uámana tbemaniñe šmochanjotbiana mo reyēngcá, chē Israeloca bnētsana uta bēts pamillentša entsangbiana jayanama tšabá o ndoñe tšabá tmonjamama. ²⁹ Y ndēmuanŷyēnga, atše jaserviama tmojéftseboshjona cachēngbe yebna, catsátanga o uabénanga, befta o bebmá, básēnga o fshantsēnga, chē soyēngama patse soye más mochanjójyēngacñe y chē nyetsca tescama yomna tšabe vídnaca. ³⁰ Pero banga mora uámanēnga imomnēnga, nduámanēnga mochántsemna; y banga mora nduámanēnga imomnēngna, uámanēnga mochántsemna ca —Jesús tojánayana.

20

Chē trabájayēngbiana cuento

¹ Mēntsánaca Jesús tojánayana: “Bēngbe Bētsabe amēndayana endmēna mo canŷe bēts jajañe nduiñcá. Chē nduiñna canŷe te cabá cachēse yojábocna peonga janguanguama, chabe uvas betiyēnga jajañe chamotrabajama. ² Chē nduiño peonga yojánŷyēna orna, imojenóyeunaye canŷe

tescama canÿe denario crocénana jtëbuénayama. As chora vojichamuá chë uvas betiyënga jajoye jatrabájama. ³ Mo base mošenana ora, chë nduiño cachiñe yojábocna y plazoca atsanënga ínÿenga yojanÿe, tondaye ntsamcá. ⁴ As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. ⁵ Nÿetsto ora y bëts mošenana ora, chë nduiño cachiñe yojábocna y cachiñe cachcá yojopása. ⁶ Mo la cinco ora, chë nduiño cachiñe yojábocna y chenache ínÿenga yojánÿena, tondaye ntsamcá. As yojátjaye: ‘¿Ndáyeca tšëngaftanga nÿets día ntjatrabajacá muentše šmotsomñe ca?’ ⁷ Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

⁸ “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojášhjajnënguentsana cochjabojátša y chë natsana tmojášhjajnënga ústonoye ca.’ ⁹ Y chë mo la cinco ora imojášhjajnënga imojobeconá, y cada ona canÿe denario crocénana yojtáyentšbuachiye. ¹⁰ Chentsana, chë natsana jatrabájama imojášhjajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canÿe denario crocénana yojtëbuénaye. ¹¹ Chca imojóyëngacñe orna, chënga imojóntša chë nduiñbiana bacá ichámuana, ¹² mëntšá: ‘Quemënga

chë ústonoye tmonjášhajnënga nÿe canÿe horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënÿá fsënjauantá ca.’

¹³ “Pero chë nduiño canÿa chca yojt-sichamuábioye ibojojuá: ‘Sobreno, acbiamana docna ndoñe tšabe soye chiyatsma. ¿Ndoñe canÿe denario crocénana canÿe tescama tbonjenoyeuná ca? ¹⁴ Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tcojtabuenacá. ¹⁵ Chca entsemna, er atše sëndobena atšbe crocenánaca nÿe ndayánaca jamana. ¿O aca envidia cojtsebmna, atše tšabia tsmënama ca?’ ” —cha yojayana.

¹⁶ Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

Jesús cachiñe tojánayana cha jóbanama y jtayenama

(Mc 10.32-34; Lc 18.31-34)

¹⁷ Chënga Jerusalenoye imojtsaye ora, Jesús barie tojánachembo chabe bnëtsana uta uatsjédayënga y tojanëyana: ¹⁸ “Tšëngaftanga šmontsonÿá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšiñe mochanjáboshjona, y chënga mochanjayana jóbanama cha ibojtsemna ca, ¹⁹ y chë ndoñe judiëngbe cucuatšiñe

mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye
(Mc 10.35-45)*

²⁰ Chentsana, Zebedeobe uaquiñatbe mamá chabe uaquiñataftaca Jesúsbioye tojanobeconá, chabe shecuatšentše yojoshamentšiyē canyē pavorama jaimpádama. ²¹ As Jesús tbojantjá: — ¿Ndayá cojtseboše ca?

Y chë shembása tbojaniyana: —Aca reycá chacojtsemánda ora, cochjamánda atšbe uaquiñata chabótbema canya acbe catšbioica y chë inya acbe uañicuayoica, ácaftaca chabotsemándama ca.

²² Y Jesús tojanējua: —Ntšamo šmontsotjanañama, tsëndata ndoñe quešnátstatšēmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

²³ Chora Jesús tojanējua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndēmuanyēngbiama atšbe Taitá tojaprontacá ca.

²⁴ Chë inyē bnétsana uatsjéndayēnga chca tmojanuena ora, chë uta catšátaftaca tmojanotjayaná. ²⁵ Chora Jesús chë uatsjéndayēnga tojánachembo y tojanējyana: —Tšēngaftanga šmondétatšēmbo, chë ndoñe judiēngbeñe chë reyēnga lempe jtsemándayana nya mo nduiñēnga cuaftsemncá; y chë bētsētsa entšangna chēngbe obenánaca jtsemándayana,

ndayánaca jtsamëse, chë inÿe entšanga sempre chamotsayaunanama. ²⁶ Pero tšëngaftangbeñna ndoñe chca chaondëtsemna. Inÿetšá; masna, nda tšëngaftanguentše chë más uamaná jtsemnama tojtsebošá bontsemna chë ínÿenga jtsaservénana. ²⁷ Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nÿe ínÿabiamá nÿets tempo oservenacá. ²⁸ Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿenga jabáserviama. Y mo nda ínÿenga játsebacama cuafjëtsjajocá, cha echanjóbana, ba entšanga atsebácanënga chamotsemnana ca — Jesús tojánayana.

*Jesús uta jtanata tojanashná
(Mc 10.46-52; Lc 18.35-43)*

²⁹ Chënga, Jericó bëts pueblentšana tmojánbocana ora, ba entšanga Jesús imojtséstoná. ³⁰ Uta jtanata benache juachañe ibnatbemana. Jesús chëjana yojtsachnëjuanama chata tbojanuena ora, tbojanontšé uayebuáchana: —¡Utabná, Davídbentšana Entšá, šmotsalastemá ca!

³¹ Entšanga chë jtanátbioye tmojtsanëcácana iytëca chabotsemnana, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

³² As Jesús yojtsaye, chë jtanata tojánachembo y tojanatjá: —¿Ndayá šojtseboše atše tsëndatbiamá chjamama ca?

³³ Y chata tbojanjuá: —Utabná, bëndata chabu-atëbínÿnama ca.

34 Jesús chatbiama tbojanongmé y tojánabuchbojajo. Cachora chë jtanata tšabá yojtëbinÿna y Jesús tmojanasto.

21

*Jesús Jerusalenoye tojánashjango
(Mc 11.1-11; Lc 19.28-40; Jn 12.12-19)*

¹ Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentše. Chora Jesús uta chabe uatsjédayata tojanichamó,
² y mëntšá tojanëyana: “Tsëndatbe natsana entsemna base pueblotémoye motsata. Cachora canÿe burrá utsbuaná šochanjínÿena y cháftaca canÿe burrotema echántsemna. Sochjuajafjoná y sochjuánatse. ³ Nderado nda ndayánaca chacmojáuyanëse, sochjauyana: ‘Bëngbe Utabná bontsájaboto y chentšana camuentše echanjabáisabashejuana ca.’ ”

⁴ Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntšá tojanábema:

⁵ Jerusalén bëts pueblentše oyenënga mëyana: “Minÿënga, tšëngaftangbe Rey chentše tšëngaftangbioye entsabó, ndoñe mo canÿa cachá bëtsá enobiamnayacá; canÿe búrrbeñe enjaquená; canÿe burrotémiñe, canÿe uatrabájaye bayabe šešónbeñe ca.”

⁶ Chora chë uatsjédayata tbojána y tbojanma ntšamo Jesús tojanamëndacá. ⁷ Chë uatsjédayatna chë burrá y chë burrotema tmojanënatse,

entsayëjuangá chátbeñe tbojanájatse y chora Jesús chábeñe tojanenoyayé. ⁸ Bëtscá entsanga chëngbe entsayá chë benachëjana imojtsëtétsatsana, y ínÿengna betiyeshënguiñe buacuafjënga imojtsetcoye y chiñe imojtsequëcñá. ⁹ Y chë natsana imojtsajnënga y chë ústonoyënga mëntsá imojtsaiuáyebuache: “¡Rey Davidbentsana Entsá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

¹⁰ Jesús Jerusalenoye tojánamashëngo ora, nÿetsca entsanga imojtsenbouenana y banga imojtsenotíciaye: —¿Nda mua yojtsemna ca?

¹¹ Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

Jesús, Bëngbe Bëtsabe bëts yebnentsana enënga y obuámnyënga tojtanëbuacna

(Mc 11.15-19; Lc 19.45-48; Jn 2.13-22)

¹² Chentsana Jesús, Bëngbe Bëtsabe bëts yebnoye tojánamashëngo y chë entsanga chentse imojtsena y imojtsobuámnañënga chentsana tojtanëbuacna. Chéntsnaca imojtsemna entsanga canÿe crocénana enënga, y chë crocénana nÿe Bëngbe Bëtsabe bëts yebnentsama inoserverna. Chëngbe mesëshangá tojtsanenásatajchquëca y chë palomatema enëngbe tšenëšëngnaca. ¹³ Y tojanëyana: “Bëngbe Bëtsabe uabemana palabrënguiñe cha mëntsá tojánayana: ‘Atsbe bëts yebna echantsabaina átseftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

14 Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. 15 Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninÿe ora, y chë basetémënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyanga. Chë basetémënga mëntšá imojtsáyebuache: “¡Chë Rey Davídbentšana Entšá matschuanga ca!” 16 As Jesús tmojanियana: –¿Ntšamo chë basetémënga montsichamcá quectsuenana ca?

Y Jesús tojanějua: –Aíñe, sëntsuenana. Pero, ¿tsëngaftanga Bëngbe Bëtsabe uabemana palabrenguiñe chë soyama ndoñe šmëndualía? Chiñe mëntšá endayana:

Chë basetémënga y ochóchaye šešonatémëngbe cantëngaca
aca tcojama entšanga chacmotsatschuanama ca.

17 Chora Jesús chënga tojésanabashejuana y Jerusalemntšana Betania puebloye tojtsanoñe; y chentše chë ibeta tbojánbobinÿna.

Jesús tojánayana canÿe higo betiye ndoñe más chaondëshájona ca

(Mc 11.12-14, 20-26)

18 Chë te cachëse, Jesús cach bëts puebloye yojtësa ora, tbojánishëntsena. 19 Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojínÿena. As Jesús chë higo betiyoye tojánayana: “¡Ndocna te más chaondëshájona ca!” Y betsco chë higo betiye tojtsanbuashá.

²⁰ Chë uatsjéndayënga chca tmojáninÿe ora, imojenjananá y Jesús tmojantjá: —¿Ntšamo chca chë higo betiye canÿe ora tojtsebuashá ca?

²¹ Y Jesús tojanějua: —Ndegombre cbëyana, tšëngaftanga Bëngbe Bëtsábeñe ošbuáchiyana šmojtsebmna y chabiamá ainaniñe ndoñe inÿetšá šmonjátsjuabnase, šmochantsobena jamama ndoñe ñe ntšamo atše quem higo betíyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanëse, chca jochnënguana. ²² Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

Jesube obenana

(Mc 11.27-33; Lc 20.1-8)

²³ Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jt-samama nda mando tcmënjatštá ca?

²⁴ As Jesús mëntšá tojanějua: —Atšnaca canÿe soye séntsebmna tšëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama. ²⁵ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca? —Jesús tojanëyana.

Chama chënga tmojanontsé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As, ¿ndáyeca

chë tcmojanabuayená soyënguiñe ndoñe šmonjanošbuaché ca? ²⁶ Pero ndoñe quemuátobena jayanana ‘entsanga ca’; muentša entsangbiana bēnga montsauatja, er n̄yetscanga mondējuabná Juan ndegombre Bēngbe Bētsabe juabna oyebuambnayá yomna ca.” ²⁷ Chcasna chēnga Jesús tmojanjuá: —Bēnga ndoñe queftsátstatšēmo ca.

Y as Jesús tojanēyana: —Atše cach ndoñe quechochatēyana ndaye deréchoca chca stsama ca.

Chë uta uaquiñátbiana cuento

²⁸ Chora Jesús entsanga tojanatjá: —¿Ntšamo tšēngaftanga quem soyama šmatjayana? Can̄ye boyabása uta uaquiñata yojánabamna, y cán̄yabioye ibojauyana: “Uaquiñá, mēnté motsa atšbe uvas betiyēnga jajoye jatrabájama ca.” ²⁹ Chë uaquiñá ibojojuá: “¡Jama ndoñe quetsátsboše ca!” Pero botamana yojenójuaboye y pronto choye yojá. ³⁰ Chentšana chë taitá chë in̄ye uaquiñábioye cachcá ibojauyana. As cha ibojojuá: “Arseñor, aīñe chanjá ca.” Pero ndoñe yonjá. ³¹ ¿Chë útatentšana ndēmuan̄yá tojanma ntšamo chë taitá yojabošcá ca? —Jesús tojanatjá.

Y chēnga tmojanjuá: —Chë natsaná ca.

Chora Jesús tojanēyana: —Ndegombre cbēyana, chë Romocama entsāngbioye impuesto atjanayēnga y chë bacna vida bomna shembásenga, tšēngaftangbiana más montseprontana Bēngbe Bētsabe amēndayoye jamashēnguama. ³² Juan chë Ubayaná tonjánabo tšēngaftanga jábuayenama ntšamo jtsiyenana

cmamnama, ntšamo Bëngbe Bëtsá yobošcá, y tšëngaftanga chë tcmojanabuayená soyënguine ndoñe chešmatanošbuaché; y chë cuenta, chë Romocama entsángbioye impuesto atjanayënga y bacna vida bomna shembásengna aíñe chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsošbuáchema lempe šmojinýese, chë juabnayana ndoñe šmonjatrocá, chábeñe jtsošbuáchiyama ca —cha tojanéyana.

*Chë puerte bacna trabájayëngbiana cuento
(Mc 12.1-12; Lc 20.9-19)*

³³ Mëntšánaca Jesús tojánayana: “Inýe cuento šmochjatuenta chašmuatsjínýama: Canýe jajañe nduiño uvas betiyënga yojáje y chë shëconana yojajétja. Chë uvasëšangá juantsëtetjamna canýe base luare yojajutjo y canýe tsbanana jebna soye yojapórma chentše jtsaishanyama. Chentšana, inýe trabájayënga chë jajañe yojárrendaye y chana inýe luaroye yojtsoñe. ³⁴ Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama. ³⁵ Pero chë arréndayëngna chë oservénënga imojishëche: ínýengbioyna imojtsajantsetaye, ínýengbioye imojtsëbaye y chë ínýengbioyna ndëtšbéngaca imojtsatëchënganja. ³⁶ As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

³⁷ “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe

uaquiñá cocayé mochanjóyeunaye ca.’ 38 Pero chë arréndayënga chë uaquiñá imojinýe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanganga y lempé chabe otocana soyënga bëngbiamanga echanjoquéda ca.’ 39 As chë uaquiñá imojishache, chë uvas betiyënga jajañentšana imojtsábocna y imojtsóba.”

40 Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

41 Y chënga tmojanjuá: —Chë puerte bacna arréndayënga ni mo batsatema ntjalastemaycá echantsëbaye. Chë jajañe ínýenganga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtšotocancá chënga mochantíyie ca.

42 Chora Jesús tojánayana: —¿Tšëngaftanganga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtšanaboté ndëtsbé, mora chë más bëts uashacuanëšentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojnánánënga fsëntsemna ca.

43 Ntšamo chë nduiño chë arréndayënga chë fshantse echántsabaca y ínýenganga echantsatšataye y chënga chabiamanga bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínýengbioye mochantšatšataye. Chënga Bëngbe Bëtsabe soyëngama mochanjouena y chë soyëngama

ínÿengbioye mochanjabuayená, Bëngbe Bëtsabe amëndayoye jamashënguama. ⁴⁴ Ndánaca chë ndëtsbeñe chaojotsatsá, chëbé bochántsacacaye; y chë ndëtsbé ndábeñnaca chaojotsatše, polvëshe bochántsebema ca —Jesús tojánayana.

⁴⁵ Chë bachnangbe amëndayënga y fariseunga, Jesús chë jabuátambama cuentënga yojsëtsëtsnama, tmojanenótatšëmbona chëngbiana chca yojsóyebuambnama. ⁴⁶ Chora chënga tmojánbošena Jesús jishachana, pero entšangbiana imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

22

Chë casamento fiestama cuento (Lc 14.15-24)

¹ Chentšana Jesús tojanontsé cachiñe cuentëngaca chënga jabuátambana. Mëntsá tojánayana: ² “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefraca tojanopasacá. Chë rey yojamánda canÿe bëts fiesta jamama, chabe uaqiñabe casamentama. ³ Chora chë rey chabe oservënga yojichamuá chë ófjanënga jobiatšama, pero chë ófjanëngna ndoñe imonjouena jama. ⁴ As chë rey inÿe oservënga yojichamuá y mëntsá yojámëndaye: ‘Chë ófjanënga šmochjáuyana, ya saná stseboprontana ca. Sënjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiestama ca.’

⁵ “Pero chë ófjanënga ndoñe imonjouena. Canya, cachabe fshantse inabomnoye yojtsoñe; ínÿana chabe obuámnayíñe trabajuama yojtsoñe; ⁶ y ínÿengna, chë reybe oservénënga imojishëche, jabuache imojtsatsetšenaye y imojtsëbaye. ⁷ Y chë rey chë soyama yojouena ora, corente ibojtsetna. As chabe soldadënga yojichamuá chë oservénënga obánayënga chamuetsëbáyama y chëngbe bëts pueblo jetsángbotjuama. ⁸ Chora chabe oservénënga yojáuyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama. ⁹ Motsajna tsashenangoye y ndëmuanÿéngnaca chašmojánÿenënga, chë casamento fiestama šmochjúbuaja ca.’ ¹⁰ As chë oservénënga tsashenangoye imojábocana y nÿetscanga imojánÿenënga imojáchembo, cánÿiñe tšabe y bacna entšanga, y chca, chë tsbocnanoica jútjena yojtsemna entšángaca.

¹¹ “Chë ófjanënga jáñÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjoná. ¹² As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna. ¹³ As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infierno ye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ –cha yojayana.”

14 Jesús chca jacuéntama tojanpochocá ora, mēntśá tojánayana: “Chē fiestama ófjanēnga banga montsemna, pero chē bocacánēnga chocha jtsemnama n̄ye báseftanga. Er Bēngbe Bētsá banga jáchembuana chabe amēndayoye jamashēnguama, pero n̄ye báseftanga chocha mochántsemna ca.”

Chē Romoca bēts mandadbiama impuesto jtsat-squēcjnayama

(Mc 12.13-17; Lc 20.20-26)

15 Chentśana chē fariseunga tmojtsatanoñe y tmojanenoyeuná ntśamo Jesús tojayaniñe cha jisháchichiyana, as chca, mandadēngbeñe cha mal jaquédama. 16 Chama chēnga tmojanichamó básefta cachēngbe usetonēnga y ín̄yengna Heródesbe ústonēnga, Jesús jauyanama: —Buatēmbayá, bēnga fsēndētatsēmbo aca ndegombre soyēnga cnetsabuátambama y contsabuatambá ndegombre tśabe vida jtsebomnama, ntśamo Bēngbe Bētsá yomandacá, y ndoñe jatuenanana n̄ye ntśamo entśanga tmojatichamcá, er acbiama tondaye quenatámana nda más uamaná o nduamaná tomnana. 17 Chcasna, ¿ntśamo catjájuaboye? ¿Tśabá tayojtsemna, César, chē Romoca bēts mandadbiama, bēnga impuesto jtsatsquēcjnayana o ndoñe ca?

18 Jesús yojtsetátśēmbo chēngbe bacna juabnēngama; chíyeca tojanēyana: —Bacna entśanga, ntśamo ndegombre šmojuabnacá ndin̄yin̄nayēnga. ¿Ndáyeca tśēngaftanga šmojtseboše chē sóyeca atše jisháchichiyama? 19 Chē šmatsquēcjná crocénana šmin̄yin̄yé ca.

As canye crocénana tmojanoyé. ²⁰ Jesús tojanatjá: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

²¹ Y chënga tmojanjuá: —Césarbe jubiá; cha chca enduabaina ca.

As Jesús tojanëyana: —Césarbioye šmoctoyiye cha ibotocana soye; y Bëngbe Bëtsana cha ibotocana soye ca.

²² Chënga chca tmojanuena ora, ojnanánënga imojtsemna. As chënga cachcá Jesús tmojanonyá y tmojtsatanoñe.

Obanënga jtayenama Jesús tmojantjá

(Mc 12.18-27; Lc 20.27-40)

²³ Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá: ²⁴ —Buatëmbayá, Moisés tojánayana nderado canye boyá tojóbana básenga ntjëftsabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiama básenga jtsabamnana ca. ²⁵ Chcase, canye bëngbentše canyësëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. ²⁶ Y cháftaca cachcá tonjanopasá, chë inye uabentsáftaca cachcá, y cachcá chë inyëngaftaca y chë ústonoca uabentsáftacnaca. ²⁷ Y chentšana chë shembásanaca tontsanóbana. ²⁸ Y morna, chë obanënga chamojtayena ora, ¿ndabe

chë canÿsëfta catšatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

²⁹ As Jesús tojanějua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. ³⁰ Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá.

³¹ Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguiñe tojánayanama? Cha tonjánayana:

³² “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³³ Chë entšanga chca tmojanuena ora, ojnánanënga imojtsemna ntšamo Jesús vojtsabuátambama.

*Chë más bëts uámana mando
(Mc 12.28-34)*

³⁴ Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna, ³⁵ y canÿa chënguentsá, ley abuatambayá, Jesúsbioye jisháchichiyama tbojantjá: ³⁶ —Buatëmbayá, ¿Moisesbe leyiñe ndayá chë más bëts uámana mando yomna ca?

³⁷ As Jesús tbojanjuá: —“Utabná Bëngbe Bëtsá cochtsebobonshana nÿets acbe ainánaca, nÿets

espíritoca y nyets juábnaca.” ³⁸ Chë soye endmëna chë más bëts uámana mando y nyetsca mandëngama chë natsanoca entsemna. ³⁹ Y quem inye soye, chë natsana mandcá endenoparecena. Endayana: “Ndëmua entšánaca cochtsebobonshana, ntšamo cach aca cuenobobonshancá ca.” ⁴⁰ Chë uta mandentšana endóbocana lempe ntšamo Moisesbe leyíñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca —Jesús tbojaniyana.

¿Cristo, ndabe entšábentšana yomna?

(Mc 12.35-37; Lc 20.41-44)

⁴¹ Chë fariseunga cabá cachentše imojtsemnëntscuana, ⁴² Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuyanabiamana, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

⁴³ As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

⁴⁴ Bëngbe Bëtsá, atšbe Utabná Crístbioye tbojaniyana:

atšbe catšbioica mótbema,
atšbe obenánaca acbe uayayënga acbe cucuatšíñe
chamoquedama chjamëntscuana ca.

⁴⁵ ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

⁴⁶ Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

23

Jesús chë fariseungbiamá y ley abuátambayëngbiamá tojánayana, chënga ndoñe tsabá montsama ca

(Mc 12.38-40; Lc 11.37-54; 20.45-47)

¹ Chora Jesús, entsanga y chabe uatsjëndayënga mëntśá tojanëyana: ² “Chë fariseunga y chë ley abuátambayënga cmondbëtsabuatambaye ntśamo Moisesbe leyënguiñe iuayancá. ³ Chcasna, tsëngaftanga cmontsamna chënga joyaunayana y ntśamo tcmojauyancá, cachcá jtsamana. Pero ndoñe śmattsama ntśamo chënga mondbetsamcá, er chënga ndoñe ntsamana ntśamo mondbetsabuatambacá. ⁴ Mo canye entśá, couáybioye uauta uasmanësha juasmayana y cachá tondaye tontsasmancá, chënga entsanga jtsamëndayana bëtscá mandënga chamotsocumplínama, pero cachënga ni mo batśatema ntsamana chë mandënga jtsocumplínama. ⁵ Chënga lempe jtsamana nye entsanga chamotsënyama. Chënga chë ínÿengbiamá más Bëngbe Bëtsá imobobonshana ca chamotsejuabnama, chënga monduamana tëntśa sëndachëjënguiñe juabemana ntśamo Bëngbe Bëtsabe uabemana palabrënguiñe endayancá, y juentsaca y buacuatśiñe chëjënga jenábatsëcana y sibiajana nya tëntśa uasebtotonanëjuangá jtsichëtjonana. ⁶ Chënga jtsebošana chë fiestënguiñe nya quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe. ⁷ Chënga jtsebošana tsáshenañe entsanga nya respétoca

chamotsacheuanama, y ‘abuátambayënga ca’ chamotsachembuanámna chënga jtsebošana.

8 “Pero tšëngaftangna ndoñe šmattseboše entšanga ‘abuátambayënga ca’ chacmotsachembuanama, er nyetsca tšëngaftanga mo catsatangcá šmondmëna, Bëngbe Bëtsábeñe betsošbuachéyeca, y nye canya endmëna tšëngaftangbe Buatëmbayá. ⁹ Tšëngaftanga ‘taitá ca’ chë ley abuátambayënga šmondbëtsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nye canye Taitá šmondbomna, chë celoca endmëná. ¹⁰ Ndoñe šmattseboše entšanga ‘mándayënga ca’ chacmotsachembuanama; er nye canye Mandayá endmëna y cha Cristo endmëna. ¹¹ Nda tšëngaftangbeñe chë más uamaná tojtsemná bontsemna chë ínÿenga jtsaservénana. ¹² Nda cachá bëtsá tojtisenobiamná, nduamaná mochántsebema; y nda cachá nduamaná tojtisenobiamnana, más bëtsá mochanjábema.

¹³ “¡Tša lastema tšëngaftangbiama, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmonsama entšangbiama puerte totcá chaotsemna Bëngbe Bëtsabe amëndayoye jamashënguama, mo bëšáša cuaftsebiatamiancá. Pero ni cach tšëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana. ¹⁴ ¡Tša lastema tšëngaftangbiama, ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga chë

viudángbioye chë tmobomna soyënga jtsabacayana, y entsangbe delante tsábá chacmotsënyama y chënga šmojtsaíngñayama ndoñe chamondëtsetatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tšëngaftanga más jabuache ínÿengbiamá cmochanjácastigaye.

¹⁵ “¡Tša lastema tšëngaftangbiamá, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga ba luarënguenache jtsajnana canÿa tšëngaftangbe ustoná onguayiñe, y šmojínÿena ora, tšëngaftanga jamana cha chaotsemna tšëngaftangbiamá uta soye más merecido buajoná infiernoye chaotsama.

¹⁶ “¡Tša lastema tšëngaftangbiamá; tšëngaftanga šmondmëna mo jtanënga entsanga unachayëngcá! Tšëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’ ¹⁷ ¡Obëjémënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiamá josérviamá jtsemnana, nÿe Bëngbe Bëtsabe bëts yebnocá chë castellano tojtsemnayeca. ¹⁸ Tšëngaftanga mëntšánaca šmondbëtsichamo: ‘Nda ínÿabioye tbojašbuachená ndayánaca jamama y tojayana chë altarama

chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiamama altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’ ¹⁹ ¡Nduabínÿnënga! ¿Ndayá más uámana soye yomna, chë Bëngbe Bëtsabiamama tmojacjá soyënga o chë altar? Chë tmojacjá soyënga Bëngbe Bëtsabiamama josérviamama jtsemnana, nÿe chë altaroca chë soyënga tmojacjáyeca. ²⁰ Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámna cha jtsejúraryana. ²¹ Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiamama cha jtsejúraryana, cha chë chentše oyená. ²² Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámna, chentše yotbemanabiamama.

²³ “¡Tša lastema tšëngaftangbiamama, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga Bëngbe Bëtsabiamama jtsequëcjnyana chë jajañentša sananga bnëtsanentšana canÿe soye; chë binche matatémënga menta, anis y chë cominentša sanánna. Pero tšëngaftanga nÿe batšá jtsamana chë leyentša más uámana soyënga, mo chë nÿetsca entšanga cachca derechënga chamotsebomnama, ínÿënga jtsalastemánana y chë tšabe soyënguiñe jtsiyenana, chca, entšanga tšëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tšabe soyënga amana ntjajbanacá. ²⁴ ¡Jtanënga

entsanga unachayënga! Tšëngaftanga chë base soyënga jamama puerte jtsenócochinÿenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tšëngaftanga šmontsemna mo canÿe entšá ndayá tojtsabuchetjca bayëfja jtsejuánama, ndoñe ntjasama, jasama ndoñe yondëlesenciana ca chë leyiñe iuayana causa. Pero šmondmëna mo entsangcá ndëmuanÿënga camellbe mëntšena jasana, y chë leyiñe endayana chcana jasama ndoñe yondëlesenciana ca.

²⁵ “¡Tša lastema tšëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo entsangcá ndëmuanÿënga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentsénana entsangbiama mo tšabengcá jtsinÿnama, pero tšëngaftangbe ainanentše jútjena entsemna nÿe jtsatbëbanama y nÿe bëtscá soyënga jésebonnama juabnëngaca.

²⁶ ¡Nduabinÿna fariseo! Cochjshetsajbaná ainaniñe bacna soyënga bomnana. Chamna nÿe tšabe juabnënga chentše cochtsebonna, y lempe ntšamo chacojtsamcá y entsanga chamojtsonÿacá tšabá echántsemna.

²⁷ “¡Tša lastema tšëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana

soyëngaca. ²⁸ Tšëngaftanga chca šmondmëna: entšangbe delante tšëngaftanga jtsinÿnana mo nÿetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entšanga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

²⁹ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nÿetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnayëse; ³⁰ y chentšana šmondbëtsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmënjanëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana. ³¹ Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entšanguentšana šmomnama. Y mora cach tšëngaftangbe bëts taitangcá tšëngaftanga šmontsama. ³² ¡Mopochocanga jamama chë bacna soyënga, chë tšëngaftangbe bëts taitanga tmojanbojatšé jamama soyënga!

³³ “¡Mëtšcuayënga, mëtšcuaye entšanga!

¿Ndayá šmochjama chë infiernoca uabouana castigüentsana jótsbocama? ³⁴ Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatsëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetsenaye y nyetsca bëts pueblënguenache chënga šmochandúcamená. ³⁵ Chíyeca, tšëngaftangbiana nyets castigo echántsemna chë nyetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. ³⁶ Ndegombre cbëyana, lempe chë soyëngama castigo morsca entsangbiana echántsemna ca” —Jesús tojánayana.

*Jesús tojanošachna Jerusalemoca entsangbiana
(Lc 13.34-35)*

³⁷ Mëntsánaca Jesús tojánayana: “¡Jerusalenentša entsanga, Jerusalementša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchénganjana jtsëbáyama. Bueta soye atše sënjábošena tšëngaftanga átšbioye júbuajana, mo canÿe tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena. ³⁸ Y šmochjinÿe, atše mora cachcá cbochanjesënyaye, y chca, atšna enánanga cbochanjésabashejuana,

mo canÿe yebna cachcá tcojesonÿá y énañe tcojeseboshjoncá. ³⁹ Y atše cběyana, ndegombre tšěngaftanga morscana atše ndoñe más quešmochátinÿe; y atše šmochántinÿe mēntšá chašmojtsichamo ora: ‘¡Corente bendición bomná, Běngbe Utabnabe obenánaca tojabá ca!’ ”

24

Jesús tojánayana chě Běngbe Bětsabe běts yebna lempe mochjánpochocama

(Mc 13.1-2; Lc 21.5-6)

¹ Jesús Běngbe Bětsabe běts yebnentsšana tojěftsanbocna y ya yojtsaye. Chorna chě uatsjéndayěnga chábioye tmojanobeconá y tmojanontšé nÿetsca chentša běts yebněnga cha jinÿinÿiyana. ² Chora Jesús tojaněyana: “Tšěngaftanga lempe šmontsonÿá. Ndegombre šcuayana, quem Běngbe Bětsabe běts yebnentsše ndoñe queochaisoquéda ni mo canÿe ndětsbé inÿe ndětsbé juatsboye. Lempe mochantseepochóca ca.”

Ntsamo yochtsemna quem luare jopochócama tempo chaojtsobeco ora

(Mc 13.3-23; Lc 21.7-24; 17.22-24)

³ Chentšana chěnga Olivos tjashoye tmojána. Jesús choca yojtsetbemana; as, chě uatsjéndayěnga tmojanobobeconá nÿe chěngbiamá jatjayama, mēntšá: —Směyana. ¿Mocna ora chě soyěnga Běngbe Bětsabe běts yebnoca yochjochněngo ca? ¿Ndayá yochjochněngo běnga jinÿanÿiyama aca jésabama ora ya yojtsemnama y quem luare jopochócama tempo yojtsobecuama ca?

⁴ As Jesús tojanjuá: –Cuedado šmochtsebomna ndocná chacmondáingñema. ⁵ Banga mochanjabo y mochantsabíchamo chënga atše imomna ca. Mochántsichamo: “Atše chë Cristo sëndmëna ca” y chca, ba entšángbioye mochanjáingñaye. ⁶ Tšëngaftanga šmochanjouena canye luarentša entsanga inye luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochátsmëna. ⁷ Canye luarentša entsanga inye luaroca entšángaftaca mochántsentsjanaye, y canye amëndayábentša entsanga inye amëndayábioca entšángaftácnaca; y ba luarënguifne shëntsana echanjóshjango y chentša fshantsënga echanjuangmëmëna. ⁸ Masque chca jasúfriase, más chcoye cabá más mochanjatsúfria.

⁹ “Chora, entsanga ínÿengbe cucuatšifne cmochanjábashejuana chacmatsetšenama y cmochantsëbaye; y atšbe ústonënga bëtsemnayeca nÿetsca luarënguentša entsanga cmochantsëbuayënja. ¹⁰ Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama ínÿengbe cucuatšifne mochántsënboshjuana. ¹¹ Banga Bëngbe Bëtsabe ndoñe ndegombre juabna oyebuambnayënga mochanjábocana y ba entsanga mochanjáingñaye. ¹² Nÿetšá bacna juabnënga entsangbe ainaniñe echanjésemna, y chë causa banga ndoñe quemochátenbobonshana. ¹³ Pero nda nÿets tempo átšbeñe ošbuachiyá totsomñe, atsbocaná

echántsemna. ¹⁴ Y quem tšabe noticiënga Bëngbe Bëtsabe amëndayama nyets quem luariñe entšángbioye mochántsbuayiynaye, chca, chë ndegombre soyënga Bëngbe Bëtsabiana chënga chamotsetatšëmbuama. Chentsana cocayé quem luare jopochócama tempo echántsemna.

¹⁵ “Chë Bëngbe Bëtsabe juabna oyebuambnayá Daniel chë puerte uabouana soye tojëftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; ¹⁶ entšanga Judeoca chamojtsemnënga, batsjabengoye chamotsacheta. ¹⁷ Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jëftsábocnama. ¹⁸ Y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. ¹⁹ ¡Tša lastema chë tempo ngomámanënga chamojtsemnëngbiana o ochóchaye šešonga chamojtsabamnëngbiana! ²⁰ Bëngbe Bëtsá šmochtseimpadana chë tšëngaftanga jachetama, uaftena tempo ora o canÿe ochnayté ndoñe chaondëtsemnama. ²¹ Chca, chora puerte ngménana echántsemna. Tša jabuache ngmenancá, quem luare jabojátšama orscana y méntscoñama y más chcoye, cachcá ngménana ndoñe ntjamnana. ²² Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha

corente endábabuanÿeshanayeca, echanjama yapa bën tempo ndoñe chaondétsemnama.

²³ “Chora nderado nda cmochanjáuyana: ‘Minÿenga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. ²⁴ Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëgnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëgnaca.

²⁵ Atše ya chama tcbonjabuayená chë tempo cabá ndóshjango ora. ²⁶ Chíyeca, nderado chënga chacmojáuyana: ‘Minÿenga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canÿe tsoca entsemna ca’, chama ndoñe šmattsayaunana.

²⁷ Er ntšamo chë tojatcuinÿe ora, shinÿe bocanoicana y shinÿe uenatjëmbambanëntscoñe jabuashinÿinÿenancá y ba luarënguenache entšanga jobenayana jinÿama, cachcá, Bëngbe Bëtsá Entšá tbojanbemá quem luaroye chaojésabo te, entšanga nÿets luarentše mochanjobenaye cha jinÿama. ²⁸ Canÿe obanabe cuerpo tojtsemnama chë gallinacënga tmojátatsëmbona y cachora chë béconana jojotana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mc 13.24-37; Lc 21.25-33; 17.26-30, 34-36)

29 Měntšánaca Jesús tojánayana: “Chë puerte ngménana tempo chaojochnëngüentsana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana. 30 Chora canÿe soye celoca echanjónÿna entšanga jinÿanÿiyama Bëngbe Bëtsá Entšá tbojanbemá ya iuaisaboma, y nÿets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantšetëshiñe echántsaboje, puerte obenánaca y corente buashinÿinÿaniñe. 31 Y canÿe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë inÿoica juachóntscoñe.

32 “Ntsamo higo betíyeca endbétso pasanama šmochjuatsjinÿe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatsëmbuana. 33 Cachcá, lempe chë ndayama tšëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnana. 34 Ndegombre cbëyana, lempe chca echanjochnëngo, morsca entšanga cabá ndóbana ora. 35 Celoca y quem luare echanjopochóca, pero atšbe palabra ndocna te queochaisopochóca.

36 “Pero ndayté y ntseco ora Bëngbe Bëtsá Entšá tbojanbemá yochjésabama, ndocná

quenátstatšëmbo, ni chë celoca angelotémënga, ni Bëngbe Bëtsabe Uaquiñá. Nye chë Taitá chama yotátšëmbo.

³⁷ “Ntsamo Noé yojëftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. ³⁸ Noebe tempo, chë uabouana uaftena cabá nduáshjango ora, entsanga imnasaye, imnofšësnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguëntscuana. ³⁹ Chënga tondaye imonjántatšëmbo, nye chë uabouana uaftena tojánashjango y nyetscanga tojtsanëyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entsanga chama mochanjátatšëmbona. ⁴⁰ Chora uta boyabásata jajoca bochántsemna; canya mochanjesbetše y chë ínÿana ndoñe. ⁴¹ Uta shembásata bochántsejanÿcoye; canya mochanjesbetše y chë ínÿana ndoñe.

⁴² “Chíyeca cuedado šmochtsebmna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama. ⁴³ Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatšëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama. ⁴⁴ Chíyeca, tšëngaftángnaca šmochtseprontana, er Bëngbe Bëtsá Entšá tbojanbemá echanjésabo, entsanga chama tondaye chamontsejuabná ora ca” —Jesús tojánayana.

*Chë tšabe oservená y chë ndoñe tšabe oservená
(Lc 12.41-48)*

⁴⁵ “¿Nda yomna chë oservená ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjëftsebošjona chë yebnentšënga chaotsanÿenama y jasama tojtsemna ora chaújuatšema. ⁴⁶ Chë nduiño tojtashjango ora, chë oservenábioye tbojínÿena ntšamo ibomncá jtsamëse, chë oservená puerte oyejuayá echántsemna. ⁴⁷ Ndegombre cbëyana, chë nduiño chábioye bochanjaimpáda lempe chabe soyënga chabotsinÿëñama. ⁴⁸ Pero chë oservená bacna entšá tomnësna, jajuaboyana chë nduiño ndoñe betesco yochantabo ca, ⁴⁹ y as, cha jóntšana chë inÿe oservénënga jtsajantšetayana, becá jtsesana y jtsetmuana inÿe tēmiëngaftaca. ⁵⁰ Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. ⁵¹ Chora chë nduiño jabuache bochantsecastíga, y ntšamo chë bacna entšanga ndayá ndegombre tmojuabnacá ndinÿinÿnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftšësjonaye ca” —Jesús tojánayana.

25

Chë bnëtsana tobiasëngbiama cuento

¹ Mëntšánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canÿe casamento fiestentšë tojanopasacá. Mëntšá yojobása:

Bnëtsana tobiasënga chëngbe querosine uajuinÿanëshangá imojëftsájaca y imojábocana chë casamentero boyabása jajébenguama. ² Chë bnëtsana tobiasënguentsana, shachnënga sempre enójuabnayënga immamna, y chë inÿe shachnënga, ndenójuabnayënga. ³ Chë ndenójuabnayëngna chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama. ⁴ Pero chë sempre enójuabnayëngna chëngbe uajuinÿanëshangá imojëftsájaca y querosínënaca botellësënguiñe imojuabuyamba. ⁵ Chë casamentero boyabásana ndoñe betsko yonjabo, chíyeca nÿetsca tobiasënga ocnayana yojubuache y imojtsomaná. ⁶ Mo tsëntseto orna, chënga imojouena mëntsá uayebuáchana: ‘¡Chë casamentero boyabása ya endabó! ¡Jajébenguama mobocana ca!’ ⁷ Asna, nÿetsca tobiasënga imojotsbaná y imojóntša chë uajuinÿanëshangá juabopróntana. ⁸ Chorna, chë shachna ndenójuabnaye tobiasënga chë inÿe shachnënga siempre enójuabnayëngbioye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinÿanëshangá tojontsé jtsafsananana ca.’ ⁹ Pero chë siempre enójuabnayëngna imojayana: ‘Ndoñe. Tchojubuatšatase, tšëngaftangbiana y bëngbiámnaca querosine echántsashbe. Más tšabá entsemna, chë querosine mondbétsenoye chašma y tšëngaftangbiana chašmauábuamiñe ca.’

¹⁰ “Chorna, chë shachna ndenójuabnaye tobiasënga imojá chë querosine jauabuámiyama;

pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bësása imojtatame. ¹¹ Chentšana chë inÿe tobiašënga imojáshjajna y mëntšá imojtsichamo: ‘¡Taita, Taita, šmebëtafjo ca!’ ¹² Pero chë casamentero boyabása yojójua: ‘Ndegombre cbëyana, tšëngaftanga ndoñe quecbatëbuatma ca.’

¹³ “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento (Lc 19.11-27)

¹⁴ “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama. ¹⁵ Cányabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe. ¹⁶ Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye. ¹⁷ Chë uta uaranga yojoyëngacñá cachcá yojama y inÿe uta uaranga yojábotiye. ¹⁸ Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentsana baytese chë oservénengbe amëndayá yojtashjango y yojóntša chë crocénánama chënga jatjayana. ²⁰ Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’ ²¹ As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’ ²² Chentsana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’ ²³ As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

24 “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canÿe tšátjaye entšá comnama; acna chë ndoñe tconjajé chentše saná jocñana y chë ndoñe tconjujqüeshe luarentše jobuátbanana. ²⁵ Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ ²⁶ As chë mandayá ibo-

jojuá: ‘¡Bacna oservená y oyenjáyá! Chë ndayentše ndoñe tijajé chentše saná jocñana y chë ndoñe tiju-jquëshe luarentše jobuátbanana atše tsuamanama icojátatšëmbëse,²⁷ aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtóyëngacñe y chë chentšana to-joboté crocénanënaca ca.’²⁸ Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca.’²⁹ Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tond-bomnábioyna, chë batšatema tobomna sóynaca jt-sebocana ca.’

³⁰ “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftšëjonnaye ca’ ” —Jesús tojanëyana.

Ntšamo chë quem luare jopochócama ora, nyetsca entsangbiana mochjayana

³¹ Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyetsca chabe angelotémëngaftaca chaojésabo ora, chë reybiama puerte buashinÿinÿana tbemaniñe echanjót'bema.³² Chora nyets luarëngoca entsanga chabe natsanoica mochanjénefná, y cha, entsanguentšana ínÿenga echanjábacacaye, mo chë oveshënga abujëñÿa oveshënga chivëngbentšana endbetsabacacnaycá.³³ Chë abujëñÿana, oveshënga chabe catsbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga

chabe catšbioica echanjúbuaja y chë bacna entšangna chabe uañicuayoica echanjátsaye.

³⁴ “Chorna chë Rey, Bëngbe Utabná, chabe catšbioica chamojtsemna entšanga echanjáuyana: ‘Tšëngaftanga, Atšbe Taitá tšábeñe cmétabna, mabënga ca; atšbe amëndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana.

³⁵ Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafsé; inye luarocana ashjanganacá sënjánana y posada šmonjanántšame. ³⁶ Enašá sënjánana y entšayá šmonjanëtšetá jtichëtjuama; šocá sënjanájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

³⁷ “As chë Bëngbe Bëtsá chabe bominyiñe tšábenga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninye y tcbënjánajuatšé? ¿Ntseco uajuendayá tcbënjáninye y tcbënjanafsé? ³⁸ ¿O ntseco inye luarocana ashjanganacá tcbënjáninye y posada tcbënjánántšame, o enašá y entšayá jtichëtjuama tcbënjánëtšetá? ³⁹ ¿O ntseco šocá o cárceloca utamená tcbënjáninye y jauatsëtsayama tifjana ca?’

⁴⁰ “As chë Utabná echanjóju: ‘Ndegombre cbëyana, lempe ntšamo chë atšbe catšátanguentsana chë más batšá uámanëngaftaca šmojamcá, cach átšeftaca šmonjanma ca.’

⁴¹ “Chentšana chë Utabná chabe uañicuayoica chamojtsemna entšanga echanjáuyana: ‘Atšbentšana mojuánanga atšbe Bëtsabe

uaboténënga. Infiernoye motsajna, chë ndocna te queochátsfsana íñeshoye; choca endëprontana Šatanás y chabe ustonëngbiana. ⁴² Er atše shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanafsé; ⁴³ inye luarocana ashjanganacá sënjánana y ndoñe posada chešmatanántsame. Enašá sënjánana y ndoñe entsayá chešmatanëtsetá; šocá sënjanájona y cárceloca sënjanëtámena y ndoñe chešmatanatsëtsá ca.’

⁴⁴ “As chënga mochanjatjaye: ‘Bëngbe Utabná, ¿ntseco tcbënjáninye shëntseca o uajuendayá, o inye luarocana ashjanganacá, o enašá, o šocá o cárceloca utamená y ndoñe tcbënjanajabuache ca?’

⁴⁵ “Y chë Utabná echanjójua: ‘Ndegombre cbëyana, tšëngaftanga ntšamo chë atšbe catšátanguentsana chë más batšá uámanëngaftaca, ndoñe šmonjanmcá, átšeftaca cach ndoñe chešmátanma ca.’

⁴⁶ “Chëngna infiernoye nýetsca tescama mochantsësetjango, y chë Bëngbe Bëtsá chabe bominyiñe tšábenga tojábiamëngna chë nýetsca tescama yomna tšabe vida mochántsebojna ca” —Jesús tojánayana.

26

Entšanga tmojanjuabó ntšamo jamëse Jesús jishachama

(Mc 14.1-2; Lc 22.1-2; Jn 11.45-53)

¹ Lempe chca tojánayanentsana, Jesús chabe uatsjëndayënga tojanëyana: ² “Tšëngaftanga šmondëtatšëmbo, uta te y chë Bashco fiesta

echántsemna y Bëngbe Bëtsá Entśá tbojanbemá ínÿengbe cucuatśiñe mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

³ Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentse.

⁴ Tmojanenojuabó y tmojanenoyeuná jtseíngñase Jesús jishachama, y jtsóbama. ⁵ Pero imojtsichamo: “Quem fiestëntscuana ndoñe, entsanga yapa muanjóntśa enbouenanana ca.”

Canÿe shembása botamana uanguëtse béjaye Jesusbe bestśaśiñe tbojanbueścja
(Mc 14.3-9; Jn 12.1-8)

⁶ Jesús Betania pueblentse yojtsemna, Simón chë bacna nguayanánaca šocá ca uabobuatmabe yebnentse. ⁷ Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtse béjayeca. Jesús mesëshentse yojtsemnëntscuana, chë shembása chabe bestśaśiñe chë botamana uanguëtse béjaye tbojanbueścja.

⁸ Chë uatsjëndayënga chca tmojáninÿe orna, tmojanotjayaná y tmojanontśé ichámuana: —¿Ndáyeca nÿe bonamente chë soye chca yojtsemna ca?
⁹ Chamna, matmënjobenanga chë béjaye becá crocenánama juiyana y chánaca ndbomnjëmënga matmënjújabuache ca.

10 Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna. 11 Er chë ndbomnjëmëngna nyets tempo tšëngaftangbeñe mochanjëftsemna, pero atše tšëngaftangaftaca ndoñe nyets tempo quicháisemna. 12 Ntšamo chë shembása tojamcá, chë botamana uanguëtše béjaye atšbe cuerpiñe jabuéscjëse, cha šontseprónta atše juatbontsa tescama. 13 Ndegombre cbëyana, quem luariñe ndayéntšnaca Bëngbe Bëtsabe soyëngama chamojtsabuayiyná chentše, ntšamo quem shembása tojamámnaca beca mochanjëftsóyebuambaye, chca, entšanga chabiamana chamotsenójuabnama ca —Jesús tojanëyana.

Judas tojána bachnangbe amëndayëngbioye, Jesús chamuishachama

(Mc 14.10-11; Lc 22.3-6)

14 Canÿa chë bnëtsana uta uatsjendayënguentšá, Judas Iscariote ca uabainá, tojána bachnangbe amëndayëngaftaca jencuéntama. 15 Y tojanatjá: “¿Ntsachetšá šmatjtabuénaye y Jesús tšëngaftangbe cucuatšíñe cbochjayentšbashejuana ca?”

As chëngna, unga bnëtsana ralbenga tmojtanabuená. 16 Y cach orscana Judas yojtsenguaye ntšámose y ntseco ora, Jesús chëngbe cucuatšíñe jayentšbáshejuanama.

Jesús chabe uatsjëndayëngaftaca Bashco saná tojanse

(Mc 14.12-25; Lc 22.7-23; Jn 13.21-30; 1 Co 11.23-26)

17 Chë Bashco fiesta bojatšenté, chë levadúraca ndëpormana tandëse jasama fiestëntscuana, chë uatsjëndayënga Jesúsbioye tmojanobeconá y tmojantjá: —¿Ndémoca aca cojtseboše bënga fchauptontama Bashco saná chacosama ca?

18 Ý Jesús tojanéyana: —Chë bëts puebloye mot-sajna canye bacobe yebnoye y cha šmochjauyana: “Buatëmbayá tonjayana: ‘Atšbe ora ya echan-jobuache, y atše acbe yebnoye sëntsá, Bashco fiesta jamama atšbe uatsjëndayëngaftaca ca.’ ”

19 As chë uatsjëndayënga tmojanma ntšamo Jesús tojanamëndacá y chë Bashco fiesta saná tmojan-prontá.

20 Y tojanibétata orna, Jesús chë bnëtsana uta uatsjëndayëngaftaca mesëshentše yojtsemna.

21 Y imojtšesantscuana, Jesús tojanéyana: — Ndegombre cbëyana, canya tšëngaftanguentšá uayayëngbe cucuatšišne šochanjáboshjona ca.

22 Chora chë uatsjëndayënga puerte ngménaca imojtsemna y tmojanontsé canyánya Jesús jat-jayama: —Bëngbe Utabná, ¿nderado atše cha chtsemna ca?

23 As Jesús tojanéjua: —Canya nda chabe tandëse entsefchecuacná cach atše sëntsefchecuacná šcnenentše, cha uayayëngbe cucuatšišne šochanjáboshjona. 24 Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrënguifne chabiamana iuayancá; pero, itša lastema chë bochjáboshjonabiamana! Más tšabá chabiamana manjamna ndoñe ntjónynana ca.

25 As Judas, chë boshjuaná, Jesúsbioye tbojantjá: —Buatëmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

²⁶ Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjéndayënga tojanatšatá. Y mëntsá tojánayana: “Mocñënga, mosënga. Atšbe cuerpo entsemna ca.”

²⁷ Chentšana, canÿe coptema vínoyeca tojanaca, Bëngbe Bëtsábioye tbojtanchuá y chë uatsjéndayënga tojanëfsaşé. Y mëntsá tojánayana: “Nÿetscanga quem coptémentšana mofšenga. ²⁸ Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aíñe yochjochnënguama. Chë buiñe bëtscá entšangbiana echanjuábuashana, chëngbe bacna soyëngama perdonánënga chamotsemnama. ²⁹ Y ndegombre cbëyana, morscana atše ya ndoñe más chë uvasentšana obocniye quichaisofsiye. Chë tsëm vínoye tšëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mc 14.26-31; Lc 22.31-34; Jn 13.36-38)

³⁰ Bëngbe Bëtsá jëtschuayama tmojancantá chentšana, Olivos tjashoye tmojëftsanbocana.

³¹ Choca Jesús tojanëyana: —Tšëngaftanga nÿetscanga quem ibeta átšbeñe ošbuáchiyana šmochantsobuetše y šmochántšacheta, er Bëngbe Bëtsabe uabemana palabrenguiñe, cha mëntsá tojánayana: “Chë oveshëngbe abujënÿa

chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. ³² Pero obanënguentsana chaitayenentsana, tšëngaftangbe natsana Galileoye chanjá ca –cha tojanëyana.

³³ Chora Pedro tbojanjuá: –Masque nyetscanga ácbeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

³⁴ As Jesús tbojaniyana: –Ndegombre cbëyana, cam íbeta, ngallo cabá ndëcánta ora, aca unga soye cochanjayana ndoñe šconduabuatma ca.

³⁵ Pero Pedro tbojaniyana: –Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetsca uatsjëndayëgnaca cachcá imojtsichamo.

Getsemaní luarentše Jesús Bëngbe Bëtsáftaca tbojanencuentá

(Mc 14.32-42; Lc 22.39-46)

³⁶ Chentsana, Jesús chabe uatsjëndayëngaftaca canyë luare Getsemaní ca uabáinoye tojána. Choca tojanëyana: “Muentše motbiamá, chëntscuana atše choye chanjá Bëngbe Bëtsáftaca jencuëntama ca.”

³⁷ Y Pedro y chë Zebedeobe uta uaquiñata tojëftsanëbiatše. Choca yojóntša puerte ngménaca y corente cochtsetšenaná jtsemnama. ³⁸ Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

39 Chora Jesús más natsanoye tojána, tojanoshamentśé y fshantsóntscoca yojotsejbéna, y mēntśá Bēngbe Bētsáftaca tbojanencuentá: “Atśbe Taitá, jopódianēse moma atśe japadésama ndoñe chašondětsemnama. Pero ntśamo atśe stseboścá ndoñe chaondětsemna, sinó ntśamo aca cojtseboścá ca.”

40 Chentśana, Jesús chabe unga uat-sjéndayēngbioye tojtanabo y chēngna imnētśomañe. Chca tojánanyēna ora, Pédrēbioye tbojanianyana: “¿Ni mo canye horatema tśēngaftanga šmonjobená átśeftaca jtsefśnana ca? 41 Smochtsefśna y Bēngbe Bētsáftaca šmochtsencuéntaye, chca, bacna soye jamama ndoñe chacmondócochēnguama. Tśēngaftanga ndegombre šmontseboše espíritoca Bēngbe Bētsá joyeunayama, pero cuerpiñe añemo ndoñe queśmátsbomna ca” —Jesús tojanéyana.

42 Uta soyama tojtesaná y mēntśá Bēngbe Bētsáftaca tbojanencuentá: “Atśbe Taitá, atśe japadésama ndoñe chašondětsemnama jamama ndoñe jopódianēsna, nye ntśamo aca cojtseboścá chaotsemna ca.”

43 Y tojtanabo ora, chē uatsjéndayēnga cachiñe imnētśomañe; yapa ocnaye causa nye imojtsefshétana. 44 As Jesús cachcá yojēftsēnyaye, y ungama cachiñe tojtesaná Bēngbe Bētsáftaca jencuéntama, y cach palabrenga tojánayana.

45 Chora chē uatsjéndayēngbioye tojtanabo y tojanéyana: “¿Cabá šmotsomañe y šmotsochñañe ca? Ya ora tocjobuache, Bēngbe Bētsá Entśá tbojanbemá bacna soye amēngbe cucuatśiñe mochanjáboshjona. 46 Motsbananga, cuajna. Minyēnga, chē boshjuaná ya entsebeconá ca.”

Uayayënga Jesús tmojánishache
(Mc 14.43-50; Lc 22.47-53; Jn 18.2-11)

⁴⁷ Jesús cabá yojtsóyebuambnantscuana, Judas, canÿe chë bnëtsana uta uatsjendayënguentśá, tojánashjango, y cháftaca imojtsemna ba entśanga espadëjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga. ⁴⁸ Judas, chë boshjuaná, tojanjuabó ntśamo jamana entśanga jinÿanÿiyama ndëmua Jesús bëtsemnana. Chíyeca yojáuyana: “Nda chajjauámocho, cha echántsemna. Smochjishache ca.” ⁴⁹ Cachora Judas Jesúsbioye tojanobeconá y tbojanchuá: —Buajtana, Buatëmbayá ca.

Y tbojtanámocho.

⁵⁰ Jesús tbojaniyana: —Enutá, moma chë ndayá jabomama tcojabo ca.

Chorna, chë entśanga tmojanobeconá, Jesús tmojánishache y tmojanánatse.

⁵¹ Chca orna, canÿe enutá Jesúseftaca yojtsemná, chabe espadëja tojanenosëngbotëntśena, y chë bachnangbe más uámana amëndayabe oservenábioye canÿe matscuaše tbojtsanëštjango.

⁵² As Jesús tbojaniyana: “Espadëja matosëngbuajonÿá. Nda espadëjaca tbojóba chana, cach espadëjaca echanjóbana. ⁵³ ¿Aca ndoñe condëtatšëmbo, atše atšbe Taitábioye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca? ⁵⁴ Pero chcasna, ¿ndayá Bëngbe Bëtsabe uabemana palabrënguiñe endayancá ntśamo nanjochnëngo?

Chiñe endayana ntšamo entsopasancá jochnënguama canmëna ca.”

⁵⁵ Cachora Jesús entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entšá cuaftsemncá ca? Atše cada te Bëngbe Bëtsabe bëts yebnocá tšëngaftangaftaca sënjántbemana abuátambaye, y choca ndoñe chešmánishache.

⁵⁶ Pero lempe quem soyënga chca entsopasana, cachcá chaotsemnana ntšamo Bëngbe Bëtsabe uabemana palabrénguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nÿetsca uatsjëndayënga tmojt-sanëuatjaná y tmojtsanacheta, y Jesús chë uayayëngaftaca cachcá tmojesanonÿá.

Jesús tmojanánatse chë judiëngbe más uámana amëndayëngbioye

(Mc 14.53-65; Lc 22.54-55, 63-71; Jn 18.12-14, 19-24)

⁵⁷ Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenefjna. ⁵⁸ Pedro bënocana Jesús tbojanasto, chë bachnangbe más uámana amëndayabe chashjóntscoñe; choye tojánamashëngo y chë Bëngbe Bëtsabe bëts yebnocá josticiëngaftaca yojótbema, chca, jtsetatšëmbuama ntšamo yochjopásama.

⁵⁹ Chë bachnangbe amëndayënga, chë bëtsëjemëngcá amëndayënga y ínÿenga judiëngbe

amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, ⁶⁰ pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, ⁶¹ y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajhcana y ñye unga tese jtëtsjebuana ca.”

⁶² As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶³ Pero Jesús ñye iytëca yojtsemna. Chíyeca chë bachnangbe más uámana amëndayá tbojanियana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

⁶⁴ Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë ñyets obenana bomnabe catšbioica jtsetbemanana y celoca jantšetëshiñe jtsaboyana ca.

⁶⁵ Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiamama entsemna mo cha cuafjoyenguangá, chë chabe Uaquiñá yomna ca cha tonjayana ora! ¿Ndayama más entšanga šochjátëjabeto Jesusbe

contra chamuayanama? ⁶⁶ ¿Ntšamo šmatjayana ca? —cha tojanatjá.

As chë entsanga tmojanjuá: —Ndegombre cha bëts bacna soye entsebomna; jóbanama bontsemna ca.

⁶⁷ Chora tmojanontsé Jesús juebëbuashëtjnayana, jabuache jantšetayana y ínÿengna imojtsejuébjantšetaye, ⁶⁸ y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, ¡momalisiá nda tcmënjajantšetá ca!”

Pedro tojánayana Jesúsbioye ndoñe bonjanabuátma ca

(Mc 14.66-72; Lc 22.55-62; Jn 18.16-18, 25-27)

⁶⁹ Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobeconá y tbojanियana: —Acnaca, Jesús chë Galileocáftaca conjánana ca.

⁷⁰ Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

⁷¹ Chora Pedro bëšoye yojábocna. Chentšna, inÿe shembása oservená chábioye tbojáninÿe y chë inÿe entsanga tojanëyana: —Cha, Jesús chë Nazaretocáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntšá yojtsejúraye: —¡Chë boyabása ndoñe quetsatabuatma ca!

⁷³ Chentšana, chë chentše imojtsemnënga Pédrëbioye tmojanobeconá y tmojaniyana: — Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

⁷⁴ Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúraye y yojtsichamo: —¡Chë boyabása ndoñe quetsatabuatma ca!

Y cachora canye ngallo yojacánta. ⁷⁵ Y Pedro yojenójuaboye ntšamo Jesús tbojanianama. Cha mëntšá tbojanianama: “Cabá ngallo ndécánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngménaca yojtsenóbošachna.

27

*Jesús, Pilátbioye tmojanánatse
(Mc 15.1; Lc 23.1; Jn 18.28-32)*

¹ Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. ² As, Jesús tmojanëcuébatsëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

Ntšamo Judas tojanóbana

³ Judas, chë boshjuaná, Jesús jóbanama ibojtsemnana tojanuena ora, puerta yojtsenócochinÿena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba, ⁴ y

mëntšá tojaněyana: –Puerte bacna soye tijama. Atše canye bacna soye ndbomná tšengaftangbe cucuatšiñe tijáboshjona chaóbanama ca.

Pero chēnga tmojanjuá: –¿Chē soye ndayá bēngbiama? Cach aca cochátotatšēmbñe ca.

⁵ As Judas chē ralbenga Bēngbe Bētsabe bēts yebnentše yojesētšana, y yojá y yojétsentsešaye.

⁶ Chē bachnangbe amēndayēngna chē ralbenga tmojtanatbaná y tmojánayana: –Quem crocenánama buiñe echanjuábuashana; ntšamo leyiñe endayancá, bēnga ndoñe quemuátobena chē Bēngbe Bētsabiama soyēnga quēcjnayētémiñe chana jasegórana ca.

⁷ Chcasna, chēnga tmojanenoyeuná, chē crocenánacna chē Alfarerbe Luare ca uabaina fshantse jabuámiyana, y chca, canye luare jtsebomnama ndayentše chē inye luarēngocana entšanga áshjajnēnga jutabuantsama. ⁸ Chíyeca, chē fshantse mēntscóñama Buiñe Luare ca iuabaina. ⁹ Chca, tojanochñēngo ntšamo Jeremías, chē Bēngbe Bētsabe juabna oyebuambnayá, tempscá tojanayancá, ndayá yochjanchnēnguama. Chana mēntšá tojánayana: “Y chē unga bnētsana ralbenga tmonjanca, ntsachetšá chē Israeloca entšanga cha tmojanamananacá, ¹⁰ y chánaca chē Alfarerbe Luare tmonjanbuamé, ntšamo Bēngbe Bētsá šonjanmandacá ca.”

Jesús Pilatbe delante

(Mc 15.2-5; Lc 23.2-5; Jn 18.33-38)

¹¹ Chentšana Jesús, chē mandado Pilátbioye tmojanánatse y cha mēntšá tbojantjá: –¿Aca chē judiēngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

¹² Chë bachnangbe amëndayënga y chë bëtsëjémënga Jesús mal imojtsequédantscuana, cha ndocá ntjojuana. ¹³ Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

¹⁴ Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana
(Mc 15.6-20; Lc 23.13-25; Jn 18.38-19.16)

¹⁵ Bashco fiesta ora, chë mandado yojanmana canye utamená jëtsboshjonana, nda entšanga tmojuabuayaná. ¹⁶ Chë tempo canye uachuana utamená inamna, Jesús Barrabás ca uabainá. ¹⁷ Njëtsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

¹⁸ Er chë mandado yojtsetátšëmbo, entšangna envidia causa Jesús chabe cucuatšíñe tmojánhoshjonama.

¹⁹ Pilato chë tribunal ca uabáinentše yojtsetbe-manëntscuana, chabe shema canya tbojanichmó mëntšá cha jauyanama: “Chë njëtsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

²⁰ Pero chë bachnangbe amëndayënga y chë bëtsëjémënga entšanga tmojanayëñaná, Barrabás jëtsboshjonama y Jesús chaóbana ca chamuayanama. ²¹ Chora chë mandado cachiñe

tojanatjá: —¿Chë útatentšana nda šmojtseboše atše chjětsboshjonama ca?

Y chënga tmojánayana: —¡Barrabás ca!

²² Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nÿetscanga tmojanjuá: —¡Motsecrucificá ca!

²³ Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: — ¡Motsecrucificá ca!

²⁴ Ndocá jamama yontsobenama y entšanga más jabuache enbouenanama tmojanontšema Pilato tojáninÿe ora, cha tojanmandá búyeshe juabuíyëboñana y nÿetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

²⁵ Chora nÿetsca entšanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

²⁶ As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšinë tbojánboshjona chamocrucificama.

²⁷ Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nÿetsca soldadënga chabe shëconana tmojanójoto. ²⁸ Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo. ²⁹ Canÿe coronësha tmojanapormá uchmašëfjangaca y tmojanabestšajó, y catšbioica cucuatšinë canÿe niñëfja. Chorna, chabe shecuaštentše

imojts ofshëntsaméntšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

³⁰ Chëngnaca imojtsanbuashëtjnaye y cach niñëfjaca bestšašentše imojtsétsjanjnaye. ³¹ Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

Jesús tmojan crucificá

(Mc 15.21-32; Lc 23.26-43; Jn 19.17-27)

³² Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

³³ Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”), ³⁴ Jesúsbioye vínoye hiéloyeca enájuabniye tmojanabuiyé chaofšema; pero yojaftántia y ndoñe yonjábošena chiye jofšiyama.

³⁵ Ya tmojan crucificá orna, chë soldadënga Jesusbe entšayamna, tsbanánoye tmojanétšena, chca, jtsetatšëmbuama ndabiama yochjanáquedama. ³⁶ Y chora chënga chentše tmojanotbiama Jesús jtsebojanýama. ³⁷ Y chabe bestšaše juatsboicna canye uabemana soye tmojananjo. Chiñe yojétsayana ndáyeca cha tmojan crucificama, mëntšá: MUA JESÚS ENDMËNA, CHË JUDIËNGBE REY ca.

³⁸ Utata bacna soye ochjajnayátnaca chënga chentše tmojanacrucificá, canya Jesusbe

catšbioica y chë ínÿana chabe uañicuayoica.
³⁹ Y chëjana imojtsachnëjuana entšangna, Jesús imojtsóyenguaye, imojtsobestšfshanenaye ⁴⁰ y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nÿe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

⁴¹ Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntsá imojtsichamo: ⁴² “Cha ínÿenga tojëftsatsebacá, pero cachá jéntsbecama ndoñe quenátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye. ⁴³ Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” –chënga imojtsichamo.

⁴⁴ Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

⁴⁵ Nÿetsto orscana las tresëntscoñe, nÿets quem luare yojtseibétata. ⁴⁶ Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonÿá ca?”)

⁴⁷ Chca tmojanuena ora, báseftanga chentše imojtsemna entšanguentšana imojtsichamo: “Cha

Elías, chë Bëngbe Bëtsabe juabna oyebuambnayá, bontsechembuana ca.”

⁴⁸ As chora, chentša canya tojëftsanótjajo canye esponjëshe janguanguama, untja vínoyeca chëshe tojanfchecuacua, canye niñëfjiñe tojananguësëtjo y Jesúsbioye tojanbeconá chaofšema. ⁴⁹ Pero ínÿengna tmojánayana: “Cachcá mochjonÿaye, er Elías tayochjabo jabátsbocama ca.”

⁵⁰ Pero Jesús cachiñe jabuache tojanoyó y tojanóbana. ⁵¹ Y cachora, Bëngbe Bëngbe Bëtsabe bëts yebnoca yojújonÿana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonÿana. Fshantse yojuangmëmana, ndëtsbenga yojtsashtëtšana, ⁵² y chë cuevëshënga obanëngaca yojtsëtëtjo y banga Bëngbe Bëtsabe entšanga tmojtanayena. ⁵³ Y chënga, Jesús tojtanayenentšana, chë cuevëshënguentšana tmojánbocana, y Jerusalén, chë uámana bëts pueblo ca uabáinoye tmojánamashjna y ba entšángbioye tmojánebëbuacana.

⁵⁴ Chë soldadëngbe amëndayá y chë ínÿenga, Jesús jtsebojanÿama cháftaca tmojanoquedanga, chë fshantse yojuangmëmanama tmojáninÿe ora, y nÿetsca chë yojtsëchnëjuana soyëngama, puerte auatjanánënga imojtsemna y tmojánayana: “¡Nde-gombre quem boyabása Bëngbe Bëtsabe Uaquiñá yomna ca!”

⁵⁵ Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana. ⁵⁶ Chë shembásengbeñe imojtsemna María Magdalena;

María, Santiago y Josebe mamá; y Zebedeobe uaquiñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. ⁵⁸ José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchema. ⁵⁹ José chë cuerpo tojanca y canye nduatsenga lino entsëjuaca tbojanandmaná. ⁶⁰ Y canye chabe tsëm cuevëshiñe tbojanjajó. Tempo cha inamánda chë cuevëshna ndëtsbenguiñe chamopormama. Canye bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe. ⁶¹ Pero María Magdalena y chë inye Mariyna chentše tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentše jt-sebojanýama

⁶² Yëfsana, chë ochnayté, chë bachnangbe amëndayënga y chë fariseunga cánýiñe tmojána Pilato jinýama. ⁶³ Tmojaniyana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. ⁶⁴ Chíyeca, momandá chë cuevëshe soldadënga chamotsashanyá unga tentscuana. Chca, chabe uatsjëndayënga ndoñe ibeta chamondabo chabe cuerpo jabëtsatbëbama, y chentšana chënga entsanga chamúyana, Jesús tojtayena ca. Y chca, chabiamá quem ústonoye bostero soye,

chë cachabiamá tojánayana soyëngama puerte más bacá nántsemna ca —chënga tmojanianá.

⁶⁵ As Pilato tojanëyana: —Tšëngaftanga cach tšëngaftangbiamá soldadënga šmondábamna. Mot-sajna y chë cuevëshe cuedádoca šmochtsashanjá, ntšamo šmondëtatšëmbcá ca.

⁶⁶ Chora chënga tmojána chë cuevëshe jtsashanjá; chë ndëtsbena, tsengájaseca imojuinýnaná, ntsotatsëmbcá ndocná choye chaondámashënguama, y soldadënga chentše tmojëftsanashejuana.

28

Jesús tojtanayena

(Mc 16.1-8; Lc 24.1-12; Jn 20.1-10)

¹ Ochnayté chentšana, chë inýe semana bojatsenté yojtsebínýana ora, María Magdalena y chë inýe María tbojána cuevëshoye jarrepárama.

² Ndeolpe fshantse tojanangmëmmana, er Bëngbe Bëtsabe canýe ángel celocana tojántsma, chë cuevëshoye tojanobeconá, chë atamiana ndëtsbé tojtsanjuaná y chiñe tojanótbema. ³ Chë ángelna mo canýe tcuinýějca yojtsebuashinýinýana, y chabe uichëtjonëjuangá uafjantsëjuangá mo jantšetëshcá yojtsamna. ⁴ Chë soldadënga chca tmojáninýe ora, de auatja yojtsangmëmnye y mo obanëngcá imojtsemna.

⁵ Chora chë ángel chë shembásatbioye tojanëyana: “Ndoñe batauatjana. Atše sëntsetatsëmbo tšëngaftanga Jesús, chë tmonjancrucificá cha šmojtsenguama. ⁶ Cha muentše ndoñe quenátsmëna; cha tontayena,

ntšamo cachá tonjanayancá. Mabata y šochjinÿe cha endétsesegorantše. ⁷ Betsco motsata y chë uatsjéndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinÿe ca.’ ” Y chora cha tojánayana: “Chca šondmëna tšëngaftanga jauyanana ca.”

⁸ Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsannotjajo chë soye chë uatsjendayëngbeñe jobuambayama. ⁹ Y ndeolpe Jesús chata tojánëbëbuacna y tojanacheuá. Chatna, chábioye tbojanobéconata, tbojtanadorata y chabe shecuatše shëconana imojtobojcjuá. ¹⁰ Y Jesús tojanëyana: “Ndoñe batauatjana. Motsata atšbe uatsjéndayënga, atšbe catšátanga jáuyanama Galileoye chamotsá y choca atše šmochjinÿe ca.”

Ntšamo chë soldadënga tmojánayana ndayá tojanochnënguama

¹¹ Chë shembásata ibojtsayëntscuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá. ¹² As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtanatšatá, ¹³ y mëntšá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjéndayënga tmojabo y chabe cuerpo tmojabétsatbëba ca. ¹⁴ Y chë mandado chë soyama chaojátatšëmbonëse, bënga lempe cháftaca fchjenóyeunaye, chca,

tšëngaftangaftaca ndocá chaondopasama ca” — chënga tmojanëyana.

¹⁵ As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscoñama judiënga cachcá mondbétsichamo.

Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama (Mc 16.14-18; Lc 24.36-49; Jn 20.19-23)

¹⁶ Chentšana, chë bnëtsana canye uatsjëndayënga Galileoye tmojána, chë ndëmua tjoye Jesús chënga tojanabuayená choye. ¹⁷ Y Jesús tmojáninye ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca. ¹⁸ Jesús chëngbioye tojanobeconá y tojanëyana: “Bëngbe Bëtsá nyëts mando atše šonjatšetá celoca y quem luarentše.

¹⁹ Chcasna, motsajna, nyëts luarënguenache oyenënga atšbe uatsjëndayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca, ²⁰ y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesús tojanëyana.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 21 Feb 2024 from source files
dated 29 Jan 2022
19104c0e-9046-5ff3-82fb-eb838c88dcf9